



TUSI FAITAU ASO

2024

IANUARI – IUNI

**Ekalesia Faapotopotoga Kerisiano
i Amerika Samoa**



IANUARI – IUNI 2024

TUSI FAITAU ASO

EKALESIA FAAPOTOPOTOGA KERISIANO I AMERIKA SAMOA

1 Kanana Fou St, Pusa Meli 1537, Pago Pago, Amerika Samoa 96799

+(684) 699-9810 <https://efkasonline.org>

Fa'aliliu e le Ofisa o le Lamepa

Ofisa Tutotonu EFKAS

Etele Falealii AKF, Faatonu

Tui Luani AKF

Charis Sao AKF

Tamilo Palepua AKF

Maliliega mo lenei Fa'aliliuga

O lenei Tusi Faitau Aso ua mafai ona lolomia ona o se maliliega i le va o le Ekalesia Faapotopotoga Kerisiano i Amerika Samoa (EFKAS) ma le *International Bible Reading Association (IBRA)*, ua aumaia ai le fa'atagaga e fa'aliliu ai lana tusitusiga Peretania, "*Fresh from the Word: A Bible for a Change 2024*," i le gagana Samoa. Talu ai fa'afitauli masani i le fa'aliliuina o gagana, e i ai vaega o lenei fa'aliliuga Samoa e le o mafai ona maua le uiga atoatoa o manatu ma mafaufauga o loo aumaia i le gagana Peretania. Peita'i, o le agaga maua i le Ofisa Tutotonu, fa'apea le Ofisa o le Lamepa sa feagai ma lenei fa'aliliuga, ia mafai ona maua e tagata Samoa se punā'oa fa'aleagaga e utuvai faatasi ai ma tagata Kerisiano i le lalolagi, e fai ma ta'iala o le soifua tapua'i ma le ola su'esu'e i le Afioga Paia a le Atua i aso faisoo.

UPU TOMUA

I le suafa pele o Iesu Keriso le Ao o le Ekalesia, matou te fa'atalofa ma fa'afeiloai atu i le mamalu o le Ekalesia EFKAS – afio lau Afioa i le Ta'ita'ifono ma le mamalu o le Laulauafono o le fonotele; afio le Komiti a Tama o le Ekalesia ma le mamalu o Komiti Tumau ma Mafutaga Lagolago; le paia i le nofo a Matagaluga, mamalu o Pulega, seia oo i 'aulotu totino uma o le EFKAS – Malo le folau! Malo le malaga manuia i lenei Tausaga Fou! E ui na afatia i tatou i peau lagavale ma galu fatitō o lena tausaga ua mavae atu, ae le fa'a'itiitia le viiga ma le fa'afetai i le Matai Sili ona o Lana tausaga ma Lona malu puipuia o le soifua fa'atuatua o lana Ekalesia, o lea ua tatou tuvae ai nei i le Tausaga Fou 2024.

A o fa'ataumuā āva le Sā folau a le Ekalesia i lenei tausaga fou, e le asa lava le masalo: e fa'ape'i foliga o lenei Tausaga Fou? O a ni suiga fou o le a tula'i mai? O a ni mea o le a tutupu mai e lu'itau ai le soifua fa'atuatua o le Ekalesia? O le auga o le **Upu Fou a le Alii** ma le *Tusi Faitau Aso 2024*, o le tapenaina o le soifua fa'atuatua o le Ekalesia ina ia feagai ai ma luitau o le Tausaga Fou.

Ua vaevaeina le Tusi Faitau Aso 2024 i vaega e lua: *Vaega Muamua: Ianuari – Iuni 2024; Vaega Lua: Iulai–Tesea 2024*. O tusiga o loo lomina ai e fa'aautu i le fa'atupuina o le soifua fa'atuatua o le tagata Kerisiano, aemaise le ola fa'aleagaga i aso fai soo. E tomua i le *Fa'amoemoega mo se Tausaga Fou*. O isi tusiga e fa'atāua ai le *Teuteuina o le Ala* ma le *Lūlūgā Saito* a le Alii o Iesu i le Evagelia o Mareko. O isi e fa'ataua i le *Alofa* o le Atua, o le *Ola Valaauina*, o le *Fa'aleleiga*, o le *Toe Tausia o le Malumalu*, o le *Aumaia o le Talalelei e Fausia ai le Ekalesia*, ma isi matāupu. A ao fa'atasi, e taula'i uma i le mafutaga vavalalata o le tagata ma le Atua Tolutasi Paia, aua o le fa'avae lea o le soifua fa'atuatua.

O le fa'aliliuina o le tatou Tusi Faitau Aso mai le *International Bible Reading Association (IBRA)*, o le galuga o loo feagai pea ma lau Ofisa o le Lamepa; o le susuga ia **Tui Luani** AK (Mati), le susuga ia **Tamilo Palepua** AK (Fepuari 14-29, Aperila), le susuga ia **Charis Sao** AK (Me, Iuni 1-17), ma le Fa'atonu (Ianuari, Fepuari 1-13, & Iuni 18-30). O le fa'amoemoe maualuga, ia avea lenei tusi e fai ma ta'iala o sauniga lotu a le EFKAS i aso ta'itase, fa'apea sauniga lotu a lo tatou Atunuu i soo se tasi e fia faaogaina lenei tusi. O le tatalo, ia fa'atele ma fa'atumu atu e le Alii Lona Agaga, aemaise o le togiola ua faia e le Atua ia Keriso Iesu, a o feagai ai ma lau tapua'iga.

Ia Manuia le Tausaga Fou!

Etele T. Falealii AK
Fa'atonu Lamepa

FA'AMOEMOEGA MO SE TAUSAGA FOU (1)

HOPE FOR A NEW YEAR

Aso Gafua – Ianuari 1: “Se a ea la oulua feau?”

Tusi Faitau – Ioane 1:35-39 (*What are you looking for?*)

Matua – ff.36-38a: “*Ua ia vaai foi ia Iesu o savali ane, ona fa’apea atu lea o ia, ‘Fa’auta i le Tamai mamoe a le Atua.’ Ua fa’alogologo foi ona soo e to’alua i lana upu, ona la mulimuli mai ai lea ia Iesu. Ua fāliu Iesu, ua silafia i la’ua ua mulimuli mai, ona fetalai atu lea o ia ia te i la’ua, ‘Se a ea la oulua feau?’*”

O le faitauga o lenei aso muamua o le tausaga fou, o loo folafola ai e Ioane le o’o mai o le malo o le Atua i ona soo; na fa’apea atu ai, “*Fa’auta i le Tamai mamoe a le Atua,*” o le Fa’aola ua leva ona fa’atalitali i ai. Ona mulimuli atu lea o ona soo ia Iesu; mulimuli ane, ua fesili atu Iesu ia te i la’ua, “*Se a ea la oulua feau?*”

O le masina o Ianuari na fa’aaigoa e tagata Roma o “*Janus*”; o lona uiga, o le atua o *faitoto’a*, o le atua o *suiga o mea tuai i mea fou*, poo le atua o *amataga ma gataaga*. O e sailia le gataaga poo le amataga o lenei tausaga? Silafia e Iesu mea uma o loo tatou sailia. Na te aumaia le faamoemoe o le ola fou e susulu ai lona malamalama i mea uma o loo pogisa ai lo tatou ola. O Iesu le “*faitoto’a*” e ui atu ai i le Tamā (Ioane 10:9); o lau faitalia pe e te ulufale atu ai.

Tatalo: Iesu e, i o matou mana’o mo se ola fou, fesoasoani ia matou saili ia te oe. Fa’afetai ona ua fai oe ma faitoto’a o le ola fou. **Amene!**

Aso Lua – Ianuari 2: “Inā sau ia, inā matamata!” (*Come and see!*)

Tusi Faitau – Ioane 1:43-46

Matua – f.46: “*Ua fai mai Natanielu ia te ia, ‘E mafai ea ona tupu o se mea lelei mai Nasareta?’ Ua fai atu Filipino ia te ia, ‘Ina sau ia, ina matamata.’*”

Na silafia e Filipino talatuu a Isaraelu e uiga i le Mesia o le a afio mai e lagaina le toilalo a lona nuu. Ina ua valaau Iesu ia te ia e mulimuli mai, na faailoa e Filipino ia Natanielu, “*ua matou maua o ia le ua tusia e Mose ma le ‘au perofeta, “O Iesu lea.”*” Na matuā fiafia Filipino auā ua fia tausaga o latou fa’atalitali.

O le valaau e mulimuli ia Iesu e pipisi atu i isi, ae mafai ona faaleagaina i manatu faasausili, e pei ona atagia ia Natanielu ma ona upu ua fai nei ma matua. A o Filipino, ua tumu i le fiafia, ma ua naunau e faailoa atu Iesu. O le valaaulia e “*sau e matamata,*” o se tulaga tāua tele. O le avanoa lea ua tuuina mai e te sau ai e vaai ma molimau ia Iesu – vaai i mea lelei uma o le a faia e Iesu mo oe, ma molimau i faamanuiaga tetele ua fuafua e le Atua mo oe ma lou aiga, o lou nuu, ma lau Ekalesia. I le amataga o lenei tausaga fou, vaai ne’i misi ia te oe lenei avanoa.

Tatalo: Le Alii e Iesu, fesoasoani ina ia matou iloa ona ola fa’atalitali, ma fa’atoilaloina o matou tagata. **Amene!**

Aso Lulu – Ianuari 3: “Aua le popole” (*Don’t worry*)

Tusi Faitau – Mataio 6:25-34

Matua – ff. 31a, 32e-33: “*O lenei, aua ne’i outou popole ... Auā ua silafia e lo outou Tamā o i le lagi e aoga ia mea uma ia te outou. A ia outou muai saili lona malo ma lana amiotonu; ona fa’aopoopoina atu lea o ia mea uma ia te outou.*”

I nei ona aso ma mea o loo tutupu ai, toatele tagata o loo popole i le si’itia o tau ma le alualu i luga o le taugatā o le soifuuga, aemaise le tulaga o le eletise, o le penisini, o mea ‘ai, ma fale e nonofo ai. E fa’apefea ona tatou ola? Ua faailoa

mai e Iesu, e le tatau ona tatou popole i ia mea auā o loo soifua le Atua. O upu o le matua, o le folafolaga a Iesu e faatatau i le faatuatua. A tatou faatuatua, o lona uiga ua tatou tuuina atu le avanoa e gaoiō ma galue mai ai le Atua i lo tatou ola. Ae a tatou popole, ua leai se avanoa a le Atua e galue ma gaoiō ai. I lenei tausaga fou, 'aua le popole i taimi o le a fesouaina ai le tatou faigamalaga. A ia fa'atuatua. Tuu le avanoa se'i galue mai ai le Atua, tatou te molimau ai i ana faamanuiaga ma galuega tetele o le a faia e le Atua mo i tatou.

Tatalo: Le Tamā e, foi mai a matou mea'ai e tatau ma le aso, fesoasoani foi ina ia amata nei ona matou taula'i atu ia Iesu le Alii Fa'aola. **Amene!**

Aso Tofi – Ianuari 4: “O le Alofa o le Atua e le mavae”

Tusi Faitau – Auega 3:22-26 (*God's love never ceases*)

Matua – ff.22-23: *“O le alofa o le ALII ua le fa'aumatia ai i tatou, ona ua le mavae o lona alofa mutimutivale; e fou mai ia i taeao uma; e tele lou fa'amaoni.”*

E fa'atumulia oe i le fa'amoemoe fou i aso faisoo? E faigata pe afai tatou te fetai'a'i pea ma fita ma faigata o le olaga. A o le autū o lenei aso: “O le Alofa o le Atua e lē mavae.” O Iesu le tumutumuga o le alofa lea o le Atua, i lona maliu fasia i luga o le satauro e togilaina ai le lalolagi. O a la tiga sa tatou afatia ai i le tuana'i, e maua pea le faamoemoe fou pe a tatou mafaufau i le alofa le mavae o le Atua. O le ala lea na suia ai le vaai a le tusitala o Auega; ua see ese mai le fa'anoanoa ona o le toasa a le Atua, ae ua taula'i i le Atua ma lona alofa le mavae sa faaalii i le tuana'i o lona nuu. Tatou te mafatia ona o tiga o le taimi nei, ae tatafa pea ata o le manuia i le lumanai, ona o le Atua ma lona alofa le mavae mo le tagata.

Tatalo: Le Tamā e, fa'afetai ona o lou alofa e le mavae lea ma e fou mai ia i taeao uma; fesoasoani ina ia fa'amalamalamaina le maliu o Iesu. **Amene!**

Aso Faraile – Ianuari 5: “Ou te ia te oe” (*I am with you*)

Tusi Faitau – Isaia 43:1-9

Matua – ff. 4a, 5a, 7: *“Auā na fa'apelepeleina oe e a'u, ua ou fa'amamaluina ai oe; auā foi na ou alofa ia te oe ... 'Aua le fefe, auā ou te ia te oe ... o i latou uma ua igoa i lo'u igoa, na ou faia ia viia ai a'u; na a'u gaosia ma ou faia lava i latou.”*

O le ola i le fa'amoemoe e pei o se malaga. E fa'ale-fa'atuatua lona faatinoga. E i ai foi taimi e tofotofo ai i mea fita o le ala. Tatou te le iloa atoatoa le Atua ma ona gaoioiga. Ae tatou te talitonu, e fa'atasi mai o ia i ala uma tatou te uia. O le feau faamafanafana lea o le Atua mo lonu nuu o loo nofo tāfea i Papelonía: “Ou te ia te oe.” E silafia e le Atua o tatou tauiviga ma mafatiaga. Na te iloa foi o tatou lagona fefefe ma le le mautonu, aemaise o ōgā sami loloto ma afi mumū tele e fetai'a'i pea ma i tatou i lenei olaga. O lana fetalaiga, “Ou te ia te oe,” o le ata lea o le Atua mafuta. O le Atua e lotolotoi ma lana fanau i nofoaga o loo saisaitia ma taotaomia ai i le fefe ma le atuatuvaale. A o le ata foi lea o le Atua folafola, e galue i taimi uma e faataunuuina ana folafolaga. Afai e afatia la tatou faigamalaga i se taimi o lenei tausaga, ia teufatu le fetalaiga lea a le Atua, “Ou te ia te oe!”

Tatalo: Le Alii e, fa'afetai ona o lou folafolaga ua mausali ai le fa'atuatua; fesoasoani ia aveese le fefe ma ia matou mautinoa i lou fa'atasi mai. **Amene!**

Aso Toona'i – Ianuari 6: “Nuanua o le fa'amoemoe”

Tusi Faitau – Kenese 9:13-17 (*A rainbow of hope*)

Matua –ff.14-15: “*A ou fa’amalumalu ifo le lalolagi i se ao, ma ua iloa le nua-nua i le ao; ona ou manatua lea o la’u feagaiga ua ou osia ma outou, ma mea ola eseese uma lava; e le toe avea le vai ma lolo e fa’aumatia ai mea ola uma.*”

O le tala ia Noa o loo fa’ailoa mai ai, o le taunuuga o le agasala, o le oti; faapea le alofa mutimutivale o le Atua mo lana fanau ua foa’i mai ai le ola. E le mafai e manu ona fa’ailoa mai le leaga o tagata na silasila i ai le Atua i taimi o Noa, ma lona fa’anoanoa i le faia o tagata (6:6). E le mafai e se vaa laupapa ona aumaia le alofa tunoa ma le pui puiga a le Atua, lea na taofia ai le vai mai le fa’aleagaina o le laueleele. A aunoa ma lenei tala, e le mafai ona tatou iloa le mea moni o le nuanua.

O le mea e fa’afetai ai, i le sasao fa’aafi o le amioleaga o tagata (6:5), na silasila le Atua ia Noa. O Noa o se tagata amiotonu na savali fa’amaoni ma le Atua (6:9). O le fa’asaoina o Noa ma lona aiga, na faia ai e le Atua se fa’aailoga o lana folafolaga – o le malamalama felanulanua’i e susulu mai i ao, ua tatou ta’ua o le nuanua.

Tatalo: Fa’afetai le Atua ona o lou Alo na malii i luga o le satauro. Fa’afetai Iesu ona o le vai o le ola ua matou feola ai ae le malelemo ai. **Amene!**

FA’AMOEMOEGA MO SE TAUSAGA FOU (2)

HOPE FOR A NEW YEAR

Aso Sā – Ianuari 7: “O le a maleifua le foafoaga” (*Nature will awake*)

Tusi Faitau – Ioelu 2:22-25

Matua – f.23: “*O outou foi o le fanau a Siona e, ia outou fīafia ma olioli i le Alii lo outou Atua; auā ua ia foaiina fa’atatau mai ia te outou le uaga muamua, na te fa’atōtōina ifo foi le ua mo outou, o le uaga muamua, atoa ma le uaga mulimuli i le masina muamua.*”

Molimau Ioelu i le olaga faifaatoaga a Isaraelu. E muamua fa’amamaina le fanua, ona fa’atalitali lea mo le uaga muamua: o le fa’ailoga ua saunia le laueleele mo le toe fua mai. O le fa’atalitali mo le toe fa’aleleia o le laueleele, o le fa’atalitali foi lea i le Atua ma lona toe fa’aleleia. Afai e tuai mai timuga, ona fememea’i ma le mautonu le nuu. Ae a taunuu timuga, ona maua lea o le fīafia ma le mapusaga e le mafa’amatalaina, e masani ona faatino i siva ma fa’afiafiaga. O le atoatoa foi lea o le ola mo ē na mafatia a o fa’atalitali i le folafolaga a le Atua. E iai taimi tatou te manatu ai ua lafulafua le ola ona o mea tigā o le olaga nei. O le folafolaga a le Atua ia Isaraelu, “E tutumu mea e sasa ai saito, e taumasuasua le tuugāuaina i le uaina...” A tutupu tigā, ia tatou olioli pea i le Alii auā e na te le tuulafoa’i i tatou.

Tatalo: Le Atua alofa e, e te fa’atasi mai i o matou tigā uma; ua e taofimau pea i matou i lou alofa tunoa se’ia oo na to mai ou uaga o manuia. **Amene!**

Aso Gafua – Ianuari 8: “A’ega o fugālaau totogo”

Tusi Faitau – Isaia 35:1-2 (*Spring flowers are coming*)

Matua – ff.1-2a: “*E olioli ona o i latou le vao lafulafua, ma le nuu naumati; e fīafia le toafa, ma fua mai e pei o le aute. E fua tele mai lava ia, e fīafia foi ma le fīafia tele, ma le alaga; e avatu i ai le lalelei o Lapanona, ma le matagofie o Karamelu ma Sarona.*”

A fuga mai le vao lafulafua pe lauolaola le toafa naumati, e peisea’i ua pepese “Aleluia!” le foafoaga. O se tulaga e maofa tele, auā e le itiiti se taimi e saunia ai le a’ega o fugālaau totogo, aemaise i totonu o se toafa. O le perofetaga lenei a

Isaia ia Isaraelu o loo tafea i Papelonia, aemaise o le fa'atafunaina ai o le aai o Ieruselema ona o agasala a le nuu. E ui na nofo tafea i nuu ese, ae apoapoa'i le perofeta, e le toe mamao ae fa'afo'isia e le Atua lona nuu. O le masina o Ianuari o loo iai le vaitau timuga. O le vaitai e faatalitali ai fatu ma saito o le fogaelele e totogo ma tuputupu ai. Ua aumaia e Isaia se ata o le toe foi atu o le nuu i Siona, ma ua folafola mai ai le toefuataiga. O le a toe fa'afo'isia mai le nuu, ma *avatu i ai le lalelei o Lapanona, ma le matagofie o Karamelu ma Saronā*. O loo manino ma fa'atusa e Isaia le mamalu o le Atua i le toafa naumati ae fuga mai ai laau manogi.

Tatalo: Le Atua foafoa, ia totogo a'e pea lou alofa i o matou luga, ina ia matou iloa lou matagofie i mea uma na e faia i le amataga. **Amene!**

Aso Lua – Ianuari 9: “Ola fa'afetai” (*Being thankful*)

Tusi Faitau – Kolose 3:12-17

Matua – f.12: *“O lenei, ia oofu outou i le alofa mutimuti vale, ma le agalelei, ma le loto maualalo, ma le agamalu, ma le onosai, fa'apei o e ua filifilia e le Atua, o e ua paia ma ua alofaina.”*

E tele tala a Paulo e uiga i lo tatou natura ma le tulaga o le fa'aofuina o i tatou. E tatau ona “tatala'ese” o tatou ofu eleelea—pei o le fevaevaea'i ma le femisaa'i; ae ia “toe fa'aofuina” i tatou i le alofa, agalelei, agamalu, ma le onosai. Ioe, e iai pea o tatou natura fa'aletagata e tupu ai feeseeseaiga i le va ma isi. E manaomia le ola fa'amagalo. E mana'omia foi le tumu o le Agaga Paia e mamalu ai Keriso i lo tatou ola i aso faisoo. O nei mea uma e fusia fa'atasi ma taofimau i le alofa.

E pei ona saunia o tatou ofu i aso uma, ia tatou oofu i le alofa. E fusi nuu i le tulafono, ae mafai foi ona fusia i le alofa. O mafutaga uma, fa'aiuga ma fuafuaga uma, e fa'amamaluina le filemu o Keriso. E mana'omia ona fa'ata'ita'i, tuu iai le loto, a o le ogatotonu o ia mea uma o le ola faafetai.

Tatalo: Le Alii e Iesu, a'oa'o i matou i ou ala uma. Ia faia i matou e fa'apei o ou soo ina ia matou alolofa atu ia oe ma le fa'amaoni. **Amene!**

Aso Lulu – Ianuari 10: “Taofi mau i le lelei” (*Hold on to good*)

Tusi Faitau – 1 Tesalonia 5:16-24

Matua – ff.16-18: *“Ia outou saga olioli pea lava; ia tatalo e le aunoa; ia outou fa'afetai i mea uma lava, auā o le finagalo lea o le Atua ia te outou, ia Keriso Iesu.”*

O le tusi ia Tesalonia e talafeagai i le amataga o le tausaga, fa'atasi ai ma ana fa'amanatuga fa'amāfanafanaloto e fa'apea: o le mulimuli iā Iesu o le ala sa'o lea, ma o loo fa'atasi Iesu ma i tatou se'ia oo i le i'uga o taimi. I lona matāupu e 4 i luma atu, na apoapoiina tagata Tesalonia ina ia 'aua le fefefe pe lotovaivai. Ae ao ona latou fefa'alaeiaua'i ma le mautinoa i le fa'aaliga o le toe afio mai o Keriso.

O le matua o lenei aso, ua aumaia ai le auala e tatau ona tatou ola ai e tusa ai ma le fa'aaliga a Keriso. 'Ia olioli e lē aunoa.' E lē na o taimi fa'apitoa poo taimi lelei, ae o taimi uma. E tatau ia Tesalonia ona tatalo e le aunoa. E tatau ona latou avatu le fa'afetai; e le gata mo taimi lelei, ae 'i tulaga uma lava'. Sa puapuagatia ma fatuatia le au Tesalonia; atonu sa latou iloa e le faigofie le mulimuli ia Keriso. Ae o iinei e faigofie ma tuusao le valaau: olioli, tatalo ma avatu le fa'afetai, tusa lava poo le a le mea e tupu. Ua ta'u atu foi ia i latou ina ia “taofimau i le mea lelei”.

Tatalo: Alii e Iesu, fa'aali mai poo a mea lelei, ma ia a'oa'o i matou ina ia matou olioli ma fa'afetaia i taimi uma. Ia matou taofi mau i lau Afio. **Amene!**

Aso Tofi – Ianuari 11: “Fa’avae i le alofa” (*Grounded in love*)

Tusi Faitau – Efeso 3:14-21

Matua – ff. 16-18: *“Ina ia foaiina ia te outou e tusa ma le faulai o lona mamalu, ia fa’amalosi outou i le mana e lona lava Agaga i le tagata i totonu, ia nofo mau foi o Keriso i o outou loto i le fa’atuatua; ina ia maua ma fa’avaeina outou i le alofa, ia mafai ai ona iloa lelei e outou atoa ma le au paia uma”*

E ma’eu le ofoofogia o upu o le matua o lenei aso! Mo i latou o lagona le vaivai, tatalo Paulo mo le malosi o le Agaga e taofia ai i le alofa o Keriso. Mo i latou o lagona le tuulafoa’i, tatalo Paulo mo le malamalama ia iloa o loo tatou tutū fa’atasi ma le ‘au paia uma. Mo i latou o lagona le leai o se fa’amoemoe, tatalo Paulo ia tatou iloa ua “fa’avaeina i tatou i le alofa”.

O le galuega fa’amisiona a le Atua, o le fa’aleleiga e talia uma ai agasala ma mafatiaga. O ō tatou olaga fa’atuatua e ala ia Keriso ma le Agaga Paia, e autu lava i le sootaga o le talitonu, aemaise o la tatou aga atu i le Atua fa’apea ma le tasi i le isi. Ia o gatasi le fa’atuatua ma ola talitonu, ona tatou malaga fa’atasi ai lea ma le Atua e tusa ma le fa’aleleiga o le foafoaga ma mea uma, i le alofa le mafuatiaina o le Atua. O le fa’aleleiga o le ki lea i le galuega a le Atua mo le fa’aleleia o sootaga vavalalata o le Atua ma tagata, totonu o nuu, totonu foi o le lalolagi a le Atua.

Tatalo: Lo matou Tamā e, ia paia lou suafa! Ia oo mai lou malo, ia faia lou fa’aleleiga. Ma, ia amata atu ia te a’u nei. **Amene!**

Aso Faraile – Ianuari 12: “Fa’amalosi ou tulivae!”

Tusi Faitau – Eperu 12:1-13 (*Strengthen your knees!*)

Matua – ff. 12-13: *“O le mea lea ina fa’amalosi ai ia i lima ua gagase ma tulivae ua vaivai; i le ma lea, ina fai ia o ala laulelei mo o outou vae, ne’i mapeva le vae ua pipili, a e lelei ina fa’amaloloina.”*

O le tusi o Eperu e pei o se lauga. E sosoo le apoapoiga ma le fa’amalosi ‘au. Na tusia i le taimi na to’atele ai tagata Iutaia ua taliaina le fa’atuatua ia Iesu (ma sa feagai ma sauāga), ae le’i oo i le tulaga o le fa’atuatua fa’aKerisiano e tatau ona iai. To’atele sa taofimau pea i talitonuga tuai ma uiga tuai. Faamalosi le tusitala i tagata talitonu ina ia tutumau, ma ia atagia lo latou fa’atuatua i le tapua’iga migao ma le maofa. O le ola fa’aKerisiano e ogatotonu i le satauro. O le avefa ma soo o Keriso e tausinio ai i le satauro. E manaomia ai ona “fa’amalosi o tatou tulivae” mo le tausinioga lea ua tu mai nei i o tatou luma.

Tatalo: Le Alii e, matou te tapua’i atu i le agaga ma le fa’amaoni; ia fa’amalosi mai e lau Afio o matou auaunaga e tumau ai le fa’atuatua. **Amene!**

Aso Toona’i – Ianuari 13: “O se amataga fou” (*A new beginning*)

Tusi Faitau – 1 Peteru 1:3-9

Matua – f.3: *“Ia fa’afetaia le Atua, le Tamā o lo tatou Alii o Iesu Keriso, o le na fanaufouina i tatou ona o lona alofa tele, ina ia iu i le fa’amoemoe ua ola, i le toe tu mai o Iesu Keriso nai e ua oti”*

E le o fa’aaogaina e Peteru ata fa’afatusa e fa’amatala ai le suiga fa’aleagaga na fanau mai i o tatou olaga. Ua na ona ia tusi mai: ‘Ua ia fanaufouina i tatou.’ O se fanau mai ua tumu i le fa’amoemoe ma le tofi mautinoa i le lagi, fa’atasi ai ma le mana o le Atua mo e ua ola i le fa’atuatua. Atonu e oo mai fa’anoanoaga ma mafatiaga; e ono tofotofoina foi lo tatou fa’atuatua. A o le alofa o le Atua na te

taofia i tatou mai le pauu atu i le agasala, tatou te maua ai le olioli ma le fiafia e ala i lona faatasi mai. O i latou uma e fananau mai i lenei lalolagi o loo i ai se faigamalaga e iloa ma a’oa’oina ai le olaga atoa i luma atu. O le fanau mai o loo fa’amatalaina e Peteru ua aumaia ai i tatou i se olaga i totonu o le laufanua o le alofa tunoa o le Atua. O lenei fanau mai, o “se amataga fou” lea i le ola fa’atuatua.

Tatalo: Fa’afetai le Atua ona o le fanaufouina e ala i le toetu o Iesu. Fa’afetai ona o e na fanauina i matou i la le tino aemaise le agaga. **Amene!**

EVAGELIA A MAREKO (1)

1. Teuteuina o le ala (*Preparing the way*)

Aso Sā – Ianuari 14: “Malaga a Ioane ia Iesu” (*John’s journey to Jesus*)

Tusi Faitau – Mareko 1:1-15

Matua – f. 3e: “*Ina teuteu ia outou le ala o le Alii, ia fa’asasao ona ala.*”

E amata le tala a Mareko ia Ioane le Papatiso, ua iloga i le tulaga fa’aperofeta o le Feagaiga Tuai e le’i vaaia mo le 500 tausaga. Peitai, o lenei tala e le o fa’atatau ia Ioane. O ia ua na o se “teuteu ala.” O Ioane o le tagata o le vao. O se tagata paia. Faimai o ia o le perofeta na folafolaina mai e Elia “a o lei oo mai le aso o le Alii” (Mal4:5). Ua folafola atu e Ioane le salamō i tagata o loo ola i lalo o le pulega a Roma. Ua iloa e Ioane ua afio mai le Mesia, o le tupu paia, ua fa’auuina o lē e sili atu lona malosi nai loo ia. Na te iloa ua lata mai le Malo o le Atua, ae le tatau ona avea o ia ma fa’aailoga. Ua papatisoina Iesu e Ioane, ae faamaufaaailoga e le Agaga Paia ua afio ifo e pei o se lupe. Ua saunia e Ioane le ala, ae ta’ita’i e Iesu le suia o le lalolagi i le aga’i i luma.

Tatalo: Iesu e, tuu maia le ava matou te teuteuina ai le ala mo lou afio mai, ma fesoasoani ina ia matou fa’aavanoaina le ala mo lou malo. **Amene!**

Aso Gafua – Ianuari 15: “Ulua’i soo, ulua’i vavega”

Tusi Faitau – Mareko 1:16-34 (*First disciples, first miracles*)

Matua – f. 17: “*Ona fetalai atu lea o Iesu ia te i laua, ‘Ina mulimuli mai ia ia te au, ou te faia oulua ma fai faiva i tagata.’*”

O le valaau a Iesu e mulimuli ia te ia, e omai fa’atasi ma fa’amoemoega ma fa’atonuga. E tatau ona latou tutula’i, tuuese mea sa latou faia, ae o fa’atasi ma ia. O Simona, Aneterea, Iakopo ma Ioane; na fa’afuase’i lava ona tuua o latou olaga, o aiga ma nuu, aemaise le galuega faifaivasa ola ai, ae mulimuli ia Iesu. I na ona aso, soo se tagata ta’uta’ua e fai ni ona soo e mulimuli ia te ia, e filifili lava na’o le muliaa e a’oa’oina. A o Iesu, ua na’o ni tagata faifaiva ua ia mauaina. A o ia tagata faifaiva, na silafia e Iesu lo latou gafatia, aemaise o meaalofa a le Atua o loo ia te i latou, e mafai ai ona latou tala’i atu, faamalolo i e mama’i, ma a’oa’o atu e pei o ia. O le ala lea na valaau ai loa Iesu, ua tuu mea uma ae mulimuli ia te ia.

Tatalo: Iesu e, ia tatala o matou fa’alogo e lagona ai lau valaau e mulimuli atu ia te oe, ma ia matou iloa atu le mea lilo ua e manatu mai ai. **Amene!**

Aso Lua – Ianuari 16: “Tatalo, fa’amoemoega, ma tala’iga”

Tusi Faitau – Mareko: 1:35-45 (*Prayer, purpose and preaching*)

Matua – f. 38: “*Ona fetalai atu lea o ia ia te i latou, ‘Ina tatou o atu ia i aai e latalata mai, ia ou tala’i atu i ai le tala lelei, auā o le mea lea na ou sau ai.’*”

O le matua o lenei aso ua tatou iloa ai o Iesu ua leva ona nofo tapena mo le valaauina a lona Tamā. O ia o se tagata to'amalie ma malamalama lelei i lona tofiga. Ua iloa e Iesu le finagalo a lona Tamā oi le lagi, o lea na fetalai atu ai i ona soo, *"Ina tatou o atu ia i aai e latalata mai, ia ou tala'i atu i ai le tala lelei, auā o le mea lea na ou sau ai."* Ae fa'ape'i tatou? Ua tatou iloa le finagalo o le Atua mo i tatou? O se feau taua a o tatou feagai ma galuega o le vaiaso, tatalo ma saili i le Atua poo le a so tatou tofiga mo lana galuega tala'i i lenei lalolagi. Tatou saili i le malo a le Atua mo lona fa'aogaina o tatou tagata fa'atauva'a mo lona fa'aolataga tumau i lenei lalolagi.

Tatalo: Iesu e, ia matou lagonaina lou leo ma ia matou mulimuli i lou ta'ita'iga. Ia faia a matou upu ma mea e ala mai ai lou malo i le lagi. **Amene!**

Aso Lulu – Ianuari 17: "Faigauo, fa'atuatua ma le fa'amagaloga"

Tusi Faitau – Mareko:2-12 (*Friendship, faith and forgiveness*)

Matua – f. 5: *"Ua silafia e Iesu lo latou fa'atuatua, ona fetalai atu lea o ia i le supa, 'Lo'u atalii e, ua fa'amagaloina au agasala."*

O le talitonuga masani e fa'apea, e fesootai le ma'i ma le agasala; o lona uiga, afai na e ma'i, o loo i ai se agasala e le'i fa'amagaloina i lou olaga. E le o ta'ua mai e le tusitala le mafuaaga na ma'i supa ai le tamaloa, a o le silasila atu o le nuu ma e sa iai i lea itu aso, e mafua ona o le agasala a lenei tagata. Peita'i, ona o faigauo, o ē sa vaai i tua atu o le ma'i a le latou uo, o i latou ia sa avea'i le supa ia Iesu. Sa latou feomia'i ma le motu o tagata, ua latou a'e i luga o fale ma tau fa'aofi mai i luga o le tauluga. Ae sili ona faigata, o le "tau" tetee atu i talitonuga masani—e mafua ona ma'ima'ia ona o le agasala. Na fa'amuta e Iesu lea tulaga ina ua fetalai, *"Lo'u atalii e, ua fa'amagaloina au agasala."* Ua silafia e Iesu ua tuulafoa'iina lenei tagata ona o talitonuga masani sa sua'i le nuu. Lea ua vavae ese o ia mai i mea fai o le nuu, ae ua sili foi ona vavae eseina o ia mai i le Atua.

Tatalo: Iesu e, foa'i mai le vaai manino e iloa ai lou finagalo. **Amene!**

Aso Tofi – Ianuari 18: "Tagata-agasala, tagata-masalo-vale, ma le fa'aola"

Tusi Faitau – Mareko 2:13-17 (*Sinners, sceptics and the savior*)

Matua – f. 17: *"Ua lagona e Iesu, ona fetalai atu lea o ia ia te i latou, 'E le aoga le foma'i e malolo, na o e mama'i; ua ou le sau e valau i e amiotonu, a o e agasala."*

O le afio mai o Iesu i le lalolagi, e le'i afio mai e pei o se leoleo e tūtū mamao ma saili tagata solitulafono. O le afio mai o Iesu, ua sau e pei o se foma'i ua valaau i tagata mama'i ma tagata agasala ina ia latou o mai ia te ia e malolo ai. O le manatu lea a Iesu na tali ai le 'au faresaio na tuutaufōnō ia Iesu ma lana galuega, *"E le aoga le foma'i i e malolo, na o e mama'i..."*

O lenei soifuaga, e i ai taimi tatou te manatu fa'atauva'a ai i galuega a isi. Pei o le 'au faresaio na fa'afiaamiotonu ia Iesu ma lana galuega mo e mama'i ma e agasala, e iai foi taimi tatou te fa'aleaogā ai le tautua a nisi ona o tu ma aga masani sa tatou ola ai. O se fa'amanatu mai o le tusi faitau o lenei aso, ia tatou ne'i fa'afiaamiotonu fa'apei o le 'au faresaio, ma tatou faifai upu atu ai i e ua faia le finagalo o le Atua. O le finagalo moni o le Atua na faia ai le tagata, ina ia atagia mai i lalolagi lona alofa tunoa mo e agasala ma e ua mana'omia se fesoasoani.

Tatalo: Iesu e, poo fea lava e te iai e paia le eleele. Fesoasoani ina ia matou mulimuli atu ia te oe poo fea lava e te maliu atu i ai. **Amene!**

Aso Faraile – Ianuari 19: “Metotia, fe’au ma le fa’amatuatua”

Tusi Faitau – Mareko 2:18-22 (*Method, message and maturity*)

Matua – f.22a: “E le utufia foi e se tasi le uaina fou i fagu pa’u tuai; a fa’apea, e pāpā ai fagu pa’u i le uaina fou, ona masaa lea o le uaina, e māumau foi fagu pa’u.”

O le fa’ataoto lenei a Iesu o loo aumaia ai le ata o le uaina fou e utufia i le fagu pa’u tuai. O le masani fa’aSasa’e Tutotonu, e utu le uaina fou i le fagu pa’u fou e faamafu ai. E a la na faapea, e ‘aua ai ne’i pāpā fagu pa’u ma ma’umau ai le uaina i le taimi e faamafu ai ma fefete ai le fagu pa’u. O le ‘au faresaio ma nisi o le ‘au lutaia, sa taofi mau pea i faiga tuai fa’ale lotu lutaia, o le ata faatusa o fagu pa’u tuai. A o Iesu, o ia o le uaina fou a le Atua, e le talafeagai ma mea tuai a lutaia. E fiu lava e utu le uaina fou i fagu pa’u tuai, e pa lava le fagu pa’u. E tatau ona fa’afouina o tatou fagu pa’u tuai e utufia ai le uaina fou a le Atua, ina ia matua lelei mo le fa’aaogaina i lana galuega.

Tatalo: Iesu e, ia faia i matou ma fagu pa’u fou mo lau galuega. **Amene!**

Aso Toona’i – Ianuari 20: “Taofi, vaaiga ma tatalo”

Tusi Faitau – Mareko 2-23-28 (*Pause, perspective and prayer*)

Matua – ff. 27-28: “Ua ia fetalai atu foi ia te i latou, Ua faia le sapati mo tagata, a ua le faia tagata mo le sapati. Lenei la, o le Atalii o le tagata, o le alii lava lea o le sapati.”

O le tatou tusi faitau o loo aumaia ai le tala ia Iesu ma lona tali atu i le ‘au vaavaai vale i galuega lelei o loo faia mo isi, aemaise o le mafuaaga o le sapati a le Atua—sina taimi paia tatou te taofi ai fe’au ma galuega masani o le vaiaso, a o se taimi foi e malolo ai ma toe fuata’i ai le ola ma le malosi. O aso nei, ua amata ona vaaia le solo i tua o nisi i le tausia o le sapati o le Atua i le Aso Sā. E peisea’i a mae’a le sauniga o le faife’au i le taeao, ua mae’a ai foi ma le fa’amamaluina o le sapati, ae fa’aaoga le aoauli ma le afiafi e tafafao ai le paka ma le matafaga.

Sole e! Se’i vaai poo sa’osa’o na mea e te faia? Na faia le sapati mo le tagata, ae le i faia le sapati e fa’amalie ai le loto o le tagata. O le vaisapati o le vaitaimi pananoa e taofi ai au mea uma o fai ae mafaufau ma mafuta i le Alii e ala i le tatalo. O le taimi tonu lea e saili ai i le Atua so tatou vaaiga fou (*perspective*) i le olaga.

Tatalo: Iesu e, o oe matou te maua ai le malologa. Fa’afouina o matou tagata atoatoa i le mana o le Agaga; fa’amagalo lo matou soli sapati. **Amene!**

EVAGELIA A MAREKO (1)

2. Lūlūina o le saitō (*Sowing the seed*)

Aso Sā – Ianuari 21: “Tulafono poo le ola?” (*Law or life?*)

Tusi Faitau – Mark 3:1-12

Matua – f. 4: “Ona fetalai atu lea o ia ia te i latou, ‘Pe sa ea le agalelei i le sapati, po o le agaleaga; o le fa’aola, po o le fasioti?’ A ua latou fa’alologo.”

“O le ola i lona atoatoa,” o se tasi lea o sini autu o le galuega tala’i a Iesu. E leai se mea tasi e mafaia ona taofia e Iesu mai lona tuuina mai o le ola atoatoa; e le mafaia e tu ma faiga masani, e le mafaia e ni tusitusiga, e le mafaia foi e se faiga malo ona taofia. O le fa’amanatuina o le olataga i tagata uma, o le mea tāua lea mo Iesu. Ua finagalo Iesu e fa’amautinoa le olataga, e tusa lava pe soloia ai lalo tulafono a tagata, auā e sili atu lona alofa i tagata nai lo le tulafono. O le tusi faitau o lenei aso, fai mai o loo fa’atalitali le au Faresaio poo le a se tali a Iesu e uiga i le

tausia o le sapati, pe na te tumau i le faiga masani o le tausia o le sapati, pe na te fa'amaloloina le tagata ua gase lona lima ma soli le sapati. Ana filifili Iesu e tausia le tulafono, se manū e fa'aaloalo le 'au Faresaio ia te ia, ae iloa ai lona faafoliga. Peita'i, na filifilia Iesu e fa'amālōlō le ma'i, ma ua fa'aailoa i le 'au Faresaio, e sili le ola nai lo le tulafono Pe sili le tausia o le tulafono ae fano ai se ola? Ta te filifili ea e usita'i i le sapati nai loo le lavea'i o se soifua ua mana'omia le fesoasoani?

Tatalo: Ia fa'amamanaina i matou e le Agaga ina ia filifili ai le ola i le fa'amaloloina o tagata, ae le o le tulafono poo tu ma aga masani. **Amene!**

Aso Gafua – Ianuari 22: “Vaega’au a Iesu” (Team Jesus)

Tusi Faitau – Mareko 3:13-19

Matua – ff. 14-15: *“Ona tofia lea e ia le toatinoagafulu ma le toalua, ina ia latou fa’atasi ma ia, ina ia aauina atu foi i latou e tala’i le tala lelei; ina ia tuuina atu foi le pule ia te i latou, latou te tutuli ai temoni.”*

Se'i o tatou vaavaai i vaega 'au a Iesu, e eseese o latou talaaga ma o latou tuātagata. O Peteru ma Iakopo ma Ioane e fai paaga i le pisinisi fa'agota; a o Mataio o se tagata mautū i tulaga fa'aofisa. E eseese foi o latou taofi i le itu fa'apolokiki ma eseese foi o latou manatu fa'aletagata.

Ae ui o na mea uma, o le mea e tasi ua mafai ona tatou manino ai i le 'au soo filifilia a Iesu, o le alofa o Iesu e felanulanua'i (*diversity*). Ua filifili e Iesu tagata eseese e fausia ai lona malo, auā e felanulanua'i lona alofa mo tagata uma. Afai ua tatou manino i lea mea ia Iesu ma tagata sa ia filifili i ai, e tatau foi ona fa'apea le filifiliga a Kerisano ua ua soifua ma ola talitonu ia Iesu. Ia 'aua ne'i o tatou fa'aailoga lanu, a ia felanulanua'i lo tatou alolofa atu i tagata.

Tatalo: Le Atua e, fesoasoani mai ina ia fai i matou ma soo e fa'atūaina lou alofa felanulanua'i ma le fa'atuāoia. **Amene!**

Aso Lua – Ianuari 23: “Naunau ina ia ta’u seseina”

Tusi Faitau – Mareko 3:20-34 (A willingness to be misunderstood)

Matua – f. 21: *“Ua fa’alogo ai lona aiga, ona latou o atu ai lea e pu’e ia te ia; auā na latou fa’apea ane, ‘Ua valea o ia.’”*

Ua ta'u valeina Iesu e lona lava aiga ona o mea sa ia tautala ai, o tagata na ia filogia ai, fa'apea ma mea uma na ia faia. O le mea ua tupu, ua matuā suia e Iesu a'oa'oga o le tulafono sa sauai le nuu; ua vavae ese ai puleaga a ē na manatu fa'asausili o i latou lava o leoleo o le tulafono. Ana mulimulita'i Iesu o tulafono ma faiga masani fa'alutaia, se manū e leai se mea e pala ai fua o ia e le 'au Faresaio ma le 'au Satukaio mai Ierusalem, fa'apea ai le 'au Herotia.

Peita'i, ona o Iesu lava ia e filifili i le alofa moni, o lea na ia save'u le lau-faumālū a nei tagata maualuluga o le lotu Iutaia, ma ua ia talepe ai i lalo le pa o fevaevaea'iga. Ua fa'auo atu Iesu i ē ua tuulafoa'iina, ma ua fa'apotopoto i ē ua vavaeeseina e fausia ai le nuu amiotonu ma le aofia. I le avea ai ma Kerisiano i nei ona po, o se fesili: po ua iloa ea i tatou i lo tatou alolofa atu i tagata, po ua na'o a tatou aoaoga fa'avae ua ta'ua ai i tatou o Kerisiano? Atonu o le valaau lea mo lenei aso, ua tatou ola ea i le amiotonu ona o faiga masani poo ua tatou ola ea i le amiotonu ona o le alofa?

Tatalo: Agaga Paia e, ta'ita'i mai lau afio ina ia matou mulimuli ia Iesu Keriso ona o lona alofa; ia matou pulunaunau mo le alofa e ola ai. **Amene!**

Aso Lulu – Ianuari 24: “Fetina’iina” (Choking)

Tusi Faitau – Mareko 4:1-20

Matua – ff. 18-19: *“O i latou foi sa luluina i le vao tuitui, o i latou ia e na fa’alogo i le upu, a o le loto popole i mea a lenei lalolagi, ma le pepelo o le ola, ma le tu’inanau i nisi mea, ua oo atu i totonu o le loto, ua fetina’iina ai le upu, ona le fua mai lava lea.”*

Ua fa’amatala e Iesu le fetina’iina o le ola ma lona tuputupu a’e. O le vao tuitui ua ia fa’atusa i popolega a tagata i mea o le lalolagi, o le mailei o le tamaoai, ma le tu’inanau atu i isi mea. O le fetina’iina o tagata fa’alogologo i nei mea e taofia ai le upu mai le suia o tatou olaga. Ma o le upu moni, e i ai lona aafiaga tele ua sili atu nai lo tatou va ma le Atua. Ua le gata ona tatou lē avatua le ‘talalelei i ē matitiva’, a ua avea foi i tatou e pei o isi o le lalolagi; ua avea lava i tatou ma mea faigaluega e fa’atumauiina le matitiva o tagata. Na valaau i tatou e Iesu e amo lo tatou satauro ma mulimuli ia te ia. O le lalolagi fa’atau oloa i aso nei ua tosina mai ai i tatou i le mailei o le tamaoai, e ta’ua o le fia maumea. Afai tatou sailia lenei mea, pe tatou te avea le tupe ma sini e ta’ita’ia ai a tatou filifiliga, ua tatou fetina’iina so tatou avanoa i se mea e sili atu ona lelei: o le olaga i lona atoa-toaga”—mo i tatou lava ma i latou foi ua valaauina i tatou e auauna i ai.

Tatalo: Le Alii e, o mea uma o loo fetina’iina ai i matou, fesoasoani ina ia matou lafoa’i ese. Aumaia lou alofa matou te fa’atino ai lau galuega. **Amene!**

Aso Tofi – Ianuari 25: “Fa’ataoto i le tuugāmoli”

Tusi Faitau – Mareko 4:21-25 (The parable of the lamp)

Matua – f. 21: *“Ua fetalai atu foi o ia ia te i latou, ‘E au mai na ea se moli ina ia tuuina i lalo o le mea e fua a’i saito, po o i lalo o le moega? E le fa’atuina ea i luga o le tuugāmoli?”*

Afai o Iesu o le “Upu” a o ia foi o le lamepa, o fea ua tatou tuui ai lena lamepa? O le tuuina o le lamepa i lalo o le mea e fua a’i saito poo i lalo foi o le moega, o le upu moni e leai se malamalama tatou te maua mai ai. O le fa’amoemoega o le lamepa ia fa’aali atu le malamalama i le mea pogisa, o lea la e tatau ona tuu ai i luga o le tuugalamepa. Afai e le’o suia le olaga o se nuu i le Lamepa o Iesu, e foliga mai o loo tuu i lalo o se ato poo se moega le “Upu” o le Atua. E fa’apea foi, afai o le lamepa o le ola, o fea ua tatou tuu i ai lena ola? O le fa’amalieina o le loto a le tagata lava ia, e le o se fa’amoemoe lea o le ola. O le ola e tatau ona tuu i luga o se tuugalamepa, e fa’aalia ai le alofa ma le malamalama i le toatele o tagata o loo siomia i tatou. O le mea lena e tauoloa ma uigā ai le ola. O le ola e pei o se lamepa, ua fuafuaina e fa’amalamalama ai le ala mo isi. O le ofoina atu lea i tagata o le fa’amafanafanaga, ma le o fa’atasi ai ma i latou i o latou faigata ma vaivaiga uma.

Tatalo: Le Atua e, fesoasoani ina ia ou iloa o le Upu o le sulu lea i o’u vae ma le malamalama i o’u ala. O Iesu o ia lava o le ola o le lalolagi. **Amene!**

Aso Faraile – Ianuari 26: “Fa’apei o le fua o le sinapi”

Tusi Faitau – Mareko 4:26-34 (Like a mustard seed)

Matua – ff. 31-32: *“E tusa ia ma le fua o le sinapi; a totōina i le elelee, e sili ona laitiiti i fua uma e tutupu i le elelee. Pe a totōina foi, ona tupu ae lea, ua avea foi ma laau tele, ua sili i laau uma e afu, ua fai foi ōna la tetele, e mafai ai manu felele ona momoe i lalo o lona paolo.”*

Ua fa'amatalaina e Iesu i lenei fa'ataoto, o le fua o le sinapi e tupu tele ma e avea foi ma laau sili i laau afu uma o le vaomatua 'ina ia mafai e manu felele o le ea ona fai o latou ofaga i lona paolo'. O le fa'amoemoega o le sinapi e le na o le fua mai o fua e fa'aauau ai le fua mai ni laau e tele, a o le tāua ia saunia se malutaga ma ofaga mo meaola e mana'omia se nofoaga.

Atonu tatou te vaai atu i le ekalesia o se laau ua fuafuaina e fua mai ai ni fatu, po o se laau e fua mai e tausia ai i tatou. E mautinoa lava e tatau ona tatou auai i le tala'iga, fa'alauiteleina le tuputupu a'e ma le fa'aauau. O le mea moni e mana'omia e le ekalesia le fafagaina o tagata fa'atuatua i fua lelei ma a'oa'oga a Iesu. Ae masalo ona ua tatou punaunau i nei vaega ua tatou misia ai se isi itu o le ekalesia e pei ona fa'atusaina i le fua o le sinapi: o le ekalesia, e pei o le laau, e le na o tatou, ae mo soo se tasi ua mana'omia le fesoasoani.

Tatalo: Le Alii e, fa'afetai ona o lau ekalesia ua maua ai le ola. Fesoasoani ia matou iloa atu i latou e mana'omia se malutaga ma se nofoaga. **Amene!**

Aso Toona'i – Ianuari 27: "Vavao e Iesu le matagi" (*Jesus calms the storm*)

Tusi Faitau – Mareko 4:35-41

Matua – f. 39: *"Ona tulai lea o ia, ma na vavao atu i le matagi, ua fetalai atu foi i le vai, 'Fa'alologo ia, ina malū ia.' Ona mate lea o le matagi, i le ua matuā malū.*

O se aso fa'avaivai tele le aso o Iesu e pei ona aumaia e tala; o loo soloa'i pea ia te ia le motu o tagata aemaise o a latou mana'oga. Atonu sa fiafia le 'au soo e toe foi i se mea ua latou masani ai – folauvaa – ma mālōlō ai mai le to'atele o tagata. Ona taia lea o le latou vaa i se afa tele i luga o le sami; o se afa uiga ese sa sili atu i lo latou tomai faifaiva. Sa moe filemu Iesu i le taumuli, a ua lapata'ia o ia e le au soo i lo latou tulaga lamatia ma ua alalaga mo se fesoasoani. Ona vavao lea e Iesu le matagi ma fa'apea atu, 'Ina malū ia!' Na malū ai lea o le matagi ma 'ua matuā malū'.

O le talalelei lenei a Iesu ua valaauina ai i tatou. E le tatau ona tatou manatu fa'apito i lo tatou lava ola ma o tatou lava matagi ta'itasi; ua valaauina i tatou e auai fa'atasi ma Iesu i le fa'amalūina o matagi a nisi o tatou tuāoi ua mana'omia se fesoasoani. Ia tatou lavea'i tatou ma nisi o tatou uso a tagata o loo si'omia ai i tatou. O le filemu o Iesu o se filemu mo le foafoaga atoa, ae lē na o ni nai tagata filifilia. O le fa'aolataga ua ofoina mai e Iesu e fa'alauiteleina pea ma e aofia ai tagata uma. O le filemu na ofoina mai e Iesu ua avanoa mo le foafoaga atoa.

Tatalo: Le Atua e, ia matou fa'atāuina le ola mo tagata uma. **Amene!**

VALAAUINA (*CALLING*)

1. Tagata o le Tusi Paia ua Valaauina (*Biblical figures are called*)

Aso Sa o Tupulaga

Aso Sā – Ianuari 28: "Aperaamo, o le ulua'i o le toatele"

Tusi Faitau – Isaia 51:1-3 (*Abraham, the first of many*)

Matua – f. 2: *"Ia outou vaavaai ia Aperaamo lo outou tamā, ma Sara o le na fanaua outou; auā na a'u valaauina o ia a o toatasi, ma ou fa'amanuia ia te ia, ma fa'ato'a-teleina o ia."*

O le valaauina o Aperaamo, o le valaau a le Atua i le tagata e alu i le mea e lē mautinoa. E tatau ona tuua mea uma sa ia masani ai ae malaga atu i se nuu e na

te lē iloa. O Aperaaamo ua toeaina lava o ia, ma o lana avā o Sara e pa e le fanau. Atonu e sili atu ona faigofie mo i la'ua pe ana nonofo pea i le mea sa masani ma fiafia iai. Ae peita'i, na tali atu Aperaaamo i le valaau a le Atua e ala i le tula'i ma alu atu i le mea lē mautinoa, ma tuuina atu pea lana fa'amoemoe i le folafolaga ua faia e le Atua mo ia, e tusa lava pe foliga mai e matuā faigatā.

Ua fa'amanatu mai e le perofeta o Isaia, ia tatou manatua pea le valaauina a Aperaaamo, ma ia a'oa'oina ai tatou. Atonu o le fa'atuatua o Aperaaamo i le Atua, poo lona finafinau i mea faigatā, poo lona nofo sauni foi e uia ala faigata, atonu o mea ia tatou te maua ai se a'oa'oga lelei mo tatou lava olaga. O se fesili fa'atupu manatu: O a ni mea fitā e te fa'alogoina i lau lava folauga fa'ale-fa'atuatua?

Tatalo: Fesoasoani mai ia matou manatunatu loloto i lou valaauina. **Amene!**

Aso Gafua – Ianuari 29: “Samuelu, valaau a o tamaitiiti”

Tusi Faitau – 1 Samuelu 3:1-10 (*Samuel, called as a child*)

Matua – f.10: *“Ua afio mai le Alii, ona tu lea ma valaau, pei ona luai fai, Samuelu e, Samuelu e! Ona tali atu lea o Samuelu, Fetalai mai ia, auā o loo fa'alogologo atu lau auauna.”*

I le taimi a o tuputupu a'e le tama o Samuelu, sa le'i masani ona oo mai le afioga a le Alii i tagata. Sa itiiti foi le fa'amoemoe a tagata i le oo mai o le valaau a le Atua. E lē o se mea leaga la le fa'atuai ona iloa e Samuelu le valaau mai o le Atua ia te ia, aua e le masani ai i vaitaimi o Samuelu. E pei ona tatou faitau i le tala, na mana'omia e Samuelu le fesoasoani a Eli e iloa ai le mea o loo tupu.

A o tatou manatunatu loloto i lenei tala, e lelei foi pe a tatou mafaufau i le taimi na valaauina ai i tatou e le Atua i lana galuega. Masalo sa iai ni isi na faia le tiute o Eli i le fa'a'iloa mai o le siufofoga o le Atua. Pe masalo foi sa faia i tatou ma Eli i le fesoasoani atu i isi tagata e tali le valaau o le Atua. E tāua le tiute a Eli i le fesoasoani ai i tagata esese ina ia latou iloa le valaau o le Atua i lo latou ola.

Tatalo: Le Alii e, ia ou nofo sauni i lou valaauina i aso ua. Poo fea lava e te finagalo iai, o lou finagalo o lo'u loto lea. **Amene!**

Aso Lua – Ianuari 30: “Noa, valaauina e auauna” (*Noah, called to serve*)

Tusi Faitau – Kenese 7:1-5

Matua – f.1: *“Ua fetalai atu le Alii ia Noa, Ina ulu atu ia o oe atoa ma lou aiga uma i le vaa; auā ua ou iloa oe o le amiotonu i o'u luma i lenei tupulaga.”*

O le valaau a le Atua ia Noa e aofia ai ma fa'atonuga. E le na o le mulimuli, talitonu, ma talai atu le feau o le Atua i le lalolagi agasala; a ua tuuina atu foi ia te ia le galuega fauvaa, fa'atasi ai ma fa'amatalaga auiliili e fausia ai le vaa. O Noa na filifili e le Atua ona o lana “amiotonu”; ma ua fa'aali atili lana amiotonu i le faia o mea ua fa'atonu e le Atua e fai. O le tala ia Noa e atagia ai le tulaga e masani ona vaaia i totonu o le Tusi Paia, ma e foliga mai o loo fa'aaauu pea e oo mai i le taimi nei: e galulue faatasi le Atua ma lē ua valaauina i le faataunuu ana fuafuaga paia. Amata mai ia Noa e oo atu i le 'au Aposetolo o le Feagaiga Fou – e le'i tuulafoaiina e le Atua i latou na ia valaauina.

Tatalo: Le Atua e, fesoasoani ia ou iloa le ala ua e valaauina ai oute tautua ai lou finagalo paia. Foa'i mai lou Agaga e fa'ataunuuina ai lau galuega. **Amene!**

Aso Lulu – Ianuari 31: “Amosa, o se leoleo mamoe lotomaulalo”

Tusi Faitau – Amosa 7:14-17 (*Amos, a humble shepherd*)

Matua – ff. 14-15: *“Ona tali atu lea o Amosa ua fa’apea atu ia Amasia, Ou te le se perofeta a’u nei, ou te le se atalii foi o se perofeta; a o le fagamano a’u, ma le galue i sukamora. A ua avea a’u e le Alii sa ou mulimuli i le lafu mamoe, ma ua fa’apea mai le Alii ia te au, Alu ia, ina e vavalalo i lo’u nuu o Isaraelu.”*

O Amasia o le ositaulaga o Peteli, o le malumalu o tupu i lea vaitaimi i le talafa’asolopito o Isaraelu. Peita’i, na fa’ate’ia le aliali mai o Amosa ma vavalalo atu ai le pa’u o le malo o Isaraelu. Na tetee atu Amasia ia te ia ma taumafai e tulituli ese o ia; peita’i, e le’i alu ese Amosa pe suia ai foi lana fe’au ma le fa’aaliga a le Atua mo ia. Ioe! O Amosa e le’o se perofeta “fa’apitoa” e viia ai tupu i le suafa o le Atua; o ia ua na’o se leoleo mamoe lotomaulalo, a o se leoleo mamoe foi o loo nofouta i le mea na fa’alogo iai mai le Atua ma fa’amaoni i le valaau ua tuuina atu mo ia. E tusa lava pe matuia le finagalo tuusa’o o le Atua ua tuuina mai, ia tatou maua le lototele fa’apei o Amosa e tala’i ai le fe’au ma le fa’amaoni.

Tatalo: Le Alii e, foai mai le malosi e tala’i atu ai lou suafa, ma ia ou iloa ona faia le amiotonu ma le fa’amaoni e pei ona e valaauina ai i matou. **Amene!**

Aso Tofi – Fepuari 1: “Valaau ma toe valaau foi” (*Called and called again*)

Tusi Faitau – Iona 3:1-6

Matua – ff. 1-3a: *“Ona oo mai lea o le afioga a le Alii ia Iona, o le foi fa’alua mai lea, ua fa’apea mai, Ina tulai ia, ina alu i Nineva le aai tele, ma tala’i atu i ai le tala’iga ou te fai atu ai ia te oe. Ona tulai ai lea o Iona, ua alu i Nineva, e fa’apei ona fetalai mai o le Alii.”*

O loo manino le tala ia Iona e pei ona masani ai. Musu Iona e tali le valaau a le Atua e alu i Nineva. E pei ona fa’amaoni i upu o le matua o lenei aso, o le “foi fa’alua” mai lea o le afioga a le Atua ia Iona, ina ia tulai ma alu e fa’ataunuu le tala’iga i Nineva. E tolu aso na saisaitia ai Iona i totonu o le manava o le i’a, ina ia fa’atalitonu ai o ia e alu e fa’ataunuu le afioga a le Atua mo tagata o Nineva!

Ae aiseā ua telegese ai Iona e tali atu i le valaau a le Atua? Atonu e le’o le mea tāua lea mo lenei aso; ae pei ona faimai le autū, “Valaau ma toe valaau foi” – *“Called and called again”*. Ioe! O natura ia fa’ale Atua ua iloga ai Iona alofa mutimutivale. E tigā ona tatou fa’ataligatuli i le valaau mai o le Atua, a o le Atua e valaau ma toe valaau foi, e faaogaina i tatou e faia lona finagalo.

Tatalo: Le Alii e, foai mai le loto toa matou te tali atu ai i lau valaau ma ola ai i le Upu, e tusa lava pe ta’uvaleina matou i luma o nisi. **Amene!**

Aso Faraile – Fepuari 2: “Jeremia, valaau ma fa’aaupogaina”

Tusi Faitau – Jeremia 1:4-10 (*Jeremiah, called and empowered*)

Matua – ff. 6-7: *“Ona a’u fai atu ai lea, Aue, le Alii e le Atua, fa’auta, ou te le iloa ona tautala, auā o a’u o le tama itiiti.”*

E iai le gagana masani a nisi ua latou lagona le valaauina e tauave le molimau ia Keriso, aemaise o le valaauina i le galuega a le Atua. E foliga mai le manatu o le to’atele ma latou fa’apea mai, e le’i saunia latou mo le galuega, pe latou te fa’apea mai foi, ua laitiiti tele, pe ua matua tele foi; ua le lava le amio mama, pe le lava foi le faitau lelei o le Tusi; ua tele nauā a’u tiute, pe latou te fa’apea mai foi e manaomia sina taimi e saunia ai. Ioe! E lē faigatā ona tatou maua se mea e “alani” (*excuse*) ma alo ese mai ai i le valaau a le Atua. O le mea moni, ua leva ona

fa'afofoga le Atua i nei mau "alaniga" (*excuses*) a o le'i oo i le taimi o Ieremia. O le folafolaga tumau pea a le Atua i lana valaauina, e fa'atasi o ia ma i latou ua valaauina. E fa'aaupegaina foi i latou i mea uma latou te manaomia. O la tatou pito laau o le fa'alagolago ma le galue fa'amaoni.

Tatalo: Le Alii e, ia matou manatua pea lou alofa mai ma le tele o au meaalofa ua matou maua pea. **Amene!**

Aso Toona'i – Fepuari 3: "O le ausoo, valaauina e Iesu"

Tusi Faitau – Mataio 4:18-22 (*The disciples, called by Jesus*)

Matua – f.19: *"Ona fetalai atu lea o ia ia te i laua, 'Ina mulimuli mai ia ia te au, ou te faia oulua ma fai faiva i tagata."*

A iai se upu e tasi e fa'amatala ai le atoaga o le galuega tala'i a Iesu, o le upu "fa'anatinati". O le tala a Mataio, o Iesu o se tagata "fealualua'i." E le'i tumau o ia i se nofoaga e tasi. O le fa'anatinati o Iesu i lana tala'iga e atagia ai lona naunau ina ia fa'asoa i tagata uma. O lona fa'anatinati lava lea o loo atagia mai i le tatou tusi faitau i lenei aso. O le 'au uso e to'alua, o Simona ma Aneterea, ma Iakopo ma Ioane, ua latou tuua loa le mea sa latou faia ae mulimuli atu ia Iesu; ia fai faiva ai i tagata, ina ia fa'alogoina le valaau a le Atua i o latou lava olaga. Ona fa'aauau ai pea lava pea le fefa'asoa'i o le upu ma le fe'au seia o'o mai lava i o tatou laueleele. Ae e le tatau ona gata ai, a ia fa'aauau pea mo a tatou fanau ma tupulaga ma le lumana'i manuia o aiga, nuu ma le Ekalesia o le Atua.

Tatalo: Iesu e, a matou fa'alogoina lau valaau, ia matou tali atu fa'apei Peteru ma Ioane, ma alofa fesoasoani mai ina ia fanatinati ona matou tali atu. **Amene!**

VALAAUINA

2. Valaauina i tatou e le Atua (God calls us)

Aso Sā – Fepuari 4: "Vavae ese mo le talalelei" (Set apart for the gospel)

Tusi Faitau – Roma 1:1-6

Matua – f.1: *"O Paulo, o le auuuna a Iesu Keriso, na valaauina e fai ma aposetolo, ua tofia e tala'i le tala lelei a le Atua."*

Ua talitonu Paulo, o ia ua "tofia" ma "vavae ese" mo le talalelei. Ioe! E fa'apea foi tatou uma ua talitonu ma mulimuli ia Keriso, ua uma ona tofia i tatou mo le talalelei; peita'i ane, ua tuuina atu foi ia Paulo se galuega fa'apitoa mo tagata o nuuese. E pei o Paulo, e tumua'i tutusa tagata uma ua valaauina e mulimuli ia Keriso. Ae e pei foi o Paulo, e ao ona tatou galulue ma saili ta'ito'atasi i la tatou lava tofiga fa'apitoa ua vavaeese mai ai o tatou olaga mo le talalelei. Ia tatou fa'aaogaina o a tatou meaalofa tutasi e tautua ai le Atua ma lona finagalo.

Tatalo: Le Atua alofa e, ua e faia i matou uma ma lana lava meaalofa tutasi mai i lau Afio. Ia fa'aaoga ma le tatau mo le talalelei i lenei olaga. **Amene!**

Aso Gafua – Fepuari 5: "Auina atu e le Agaga ma le ekalesia"

Tusi Faitau – Galuega 13:1-5 (*Sent by the Spirit and the church*)

Matua – ff.2-3: *"O latou o auuuna i le Alii ma anapopogi, ona fetalai mai lea o le Agaga Paia, 'Totofi ia mo a'u o Panapa ma Saulo i le galuega ua ou valaauina ai i laua.' Ona anapopogi lea o i latou ma tatalo, ma fa'ae o latou lima ia te i laua, ona tuuina atu lea o i laua e o."*

O le ekalesia i Anetioka na fa'avaeina e tagata Kerisiano na sulufa'i i le aai ona sauaga. O loo filogia ai i totonu o lenei ekalesia o vaega eseese e aofia ai tagata mai nuu mamao ma nuu tulata, fa'apea ma tagata Iutaia ma o latou sui maualuluga o le faigamalo – e aofia ai perofeta ma a'oa'o o le tulafono. O se tasi o ta'ita'i o loo aofia ai i lea fa'apotopotoga o Panapa, o se ua leva ona fa'aalologia i le atu ekalesia lautele; o ia foi na auina atu fa'apitua i Anetioka e atiina a'e ma fa'amalosi 'au i le ekalesia (11:22). O loo iai foi ma le soo a Panapa, o Saulo, o le na valaaulia e Panapa e fa'atasi ma ia i Anetioka (11:25). O le fe'au tãua o loo fa'ailoa mai e Luka i lenei tala, o Saulo (poo "Paulo" i le gagana Eleni) sa le'i filifili i lana valaauina, a o le fetalaiga a le Agaga Paia na tofofi ai i la'ua ma Panapa. O le Atua e musumusumu ma valaau, ma o le galuega foi a le Atua o loo tatou galulue ai. Ae o le iloiloiga o le valaauina e le o se galuega a tagata taitoatasi, a o le atoaga o le 'au fa'atuatua.

Tatalo: Fa'afetai le Atua e, ona o lou valaau paia ua auina atu ai i matou uma e savavali fa'atasi ma lau Afio i ala uma o lou finagalo. **Amene!**

Aso Lua – Fepuari 6: “La'a fa'atasi ma le Agaga Paia”

Tusi Faitau – Kalatia 5:22-26 (*In step with the Holy Spirit*)

Matua – ff.25-26: *“Afai ua tatou ola i le Agaga, ia tatou savavali foi i le Agaga. Aua ne'i aveia i tatou ma e mitamita vale, aua ne'i feluiai, aua ne'i felosiai.”*

O se laau e lelei ma maloloina lona tausiga e mafai ona maua mai ai o fua lelei e tatou te aai ma fiafia i ai; o meaalofo ia na faia e le Atua a o foafoaina i tatou ma le lalolagi. O loo iai i totonu o fua o laau le fatu o le ola fou, e fua mai ai ni isi laau fou, ma ua fa'ama'ite ai le taaviliga o le ola ina ia tumau ma fa'aauau pea. E fa'apena foi i le fua o le Agaga. O nei uiga lelei e le o se auala tatou te paia ai, a o le fua mai o amioga o le ola e gatusa ai ma le Agaga. O fua na e mafai ai ona tatou iloa o loo tatou “savavali fa'atasi ma le Agaga o le Atua”.

A tatou fuaina mai o fua fa'aleagaga, tatou te luluina atu foi o fatu o le fa'atuatua i o tatou tuaoi: o fatu ia o le fa'amoemoe i totonu o se lalolagi ua tumu i le fa'anoanoa, ma le fatu o le alofa ia mili fa'atasi ma lotolotoi ai i le mea o loo i ai le inoino ma le fevaevaeaiga. O fua lena e aoga ona fuaina mai ma fa'asoa atu!

Tatalo: Agaga Paia e, ta'ita'i mai o matou ala uma ina ia fua mai ai ni fua lelei mo le malo a le Atua, ma ia tupu tele ai lo matou fa'atuatua i lou talalelei. **Amene!**

Aso Lulu – Fepuari 7: “Avea ma soo faigofie pe a'oa'o ina e ala i le faatino?”

Tusi Faitau – Mataio 11:25-30 (*Easy discipleship or learning from play?*)

Matua – f.25: *“O lea lava itu aso ua fetalai atu ai Iesu, 'Ou te fa'afetai ia te oe, lo'u Tamã e, le Alii o le lagi ma le lalolagi, ina ua e nanã ia mea i e popoto ma e atamamai, a ua fa'aalia atu ia mea i tama valevale.”*

Ua folafola e Iesu se malo fememea'i e aveia ai tama valevale ma e amoina le poto; o avega foi o galuega e maua ai le malologa ma le mapusaga. Masalo o le feau a Iesu e taoto i le natura o tama valevale. O le tamataitiiti lava ia e foliga mai e latou te maua pea le fiafia, poo a lava mea tigã o lenei soifuaga.

Masalo afai e mafai ona tatou faia le galuega o le malo ma le poto o se tamaitiiti, atonu tatou te iloa o le galue e maua ai le malologa. Afai e mafai ona tatou maua le fiafia i mea laiti ua mafai ona tatou ausia, atonu o le a fa'aitiitia ai le lagona faigatã o loo taoto mai i luma. Afai foi e mafai ona tatou tosina mai o ni

isi, ma ia ofoina atu iai le avanoa e avea ma soo, atonu o le a tatou iloa ai foi le tãua o le femafuta a'i, auã o le a fa'afaigofie ai le folauga o le tautua. I se isi fa'apuga, afa'i e mafai ona tatou vaai atu i le lalolagi e ala i fofoga o le Atua, e pei ona masani ai le tamaitiiti, atonu o le a faigofie le amo ma mama le avega, e tusa lava pe tele fa'afitauli.

Tatalo: Le Alii e, fesoasoani mai ina ia matou iloa le poto fa'atamaitiiti; ia matou maua le fiafiaga i galuega uma, e tusa lava pe tele fa'afitauli. **Amene!**

Aso Tofi – Fepuari 8: “Sau i totonu, alu i fafo” (*Moving in, moving out*)

Tusi Faitau – Isaia 45:22-25

Matua – f.22: *“Liliu mai ia ia te au, tou te ola ai, o outou tuluiga uma o le lalolagi; auã o a'u o le Atua, a e leai lava se tasi.”*

O le tatou tusi faitau o lenei aso, ua ofoina mai ai e Isaia se ata o le fegaoioia'i o le “Sau i totonu, alu i fafo” – o tagata e omai mai i *tulu'iga uma o le lalolagi*, ua liliu atu i le Atua ma tootutuli; o ē na mua'i teena le Atua ae ua omai ma le salamō. Ae i le taimi lava lea e tasi, e alu atu ai le upu mai le afioga a le Atua, a o le afioga e *lē toe fo'i mai lava*; o le mana foafoa o le Atua o loo auina mai ai.

Atonu e fa'apena foi lo ta valaauina mai i le Atua. E valaauina i tatou e liliu atu i le Atua i le salamō, lotomaulalo, vivii ma fa'afetai, a o taimi lava e tasi o loo auina atu ai foi e momoli le feau a le Atua i o tatou olaga, o upu, aemaise o ta galuega. Ua valaaulia i tatou i le opo a le Atua ma auina atu e fai le galuega a le Atua. Ua valaauliina i tatou e galulue fa'atasi ma le mana fegaoioia'i a le Atua; ia lē aunoa ona sau i totonu i le Atua, ia lē aunoa foi ona alu i fafo ma le Atua.

Tatalo: Le Atua o fa'amisiona, ia tosina mai i matou i totonu o lou alofa, ma auina atu e tala'i atu lou alofa; ia iai lau Afio i ala uma matou uia. **Amene!**

Aso Faraile – Fepuari 9: “Fetaua'iga poo le ola?” (*Revolution or survival?*)

Tusi Faitau – 1 Peteru 2:18-21

Matua – f.21: *“Auã na valaauina outou ona o lea lava mea; auã na tigaina Keriso lava mo outou, ua tuuina mai ai e ia le fa'aa'oa'o mo outou, ina ia outou mulimuli atu i ona tulagāaao.”*

O le tusi muamua a Peteru na tusia mo le 'au Kerisiano e fa'atauavaa i le vaai fa'aletagata ma lē taualoaina, aemaise ai lava mo ē ua sauaina ona o le fa'atuatua ia Keriso. E foliga mai o tagata ia e itiiti lo latou malosi ma e tulaga mauaulalo i totonu o nofoaga faitele; fa'apei o fafine ma pologa. I totonu o lea nofoaga i lea foi vaitau i Roma, o lou taliaina o Keriso o le Alii, o lou tetee atu foi lea i atua ma tapua'iga fa'a Roma. Ioe! Ua e tatalaina foi le avanoa mo le faitaga'i mai ia te oe ma lou aiga, ma e oo lava i le sauaina ai o lou ola. Ae peita'i, o auala fitā ia sa ui mai ai foi Iesu. O le alafua lea ona tusi atu ai Peteru, “onosa'i pe a tigaina outou a o amio lelei, o le mea lava lea e mālīe i le Atua ... auã na tigaina Keriso lava mo outou ... ia outou mulimuli atu i ona tulagā aao.” Ioe! E lē i'u vale lo tatou tautigā mo le tala lelei. O lo tatou valaauina o le iloa lea ona alolofa atu auã ua alofagia i tatou e le Alii; ia tatou fa'aa'oa'o ia Keriso auã e leai se mea itiiti pe sili atu foi.

Tatalo: Le Atua o le Alofa Tunoa ma le Alofa Mutimutivale, matou te tatalo mo i latou uma ua sauaina ma puapugatia ona o le fa'atuatua ia Keriso. **Amene!**

Aso Toona'i – Fepuari 10: “O le fa'amoemoe ua ala ai ona valaauina i tatou”

Tusi Faitau – Efeso 1:15-23 (*The hope to which we are called*)

Matua – f.18: *“Ia fa’apupulaina mata o outou lotou, ina ia outou iloa le uiga o le fa’amoemoe ua i lona valaau mai, ma le uiga o le faulaigamea lelei o i lana tofiga ua silisili mo le au paia.”*

Ua fa’ai’u lenei vaiaso i le mataupu tatou te talanoa ai i le “fa’amoemoe” ua ala ai ona valaauina i tatou. O le folafolaga o le toe afio mai o Keriso ua fuatino ai le tele o fa’amoemoega fa’aKerisiano i auala eseese, ma ua peiseai e tataua ona fa’atinoina o nei fa’amoemoega i lenei lalolagi. Fa’ata’ita’iga: ua iai nisi e manatu e tataua ona avea Kerisiano ma ta’ita’i o malo auā e silia ma le 90% o le atunuu o tagata Kerisiano. E foliga mai o le naunauta’iga e fa’aautu i puleaga ma malos’aga fa’alelalolagi, ina ia fa’ataunuu ai fa’amoemoega fa’aKerisiano.

A o le a’oa’oga ma le soifuaga o Iesu ua fa’aalia mai ai se malamalamaga e matuā ese lava i puleaga o loo tatou naunau iai. Na oo mai le mana o Iesu e ala i le alofa, tautua ma le lotomaulalo. O le fa’aega o le avea ma soo o Iesu, aemaise ai o lona “fa’amoemoe” ua ala ai ona valaauina i tatou, o le fa’aega o le faia lea o se sao e ala i le tautua. O le fa’amoemoe lea ua valaauina ai i tatou ma le malo ua tatou i ai nei—alofa, tautua, ma le lotomaulalo.

Tatalo: Le Alii e Iesu, ia faia i matou ma sui vaaia o lou malo e ala i lo matou alolofa atu, tautua ma le lotomaulalo. Ia matou faia lava ma le fa’amaoni. **Amene!**

Aso Sā – Fepuari 11: “O maa ma taulaga: o a mea e iloa ai le ekalesia?”

Tusi Faitau – 1 Peteru 2:4-8 (*Stones and sacrifices: what makes a church?*)

Matua – f.5: *“O outou foi, ia atiina ae outou pei o maa ola, o le fale fa’aleagaga, o le au ositaulaga paia, e avatu taulaga fa’aleagaga e mālīe i le Atua ona o Iesu Keriso.”*

E le o se falesā le “ekalesia” (*church*), a o le fa’apopotoga o tagata. E i ai taimi tatou te manatu mamafa ai i le fa’aleleia o falesā ma ia fa’atumauiina foi lona ilaila manaia, ae peita’i o le falesā na faia ina ia tautua i le “ekalesia”, ae le’o le isi itu. E ui i lea, o falesā ta’itasi i totonu o nuu ma afioaga, ua faia lea ma fa’ailoga o le auai o Keriso i totonu o tagata o lea nuu ma lea afioaga; o se fa’ailoga vaaia foi ua fai ma fa’amanatuga o loo talitonu ma tapuia pea le Atua. O le ala fua lea ua faigofie ai ona tatou avea le falesā ma ata fa’atusa i le ekalesia moni – o tagata e aofia i totonu o le fa’apopotoga.

O se fe’au taulogologo o le tusi faitau o lenei aso, a o se fa’amanatu foi mo i tatou uma, e le fausia se falesā i se maa e tasi, ae peita’i ane, o le aveesea o le maa e tasi mai le fa’avae o le falesā e fa’avaivaia ai lona malosiaga. E fa’apea foi ona tupu ia i tatou le “ekalesia” (*church*). E lē fauina se ekalesia i se tagata e to’atasi, e lē mausali foi le ekalesia aoao i se falesā e tasi. Ae e mana’omia le galulue uma o totino uma ina ia tumau ma atoatoa le Ekalesia o le Atua i le lalolagi.

Tatalo: Keriso e, ua e valaauina i matou e fai ma lou aiga paia i lenei olaga, alofa ma fesoasoani mai ia tumau lo matou fa’avae i le mana o lau Afio. **Amene!**

Aso Gafua – Fepuari 12: “Paaga paia i le valaau mai le lagi”

Tusi Faitau – Eperu 3:1-6 (*Holy partners in a heavenly calling*)

Matua – ff. 1-2, 6: *“O lenei, le au uso paia e, e ua tofutofusia i le valaau mai le lagi, ina mafaufau ia i le aposetolo ma le ositaulaga sili ua ta’uta’uina e i tatou...”*

O le valaauina, ua le o se mea e ala mai ona o i tatou, a o le Atua. O lona mua’i alofa mai ua ala ai ona tatou maua le valaau e fai ma ana mea faigaluega. E le o

so tatou fa'amaoni poo so tatou leleiga, a o lona alofa mai. O le toe fa'amanatu lea a le tusitala a Eperu. O lo tatou paaga paia mai le lagi, o Iesu lea, o ia ua mafua ai ona tatou auai fa'atasi i lona aiga e ala i levalaauina.

O se fa'amanatu lelei foi lea mo i tatou i amataga o feau ma galuega o lenei vaiaso. A tetele mai fita ma faigata o le olaga, ia tatou manatua e i ai lo tatou paaga paia o loo i le lagi. O lona mua'i alofa mai ua ala ai ona tatou maua fa'amanuiaga o le ola i lenei olaga, ma le ola atali. E leai so tatou lelei; e leai foi so tatou aga ua tonu i lana silafaga. A o lona alofa tunoa ua mafua ai ona valaauina i tatou e mona, ma fai mo i tatou lona malo tumau.

Tatalo: Le Atua alofa e, fa'afetai, fa'afetai tele lava i lou alofa. **Amene!**

Aso Lua – Fepuari 13: “Olaga e tatau ma le valaauina”

Tusi Faitau – Efeso 4:1-6 *(A life worthy of the calling)*

Matua – ff. 1e-3: *“Ou te aioi atu ia te outou, ia outou savavali ia tusa ma le valaau ua valaauina ai outou. Ia outou loto maulalo ma agamalu, ma onosai. Ia outou fa'apalepale le tasi i le tasi i le alofa. Ia taumafaia e outou ona taofi o le loto gatasi i la le Agaga i le noataga o le filemu.”*

O le valaau a le Atua o le mea e patino i lona alofa tunoa, ae le o se tau'i mo a tatou galuega. O le fatu lea o le feau o le talalelei, ae le o le i'u e pei ona tala'i e Paulo. I soo se valaaulina e i ai lona tali, ma o le alofa tunoa foi e lagona ai le agaga fa'afetai. O lea la, fa'apei ona lu'itauina e Paulo le 'au Kerisiano i Efeso, ia fa'apea foi ona tatou galulue fa'atasi i se “olaga tatau” e tusa ma lo tatou valaauina. E ui na tatou lagona le matāfaioi e tatau ma le tagata lava ia, ae peitai o le fa'amanatu mai o le tatou tusi faitau aso, o lenei soifuaga ua le aunoa ona tatou ola i taimi uma i le “vā” (*relationship*). O le olaga fai mai soo, o le soifua tautua lea ina ia fesoota'i fa'atasi o ō tatou tagata ma le lautelega, fa'apea ai foi ma le si'osi'omaga. O lou soifua tautua atu lea mo isi, o le olaga tatau lea ma le valaauina a le Atua.

Tatalo: Le Atua e, ia matou iloa ona ola e tusa ma lou valaauina. **Amene!**

O LE TALA TELE (THE BIG STORY)

Auivi o le Tusi Paia (Bible Framework)

Aso Lulu Lefulefu

Aso Lulu – Fepuari 14: “O le Atua o le alofa lava ia” (God is love)

Tusi Faitau – Kenese 2:1-17

Matua – ff.15-17: *“Ua ave foi le tagata, e le Alii le Atua, ma ua tuu ia te ia i le fa'atoaga i Etena e galue ai ma leoleo ai. Ua fetalai atu foi le Alii le Atua i le tagata, o loo fa'apea atu, O laau uma o i le fa'atoaga e te 'ai ai. A o le laau e iloa ai le lelei ma le leaga, aua e te 'ai ai; auā o le aso e te 'ai ai e te oti ai lava.”*

O le taumafaiga e tuu fa'atasia ni vaega eseese e le o manino poo fea e fesootai ai, o se gaoiga e faigatā tele. E pei o le paso a tamaiti, e alu se taimi o tau mafaufau pe fa'apefea ona tuu fa'atasi. A o se fa'atinoga e ese le matagofie, pe a oo ina uma ona tuu fa'atasia; ona vaai atu lea ua lelei. O le fesootaiga o le Tusi Paia ma le soifuaga i nei ona aso e lē faigofie ona fai. Ae tatau lava ona amata mai le amataga, ina ua faia e le Atua le lagi ma le lalolagi, atoa ai ma le tagata. Na ave foi e le Atua le filifiliga sa'oloto i le tagata, pe ola mafuta ma le Atua, pe tuto'atasi. O le Aso Lulu Lefulefu o le amataga lea o le vaitau e to manatu ai i le o'o atu o Iesu

i le satauro. O le aso foi lenei o le 'Valentines Day' e faailoa atu ai lou alofa i lou manamea. E talafeuga mea ia e lua: o le alofa o le Atua na faia ai le tagata; o le alofa foi o le Atua e faasoa atu ai le tagata na ia faia.

Tatalo: Fa'ailoa mai auala matou te fa'ailoa ai lou alofa. **Amene!**

Aso Tofi – Fepuari 15: “O le alofa na te aumaia le filifiliga”

Tusi Faitau – 1 Korinito 13:1-7 (*Love gives us a choice*)

Matua – f.4: *“E onosai le alofa, e agamalu, e le losilosilosi le alofa, e le mitamita vale le alofa, e le fa'afefeteina...”*

O le fuaitau lenei e mafai ona faamatala ai le alofa na ulua'i faia i le amataga, i le tane ma le fafine ua tasi. E masani foi ona fa'aaoga i fa'aipoipoga e fa'amatala ai le mafutaga e tatau ona fa'ananau i ai le ulugalii fou. Auā o le Atua o lē na mua'i alofa ina ua uma ona faia o le tagata. Afai e onosa'i ma agalelei le alofa, e fa'apena foi le Atua. Afai o le alofa e tumau i mea uma ma onosai, o le Atua lava lea. Afai e lē tausisi i le alofa i ona ala, o lona uiga e lē o le Atua, a o le tagata.

Ioe, e i ai taunuuga o filifiliga e tatou te faia, ma ua fa'ailoa mai e le Atua i latou mai le amataga, i le filifiliga na fa'atino e le ulua'i tagata. I se taimi mulimuli ane, na ta'uta'ua ai Mose i luma o tagata le filifiliga i le vā o le 'ola ma le oti', ma lu'itauina i latou e 'filifili le ola' (Teu30:19). Ae e ui lava e i ai taunuuga i a tatou filifiliga, ae ua tuuina mai e le Atua i a'i tatou le mamalu o filifiliga, auā o loo naunau le Atua 'ina ia alofagia i tatou i a tatou filifiliga.

Tatalo: Le Alii e, na e aoaoina i matou i le tatalo 'ina ia faia lou finagalo'. Fesoasoani mai ina ia matou filifili ma le alofa. **Amene!**

Aso Faraile – Fepuari 16: “O filifiliga sesē e i ai taunuuga”

Tusi Faitau – Kenese 3:1-13 (*Wrong choices have consequences*)

Matua – f.3: *“a o le fua o le laau o i totonu o le fa'atoaga na fetalai mai ai le Atua, Aua ma te aai ai, aua foi ma te papai atu i ai, ne'i ma oti.”*

E ma'eu lava le tāua o le Tusi Paia o loo i ai tala e tau i le Atua, nai loo isi tala o loo fai mai i ai tagata. Auā o tala o le Atua e iloa ai le lelei ma le leaga. Lea na fa'ailoa ai e Eva le poloa'iga e uiga lea i le laau e 'aua foi ma te papa'i atu i ai'. O fautuaga lelei, e leai se masalosalo, ae o le filifiliga na afua ai le fenumua'i o lagona i le fautuaga a le Atua, ma ua maua ai le avanoa o le filifiliga sesē.

O le ave a o le tagata e pei o le isi atua, o se mea lelei? Sa le usiusita'i Atamu ma Eva ona ua le mautonu lo la fa'aiuga, ma ua pei i laua o le isi atua. Ona laua fa'afitia lea o le afioga a le Atua. A o lea sa fa'amautinoa e le Atua le sootaga malamalama, e pei lava ona a'oa'oina ai e matua le fanau ina ia latou iloa lelei, le taua o le ola usiusita'i. O filifiliga lelei ia na lu'itau ai le mafutaga vāvā lālata a le tagata ma le Atua. Ae ua fa'aseseina ona ua filifili i le fa'aletonu.

Tatalo: Le Atua alofa mutimutivālē, o a matou filifiliga faia pea i lea taimi ma lea aso, ia fa'aali mai ia i matou le tāua o le tumau i le lelei. **Amene!**

Aso Toona'i – Fepuari 17: “Tuueseeseina ma le fa'aseseina”

Tusi Faitau – Kenese 3:14-24 (*Separation and distortion*)

Matua – ff. 14-15: *“Ona fetalai atu lea o le Alii le Atua i le gata, E sili lou malaia i manu vaefa fanua uma, ma manu vaefa uma lava o le vao, ina ua e faia lena mea; e te sosolo i lou manava, o le efuefu e te 'ai ai i aso uma o lou ola; ou te fa'atupuina*

le faitagai ia te oulua ma le fafine, o lau fanau foi ma lana fanau; na te tu'imomomoina lona mulivae."

O le aina ma le lē aina o fua o le laau e iloa ai le lelei ma le leaga. Ua manatu ai le tagata soifua e faia le filifiliga mamā e fa'avae i luga o latou lava malamalama nai lo le galue fa'atasi ma le Atua. E pei o le tamā i lona atalii, sa fa'amoemoeina le atalii e a'oa'o le sa'o ma le sesē e ala i le mātāuina o fa'atinoga a le tamā. Ae fai e Atamu ma Eva o la'ua lava manatu e uiga i le lelei ma le leaga i fafo atu o lea mafutaga ma i'u ai i le vavae ese o i laua ma le mafutaga ma le Atua.

E fa'apefea ona tali le Atua? O le tali a le Atua na faia ai lona finagalo, e ala i lona alofa e fa'amaoni lea i le tagata. Na tapena ai le isi laasaga o le ola taumafai o le tagata e ala i le fa'aleleiga. O lea fa'aleleiga na sasaa atoa ai foi le fai mea lelei o le Atua, ina ia iloa e tagata lona malamalama. Ua tatou iloa ai foi, e i ai lava mea lelei ma mea leaga, e lu'i ai le ola taumafai. O mea leaga ma lelei, ua tuu fa'atasia e le Atua, e avea ma fa'amoemoe ola i o tatou tagata.

Tatalo: Aumaia lou malamalama matou te susulu ai lou finagalo. **Amene!**

Aso Sā – Fepuari 18: "Sa mafaia lava e le Atua ona fa'aumatia tagata"

Tusi Faitau – Kenese 7:17-24 (*God could have destroyed humanity*)

Matua – f. 17: "*Sa i ai foi le lolo i le lalolagi i ona aso e fagafulu; ua fa'atuputeleina le vai, ma ua opeopea ai le vaa, ua neetia foi i luga o le elelee."*

Ua le o gatasi le futia ma le umele i fuafuaga a le Atua mo se lalolagi e mafai ona olioli ma ola fiafia ai le tagata, talu le ulua'i agasala. Ua sosolo fa'aafi le amio leaga. Ua leai se ola fealolofa'a'i na finagalo ai le Atua mo lana foafoaga, ae na'o le faitaga'i ma le fetaua'i, aemaise le fasioti tagata, e pei ona faia e Kaino ia Apelu. O le a se tali atu o le Atua i ia fa'afitauli ua tula'i mai i le lalolagi ona o le ulua'i agasala? O le tala i le lolo – o le tali lea a le Atua.

A o le fesili, o le a se vaaiga e tatau ona tatou vaai ai i lenei tala? Pe le o se ata ea lea i le fa'amasinoga tonu a le Atua ma lona pule aoao e fa'asala ai le tagata agasala? Pe tatau ona tatou vaai i le tala o se ata o le fa'amamāina, fa'afouina, ma le amataga fou ua toe afua e le Atua mo le fa'aolaina o tagata mai le agasala?

O le tala i le foafoaga i le Kenese 1, faimai na taofi e le Atua le vai ma tuele i tua le sami, ona maua ai lea o le elelee matutu. O le manatu o tagata i vaitaimi o le Tusi Paia, o le vai ma le sami e nofo ai le leaga. O lona uiga, o le taofiga o le vai, o le ata foi lea o le taofiga e le Atua o le leaga; ma fa'aitiitia ai le aafiaga o le agasala i le tagata. Peita'i, o le oo mai o le lolo, o le ata lea ua le toe taofia e le Atua le vai ma le sami. O lona uiga, o le a inu le tagata i aafiaga atoa o lana agasala.

E ui o se ata tau faafefe, o le mea manaia e pei ona ta'ua i upu o le matua, e i ai le fa'amoemoe ola: o le tagata amiotonu, ua opeopea i luga a'e o le lalolagi ma neetia i luga i le mea na faia i le laau, e mafai ona fa'aolaina soo se tasi e talitonu.

Tatalo: Le Alii e Iesu, fa'afetai ina ua avea le agasala, e fa'amamāina ma fa'aolaina mai i'uga sili o le agasala. **Amene!**

Aso Gafua – Fep19: "E lē mafai e le Atua ona teena lo latou agasala"

Tusi Faitau – Kenese 11:1-8 (*God could not ignore their sin*)

Matua – ff. 5-6: "*Ona afio ifo lea o le Alii e silasila i le aai ma le 'olo ua faia e tagata. Ona fetalai ane lea o le Alii, Fa'auta, ua tasi le nuu, e tasi foi le gagana ia te i latou*

uma; ua amata foi i latou ona fai lenei mea; o lenei foi, e le toe taofia i latou ise mea e tasi ua latou manatu i ai e fai."

E pei o le tala i le lolo, sa mafai e le Atua ona fa'aaoga lona malosi e fa'aumatia ai lalolagi talu ai le olo a Papelu. Ae semanu lona alofa, na fa'afouina ai mea ua fa'aletonu. O le sailiga o le loto salamō e ala i lona alofa, e tumau e fa'avavau. Ae faiaina pea le tagata i le fa'amauuluga o lona loto. Na aveese e le Atua lona aao mo le puipuiina o le lolo, e taofiofi ai le faia o le agasala i le lalolagi. O le ata ma le fa'amoemoe, e fa'ailoa atu i augatupulaga e fia matai; e lē fultitia le Atua i le agasala. O aafiaga ma filifiliga o agasala na fa'aeese ai e le Atua a latou gagana ('o le upu Papelu 'lē maotonu'). Ua le fesoota'i fuafuaga a tagata ma le Atua. A o se fa'amoemoega e fanau mai ai le salomō ma filifiliga tatau.

Tatalo: Le Alii e, fa'afetai ona o lou alofa e lē liliu ese lea mo i matou, tusa lava pe matou te fa'atigā ia te Oe. E te alofa lava i o matou vaivaiga. **Amene!**

Aso Lua – Fepuari 20: "O le togiolaina e le Atua" (God will redeem)

Tusi Faitau – 1 Korinito 13:8-13

Matua – ff.11-12: *"O ona po na ou itiiti ai, na ou tautala ai fa'atamaitiiti, na ou manatunatu fa'atamaitiiti, na ou filifili fa'atamaitiiti; a ua oo ina ou tagata matua, ona ou tiai lea o mea a tamaiti. Auā o ona po nei tatou te vaavaai ai fa'anefu i le fa'aata, a o ia ona po tatou te fesagai ai; o nei ona po ou te iloa ai fa'aleatoa, a o ia ona po ou te iloa tino ai, pei ona iloatinoina o a'u."*

O le Atua e aoao lona pule ma lana fa'amasinoga, e lē liuliu lava ia e tusa ma lona lava finagalo. Peita'i, o lona alofa ua lualuga lea. E pei ona taua mai e Paulo, i le fa'amaonia o le satauro, o le alofa foi e fa'atumauiina ai mea uma. E tauave uma tigā, ma faigatā. Na filifili e tagata le oti, ae teena e le Atua le fouvale ma le taupulepule, ina ne'i tumau ai le tagata i le oti.

A tatou vaavaai i le tala o le foafoaga, o loo tatou tilotilo i se fa'ata nenefu. O le ata o fanau i matua, e fa'alogogatā. A e a tutupu loa ta'uvalea, tauasoa lea e matua le tigā, ma fai ma ie pupuni e ufiufi fa'aletonu o fanau. E tele uiga o le soifuaga e fana'e mai ma mou atu, a o le alofa ua fai ma fa'avae papa e tumau i le eleele e le mafai ona ati ina, o le fa'aolataga lea o le Atua e fa'avavau.

Tatalo: Le Tamā e, ua malu i matou i lou alofa silisili ese. A ia fesoasoani pea ina ia matou fa'atino lou alofa mo tagata o loo tumau pea i le itulagi tuai. **Amene!**

Aso Lulu – Fepuari 21: "O tagata i se nofoaga[1]" (A people in a place)

Tusi Faitau – Kenese 11:27-32

Matua – f.31: *"Na ave foi e Tara lona atalii o Aperamo, ma Lota le atalii o Arana, o le atalii lea o lona atalii, o Sarai foi le avā a lona atalii, o le avā lea a lona atalii o Aperamo; ona latou o atu lea ma i latou ai Uro i Kaletaia, o le a o atu i le nuu o Kanana; ona latou oo lea i Karana ma nonofo ai."*

O le fa'apolopolo o ananafi auā taeao. O le tapenaga a le Atua e le'i fa'atagā tapena. Na le'i fa'atoetoe se ola mo ni masei. A o le sasaa fa'aoti o le Atua fai mea sili, na lalaga ai le manumalo ina ua alia'e le faia'ina. O le fa'ataapeapeina o tagata na latou faia le olo, na ō malaga ma taunuu i Uro i Karana, na fa'atuai ai ona taunuu i Kanana. O le tali manino o lea tala, e le'i taunuu le faigamalaga i Kanana. Aisea? E lē mafai e le tagata ona iloa atoatoa fuafuaga a le Atua. Peita'i, o le fa'apolopolo lea a le Atua na fa'aalia ia Aperamo. Na faia ai le feagaiga fa'amaoni

i le manuia mo le lumana'i. E le o Tara le mafuaaga o le lē taunuu o tagata i Kanana, a o le fa'atoetoe a le Atua ua uma ona tapena mo ona tagata.

Tatalo: Fa'afetai i lou alofa e lotolotoi fa'atasi ma ē loto momomo. **Amene!**

Aso Tofi – Fepuari 22: “O le tulafono” (*The law*)

Tusi Faitau – Esoto 24:9-18

Matua – f.18: *“Ua alu foi Mose i totonu lava o le ao, ua alu ae foi i le mauga; sa i ai Mose i le mauga i ao e fagafulu ma po e fagafulu.”*

Taumafai le Atua e aumai tagata i se nofoaga latou te faailoa atu ai o ia i le lalolagi, ina ia mafai ona latou taliaina o ia pe a oo i le taimi e afio mai ai. A ua avea tagata ma pologa i Aikupito. Na ulufale ai Mose i le lalolagi ma soifua a'e i le lalolagi i le ituaiga tagata Eperu ma Aikupito. O lea, ina ua silasila le Atua i faiga fa'alētonu o tagata, na fa'aaogā loa Mose e tuuina i ai le mana e fa'ato'ilalo tagata sauā. I se taimi mulmuli ane, na tuuina atu e le Atua ia Mose le tulafono.

O le tulafono e fai ma tā'iala mo tagata; e iloa ai e tagata o le Atua lava lea 'o le ola'. Sa faigofie le taliaina ma le taulotoina o le tulafono, a ua avea ma auala e fa'ateteleina ai le pogisā, auā ua latou iloa le tulafono ae lē malamalama ai. O le tulafono e faasino i le ola. O le ola, o le mea e patino i le Atua. E pei ona fetalai le Atua ia Mose, 'o a'u o lē ola, o loo ola lava' (Esoto 3:14). O le olioli ma le alofa, o se vaega e aupito i sili lea ona tāua e fia silasila i ai le Atua.

Tatalo: Le Atua e, fa'afetai i le malamalama ua matou maua. **Amene!**

Aso Faraile – Fepuari 23: “Na teena le fuafuaga” (*The plan rejected*)

Tusi Faitau – 1 Samuelu 8:4-20

Matua – f.5: *“Ua latou fai mai foi ia te ia, Fa'auta, ua e toeaina oe, o ou atalii foi la te lē savavali i lou ala; o lenei, ia e tofia se tupu mo i matou e fa'amasino ia te i matou, pei o nuu uma.”*

O fuafuaga a le Atua, o le tuuina lea o tagata i se nofoaga e fausia ai mafutaga ma ola i ala e fa'aalia ai le Atua, e iloa ai e tagata uma o loo soifua pea le Atua. O fuafuaga lava ia mai le amataga. Peita'i, toetoe lava a motusia ma fa'aleagaina e tagata. Na tā'ita'i e Mose tagata ma fa'ataunuuina e Iosua fuafuaga a le Atua i le laueleele o Kanana. Ae fa'auta, ua alaga tagata e fia pei o tagata o isi atunuu, e fai so latou tupu. O fuafuaga ia a le Atua, lea ua teena e tagata. Ae ui i lea, a tatou vaavaai ma maitau le gasologa o le soifua. O filifiliga sa'oloto na tuuina e le Atua i le tagata, lea ua avea ma vaivaiga fa'aletagata. O le tāua o le tuana'i, e fa'atonutonu ai le lumana'i. O le sailiga o se tupu, e fa'atūta'ia ai le ola fiafia. O tatou ua valaauina e fai ma auauna mo le Atua, ae lē o le fia atua.

Tatalo: Le Atua paia e, ia fesoasoani i o matou manatunatuga. O lo matou o ese i ou ala, ua sesē ai o matou fuafuaga. **Amene!**

Aso Toona'i – Fepuari 24: “E aoga le fuafuaga...mo sina taimi”

Tusi Faitau – 1 Tupu 10:1-13 (*The plan works ... briefly*)

Matua – f.9: *“Ia fa'afetaia le Alii lou Atua, o le na finagalo ia te oe e fa'anofo ia te oe i le nofoālii o Isaraelu; auā ua alofa le Alii ia Isaraelu e lei aunoa, ua na fai ai oe ma tupu, ina ia e faia fa'amasinoga ma mea tonu.”*

A'auai le Atua, e mautinoa le taunuu o tatou fuafuaga. O fuafuaga ua o fa'atasi ma le loto gatasi. O le alofa ua fusia i le galulue fa'atasi. O mafutaga e fa'atusa e

pei o se ulugalii ua tuu fa'atasia ina ia tasi. O fuafuaga ua taunuu ma le finagalo o le Atua. O galuega fa'atino a le tagata, e fa'ailoa tino atu ai le Atua. O mafutaga e fa'aalia ai le Atua auai, e lotolotoi, ma i ai i soo se taimi. O le masiofo o Seepa, na alu a'e ma fesili ia Solomona, ae tali Solomona e uiga lea i le potu na foa'i e le Atua. Ona fa'agaaetia lea o Seepa i le matagofie o le tamaoaiiga ua maua e Isaraelu. Ona fo'i lea o Seepa, ma taula'i i le alofa o le Atua.

Tatalo: Fa'afetai le Alii e, auā e te fa'ataunuu lava 'ou fa'amoemoega uma. Fesoasoani i a'i matou ina ia matou mafai ona mafuta ma lou Agaga. **Amene!**

Aso Sā – Fepuari 25: “Ua vaeluaina le malo” (*The kingdom divided*)

Tusi Faitau – 2 Nofoaiga a Tupu 36:11-20

Matua – f.16: *“A ua latou fa'atauemu i e na aauina mai e le Atua, ma ua 'ino'ino i ana afioga, ma ua ula i ana perofeta, ua oo ina tupu le toasa o le Alii i lona nuu, ua oo ina leai se fofo.”*

O loo fa'ailoa mai e le Tusi Paia, o le Atua le Tamā, le Alo, ma le Agaga Paia, o perosona ua fusia e le alofa ma ua tasi ai le Atua. O le ata foi lea o le alofa e fa'avae ai le fa'aipoipoga: e to'aluā, a o le alofa ua ua avea ai ma tasi. O mea e tele ma mea eseese, a o le alofa e tasi ai – o le ata moni lea o le Atua. O le mea lea e avea ai le “alofa” (shalom) ma se tasi o autu aoao o le Tusi Paia. A leai se alofa, o lona uiga ua fevaevae'i; ua leai se lotogatasi; ua leai foi se molimau ola i le Atua ma ana fa'amanuiaga mo nuu uma, e pei ona valaauina i tatou e talaiina.

O le vaeluaina o le Malo, o le vaitau lea ua mavae ese ai le alofa o le Atua ma lona nuu, e pei ona molimau le tusitala o Nofoaiga a Tupu i lana talafa'asolopito. O le agasala o nofoaiga tupu e tulai mai, fa'atasi ai ma le agasala o le nuu. Ua leai se alofa e toe maua le lotogatasi, talu le agasala o le nuu ma lona vaeluaina.

Tatalo: Le Atua e, fesoasoani mai ina ia matou ola fa'atasi i ou ala. **Amene!**

Aso Gafua – Fepuari 26: “Fanau o le moemitiga” (*Children of the dream*)

Tusi Faitau – Salamo 126:1-6

Matua – ff. 1-3: *“Na fa'afoisia mai e le Alii o Siona nai le tafeaga, ona tusa ai lea o i tatou ma tagata ua fai a latou miti. Ona tumu ai lea o tatou gutu i le featani, ma o tatou laulaufaiva i le leo fiafia; ona latou fa'apea ane lea i nuu ese, Ua faia e le Alii mea tetele mo i latou. Ua faia e le Alii mea tetele mo i tatou; ua tatou fiafia ai.”*

O a ni fuafuaga a le Atua i le taimi nei? Sefulu ma le lua ituaiga o le nuu o Isaraelu na fa'ataapeape ina. O nisi na totoe ai, ua ave fa'apagota. O le Atua ma lona alofa e tumau lava lea e le to'ilalo. O lana tofā sasaa, e iloa lea i soo se taimi, aso, ma le tausaga. E pei o le matua moe pō, e moe alaala, e manatunatu i le lumana'i, ina ia manuia fanau. O loo manino mai le fai-Salamo o lagona ua oo ifo i tupulaga fou. Ua fiafia ma latou alalaga. E pei o le pagota, ua lau lona iuga, ua sa'oloto. Ua totogo a'e le lotu le fa'afetai, ma le agaga meemee, i le Atua ma lona alofa auai pea. O moemitiga o matua i fanau, ia manuia, ae lē o le malaia.

Tatalo: Le Alii e, ia foa'i mai le mautinoa, matou te talitonu ai i lau Afio o le Atua o le ola. Ia matou tumau pea i le amiotonu, a e lē o le fa'aletonu. **Amene!**

Aso Lua – Fepuari 27: “E afio mai le Atua, ae lē iloa”

Tusi Faitau – Ioane 1:1-14 (*God comes, but isn't recognized*)

Matua – f.14: *“Ua liu tino tagata le Upu, sa mau foi o ia ma i tatou, na matou matamata i lona mamalu; o le mamalu lava lea o le Alo e toatasi o le Tamā, ua tumu o ia i le alofa tunoa ma le fa’amaoni.”*

O itu tino o le tagata e iloa ai le auai mai o le Atua, e pei o le loto. O le mafaufau e fetuuna’i ma saililili, o le itu tino lea o loo fa’agaioia atoa le tino. E galulue fa’atasi le mafaufau ma le Atua. O fuafuaga a le Atua, o loo galue fa’atasi ma lona alofa fa’amaoni. O le alofa lea na fa’ailoa ai o Ia lava e ala i le fa’amaoni. E afio mai le Atua ma galue fa’atasi ma ona tagata. O le afio mai o Iesu i le lalolagi, lea na galue fa’atasi ai ma le tagata. Ona finau lea o tagata ia te ia. Ua latou fa’afiti ma molia e oo le oti. O lona uiga, o le Atua sa galue ma le tagata i le amataga, se ia oo ina ua liu tino tagata, a e le’i taliaina o ia e tagata. Pe aisea? O le afio mai o le Atua i le lalolagi, e lē tau fa’aalia. Peita’i, o le fuafuaga ua uma ona tapena e ao ona fa’ataunuu. O le pogisa na ufitia ai le tagata, ua fa’amalamalamaina e le Atua.

Tatalo: O lou fa’aali mai ua suluia ai i matou i lou malamalama. **Amene!**

Aso Lulu – Fepuari 28: “O fa’atoaga e lua” (Two gardens)

Tusi Faitau – Ioane 20:11-18

Matua – ff. 14-16: *“Ua ia fai atu na upu, ona fāliu lea i tua; ona iloa atu lea e ia o Iesu ua tu mai; a e lei iloa e ia o Iesu lava lea. Ua fetalai atu Iesu ia te ia, ‘Funa e, se a le mea e te tagi ai? O ai ea e te sailia?’ A o le fafine, fa te ia o le leoleo ia o le fanua, ua fai mai ia te ia, ‘Le alii e, afai ua e ave ese ia te ia, ta’u mai ia ia te au po o fea le mea ua e tuuina ai o ia; ona ou aveeseina lea o ia.’ Ua fetalai atu Iesu ia te ia, ‘Maria e,’ Ona fāliu lea o ia, ua fai mai ia te ia, ‘Raponi e!’ (o lona uiga, Le a’oa’o e).*

Ua i o tatou luga e taimi taua i le talafa’asolopito i le fa’atoaga muamua (Etena). Na filifili Atamu e tutoatasi mai le Atua, ma ua teena ai le alofa. Ua afio mai Iesu o ‘le Atamu mulimuli’ i le isi fa’atoaga (Ketese mane), ma na ia tatalo ‘*aua le faia lo’u loto a o lou finagalo*’ (Luka 22:42). O filifiliga, e valaaulia ai o ia lava o le taunuuga o le alofa fa’amaoni. O le filifiliga la o Atamu, na tatalaina ai e Iesu le avanoa e toe maua ai se sootaga po o se faiā ma le Atua o le alofa. O le mealilo uiga ese lea i le alofa o le Atua. O le fa’avaa telē na fa’amatala ai le taua o le togiola. E lē gata mo le atulaulau, ae mo oe ma a’u. O fuafuaga nei na suia ai foi le to’ilalo i le amanaiaina. O Iesu lava lea na fetalai, ‘ia outou manuia.

Tatalo: Iesu e, e lē mafai ona matou malamalama i le satauro. A ua mafai ona matou malamalama i le alofa ina ua e fa’amalamalama ina i matou. **Amene!**

Aso Tofi – Fepuari 29: “O tagata i se nofoaga” [2] (A people in a place)

Tusi Faitau – Galuega 2:14-21

Matua – f. 17: *“O ona aso e gata ai, o loo fa’apea mai le Atua, e iu ina ou liligi ifo ai lo’u Agaga i luga o tagata uma lava; ona perofeta mai lea o outou atalii ma o outou afafine, e iloa fa’aaliga e o outou taulelea, e fai miti foi o outou toeaina.”*

Ua iloa e le au soo ua toe tū Iesu. Ua manatu o le a fa’aaogaina e Iesu lona mana e tulia ai fafo tagata Roma ma amata lana nofoaiga i le lalolagi. Ae leai! Ina ua mavae nai aso, ona ave lea o i latou i le mauga ma fa’afou le poloaiga na tuuina atu i Etena. Ona sau ai lea ma lona fa’amatalaina o le fa’atumuina o le lalolagi ma le pule. O lea la, ua faia e pei o le o atu o le ‘ausoo i le lalolagi ma fai tagata uma lava ma soo. E lei maluelue lava le fuafuaga a le Atua. Na toe tofia ai i tatou i lea lava matāfaioi; ia ave ma tagata ua autasia i le alofa, e fa’ailoa atu ai le Atua. O

lea ua auina mai ai le Agaga e fa'amalosia i latou uma, o Iutaia ma Nuuese e tutusa uma. O le Agaga Paia, na te fa'amalosia i tatou i a tatou filifiliga, ia fa'ale-Atua ona fai, ne'i ta'usalaina i tatou.

Tatalo: Le Agaga Paia e, ia fa'amalosia i matou i o matou filifiliga fai. Ia matou faamoemoe i le musumusuga o lau Afio Agaga Paia. **Amene!**

Aso Faraile – Mati 1: “O le faletua o Keriso” (The Bride of Christ)

Tusi Faitau – Fa'aaliga 19: 6-9

Matua – f.7: *“Ia tatou fiafia ma olioli, ma tuu atu le viiga ia te ia; auā ua oo mai le tausamaaga o le Tamai Mamoe, o lona faletua foi ua saunia o ia e ia.”*

I le Tusi Paia atoa, o loo fa'aoga ai le ata o le fa'aipoipoga e fa'ailoa mai ai le tulaga o le mafana o le alofa o loo finagalo ai le Atua mo tagata uma. I le tusi o Ioane, o le vavega muamua lava o loo fa'amauiina o le fa'aipoipoga i Kana. O loo tautala Ioane e uiga i se tama'ita'i fa'aipoipo, ua pupula i ofu matagofie, ma mama. Ua sau o ia e fa'afetaiai i le ua naunau iai ina ia fa'atasi ma ia e fa'avavau.

O le olioli lea na tautala ai le tusitala Eperu ina ua ia fa'apea mai, ona o le olioli na tuu i ona luma na onosai ai Iesu i le satauro. Peitai e matuā fa'anoanoa lava mo i latou e le iloa le fa'ato'āfaiaivā po o ē e le o sauni pe a sau o ia. O le mafuaaga lena o fuafuaga e pei ona sa i ai, e le o le fesoasoani i tagata ia iloa le Atua i le taimi muamua na afio mai ai, ae mo le taimi e toe afio mai ai.

Tatalo: Le Aalii e, ua matou moomoo mo lena aso o le fa'aipoipoga, ina ia fa'ataunuaina ai o matou fa'amoemoga uma, ma iloa ai lou alofa. **Amene!**

Aso Toona'i – Mati 2: “Mae'a Fuafuaga” (The plan complete)

Tusi Faitau – Fa'aaliga 21: 1-7

Matua – f.3: *“Na ou fa'alogoa foi i le leo tele mai le lagi, ua fa'apea mai, “Fa'auta, ua i ai le afioga o le Atua fa'atasi ma tagata, e mau foi o ia ma i latou; e fai i latou mona nuu, e ia te i latou le Atua lava.”*

E le o se mea tatou te ofo ai, i le vaaiga lautele na amata le tusi paia i le foafoaga, ae toe fa'aiu i le toe foafoaina ma ua fa'afouina mea uma. Fa'atasi ai ma le laou o le ola ua avanoa mo tagata uma ma atunuu, atoa ma aai saogalemu ua fa'afouina ma fa'aolaolaina i le ogatotonu. O se vaaiga matagofie o leona ma tamai mamoe ua lotogatasi, o se nofoaga e leai se fefe leai se puapuaga, o se nofoaga e mafai ona savavali fa'atasi ai tagata ma le Atua.

Ua valaauina i tatou e faia lenei malo ia moni i le lalolagi, e pei ona toe foafoaina. E tatau ona tatou tausia i latou o e fetagisi, fa'amalolo i e mamai ia tuuina atu i tatou e pei ona tuuina atu Iesu o ia lava ina ia ola ai isi. Ia lima foai ma fa'aaloalo i mea ua tuuina mai ia i tatou. E pei o tamai mamoe e nonofo i lalo ma leona, ina ia aumaia le malamalama o le fou ma le tuai. ina ia mafai e tagata uma ona tepa i mea o le a tupu, ma talia i totonu o latou loto.

Tatalo: Fa'afetai mo le Tusi Paia ua maua ai upu o lou alofa tunoa. **Amene!**

TOE FAUSIAINA I NEEMIA (1) –

Rebuilding in Nehemiah

Aso Sā – Mati 3: “O se aai nutimomoia” (A broken city)

Tusi Faitau – Neemia 1:1-2:10

Matua – 2:4-5: *“Ona fa’apea mai lea o le tupu ia te au, ‘Se a ea le mea e te manao ai?’ Ona ou tatalo atu lea i le Atua o le lagi. Ona ou fai atu lea i le tupu, ‘Pe afai e lelei i le tupu, afai foi e te alofa i lau auaua, ia e auina atu a’u i Iuta, i le aai o i ai tuuga-mau o o’u tamā, ia ou toe faia.”*

Ina ua mavae le tele o tausaga i lalo o le pulega a Papelonia, na fa’ataga ai e le Tupu o Peresia tagata Iutaia e toe foi i lo latou nuu moni ma fausia lo latou aai. Na maua e Neemia le tala e fa’apea, o pa o Ierusalemua ua soloia i lalo, ma o tagata na toe foi o loo feagai ma puapuaga ma feteenaiga mai vaega o loo siomia ai.

Na matuā ootia le loto o Neemia i lenei tala, ma na fa’aosofia lona fia foi e fesoasoani i le toe fausia o pa o le aai. Ina ua fesiligia e le tupu, e lei tali vave Neemia, ae na tatalo. Fesiligia muamua le finagalo o le Atua, ae le o le finagalo o le tupu o Peresia. O le mea tonu lea na manuia ai le galuega a Neemia i le toe fausia o pa o le aai e ui i le tele o fa’afitauli sa afea ai – na muamua fesiligia le finagalo o le Atua e ala i le tatalo. O le Atua e toe fa’aleleia ai mea ua nutimomoia.

Tatalo: Matou te avatu le fa’afetai mo i latou ua naunau e tutula’i ma taulamua i le fausiaina ma toe fa’aleleia o tatou nuu ma Ekalesia. **Amene!**

Aso Gafua – Mati 4: “Faataoto fuafuaga fai” (Making plans)

Tusi Faitau – Neemia 2:11-3:5

Matua – 2:17: *“Ona ou fai atu ai lea ia te i latou, Ua outou silafia le malaia ua ia te i latou, ua fa’atafunaina Ierusalemua, ma ona puipui ua susunu i le afi; o mai ia, ina tatou faia le pa o Ierusalemua, aua ne’i fa’alumaina pea i tatou.”*

E lei soona alu Ieremia i Ierusalemua, sa ia taumafai e fa’apotopoto ma tuufa’atasi se aufaigaluega ina ia toe faia le galuega o le aai ua fa’aleagaina. Sa ia taumafai ini aso se tolu e toe iloilo mea na fa’aleagaina e pei o pa ua solo, o faitotoa ua nutipalaina pei ona fa’aleagaina i le afi i tausaga ua mavae.

O le taimi foi lena sa fa’asoa atu ai ana fuafuaga i taitai o le malo ma i latou sa auai. Sa iloa e Neemia o ana fuafuaga o loo auai le Atua i mea uma na te faia. O le mea lea na manaomia ai tagata e iai agavaa ma taleni mo le toe fausiaina o pa puipui o Ierusalemua. O se galuega faifa’atasi, “Omai tatou fausia le pa o Ierusalemua” O Eliasipo, le faitaulaga sili, sa ia faia se fa’ataitaiga sili mo i latou o loo iai agavaa e fesoasoani ai i le galuega.

Tatalo: Matou te tuuina atu le fa’afetai mo i latou o loo iai le tomai ma taleni, ua faia ai se suiga i tagata ma nuu o loo nonofo ma galulue ai. **Amene!**

Aso Lua – Mati 5: “Galulue fa’atasi” (Working together)

Tusi Faitau – Neemia 3:6-21

Matua – ff. 8-10: *“Ua ati e aupito ane ia te i laua o Usialu le atalii o Haraia, o le au tufuga fai mea auro. Ua ati e aupito ane ia te ia o Hanania le atalii o le tasi o le au fai mea manogi; na tuua foi e i latou o Ierusalemua ua oo i le pa lautele. Ua ati e aupito ane ia te i latou o Refaia le atalii o Huro, o le alii e pule i le tasi itu o Ierusalemua. Ua ati e aupito ane ia te i latou o Ietaia le atalii o Harumapu, i luma foi o lona fale. Ua ati e aupito ane ia te ia o Hatusa le atalii o Hasapenia.”*

Ina ua savavalia le aai, sa iloa e Neemia le mea e muamua fai, pei o faitotoa e sefulu o le aai, e vaivai pe a oo i le taimi e osofai mai ai e le fili. Sa iai ni fesoasoani mai isi atunuu ma itumalo lata ane sa latou avane auro e fesoasoani ai i le galuega fa’atasi ai ma i latou. O se ata lea o le omai fa’atasi o se aiga, nuu, poo se Ekalesia

e opogi se fa'amoemoe ma galulue fa'atasi ina ia mautu ma fa'aleleia ni mea ua malepelepe ma fa'aleagaina. Ae ose ata foi o loo aumai i le tala a Neemia o le toe fa'amatagofie o le aai, ina ia toe fiafia ai tagata e omai ina ua uma ona fausia ona puipui mo lo latou saogalemu ona ua leva ona leiloa ma taase i isi nuu.

Tatalo: Musuia i matou e avea ma tuaoi e alolofa atu i isi. **Amene!**

Aso Lulu – Mati 6: “Manu a’e le ‘au tetee” (Opposition surfaces)

Tusi Faitau – Neemia 4:1-18

Matua – f.1: *“Ua fa’alogo e Sanepalata ua matou atia le pa, ona ita lea o ia, ua matuā tiga lava, ua ia tauemu foi i sa Iutā.....?”*

O tagata uma e le fiafia i suiga, ma e masani lava ona tatou fa’alogoina i totonu o Ekalesia. O nisi taimi tatou te lagona ai ua le amanaia o tatou tulaga i fuafuaga fai. I le faitauga o le aso, o tagata mai nuu tuaoi ua le fiafia ina ua latou vaaia le toe fausia o pa o Ierusalem. O se suesuega a le au elieli, e tusa ma le 2.7 mita le mafiafia o pa a Neemia. Pe a feagai ma fuafuaga fai ae teena e nisi, e taua lo tatou aloese mai ai ne’i tupu ai se fa’alavelave. A ia tuu i le Atua e ala i le tatalo e pei ona fa’atino e Neemia ma fa’asaolotoina ai i latou e le Atua mai lima o le fili.

Tatalo: Le Alii e, ia e fesoasoani mai, ia matou mataala i manatu sese ma lagona o isi, ina nei avea ma pa pupuni i o matou olaga. **Amene!**

Aso Tofi – Mati 7: “Fesoasoani ia i latou o loo manaomia le fesoasoani”

Tusi Faitau – Neemia 5:1-19 (Helping those in need)

Matua – f.18: *“O mea foi nei na saunia i lea aso ma lea aso, o le povi e tasi ma mamoe lelei e ono; na saunia foi ma a’u o manu felelei; e taipoagafulu foi ma uaina eseese uma e tele; e ui foi i lea ou te lei faiatu ia aumaia le mea e ai a le alii e pule, auā sa mamafa le galuega i lenei nuu.”*

O se fa’anoanoaga i le olaga o loo tatou ola ai i totonu o aiga, nuu ma le Ekalesia, o fa’afitauli e leai se fofo. E le fa’apea e tupu ona o le fa’atamala po o le le amanaiaina. O lenei mataupu ua fai ma taitaiga a Neemia ua ta’ua ai i tatou e auuina atu ma le lē manatu fa’apito, ae fa’amuumua manaoga o isi nai lo o tatou lava manaoga. E lei fa’aaoga e Neemia lona tomai ma lona iloa e saili ai sona lelei, sa ia tautala e uiga ile amiotonu, sa ia ola ai foi i ana filifiliga i aso uma.

Lea foi ua fa’amanatu mai i le tala le mana e suia ai le taitaiga e fa’avae i le fa’amaoni, agalofa ma le lotomauualalo. O gaoioga a Neemia ua valaauina ai i tatou e iloilo a tatou lava matafai oi fa’aletaitai, i totonu o aiga fale faigaluega, poo nuu. Tau ina ia musuia i tatou e auuina atu ma le alofa ma saili le finagalo malie o le Atua nai loo manatu fa’aletagata. Ia atagia fofoga o le Atua i mea ua tatou faia.

Tatalo: Fa’amagalo i matou i le amanaiaina o matou uso, **Amene!**

Aso Faraile – Mati 8: “Au tetee ma tala tau faasese”

Tusi Faitau – Neemia 6:1-19 (Opposition and false rumors)

Matua – f.8: *“Ona alu atu lea la’u feau ia te ia, ua fa’apea atu, E leai ni mea ua faia e pei o ia mea ua e faimai ai, a ua e fatu fua ai i lou lava loto.”*

Na fa’asalalau e fili o Neemia, o Sanepalata ma Gesemu, o tala fa’apea o ia ma tagata lutaia o loo fuafua e fouvale ma saili le tofi tautupu. O nei tuuaiga pepelo na taumafai e taofia le fa’amaeaina e Neemia o le toe fausia o le pa. E pei ona fesaga’i Neemia ma ia togafiti taufa’a’ole’ole, e fapena ona tatou fesagai foi ma

pepelo e taumafai e fa'aliliuese i tatou mai fuafuaga a le Atua. Ua fa'amautu mai mo tatou le taua o le fa'autauta, fa'amaoni ma le taulai pea i le finagalo o le Atua, e mafai ai ona tatou fausia ni fa'avae malolosi mo lo tatou fa'atuatua ma ausia ai galuega ua ia tuuina mai ia i tatou. Avea le fa'aaoga a Neemia e unaia ai i tatou e tutu ma tetee atu i le taufa'asese, ae ia tatou ola male fa'amaoni.

Tatalo: Le Atua o le fa'amasinoga, matou tatalo ina ia manumalo le upu moni i soo se taimi e taumafai ai le tagata e fa'avaivai mo lo latou lava manuia. **Amene!**

Aso Toona'i – Mati 9: “O le fa'alapotopotoga” (A gathering)

Tusi Faitau – Neemia 7:1-7

Matua – f.5: *“Na tuuina mai e lo'u Atua i lo'u loto e fa'apopototo i alii, ma faipule, ma le nuu, ina ia tusigafaina i latou e tusa ma o latou tupuga. Na ou maua foi le tusi o gafa o e na o ae i le amataga, ona ou iloa lea o loo tusia i ai, ua fa'apea,”*

O le tala ia Neemia ua tatou maua ai se malamalamaaga i le auala e galue ai le Atua, a o lenei malamalamaaga o loo aumai ai le folafolaga o le toefuataiina o Isaraelu i lo latou lava laueleele. E le fa'apea na' o talosaga ma le tomai o Neemia na mafua ai, ae ala mai foi i le tupu o Peresia ma tagata faigaluega sa fesoasoani i le nuu. Ua tusia e Neemia le faitau afe o tagata na toe foi mai Papelonia i Ierusalem pe a ma le ivasefulutolu tausaga talu ai, o latou sootaga fa'aleaiga ua fai ma fa'avae o ana fuafuaga pe a nofoia. Atonu e le talafeagai, ae sili atu lona taua o le iloa o tagata moni o le nuu. E tele gafa o loo maua i tusitusiga paia, ma o nei mea uma e fai ma fa'amanatu o le alofa o le Atua mo tagata uma.

Tatalo: Le Atua alofa e, matou te avatu le fa'afetai i tagata uma sa avea ma fa'atuatuaaga ao matou malaga fa'atasi. **Amene!**

TOE FAUSIAINA I NEEMIA (2) –

Rebuilding in Nehemiah

Aso Sā – Mati 10: “Faitau e Esera le tulafono” (Ezra reads the law)

Tusi Faitau – Neemia 8:1-18

Matua – f.3: *“Ona ia faitau ai lea i le malae o i luma o le faitotoa o le vai, e afua i le aoauli, i luma o tane ma fafine, ma e atamamai; ua uai mai foi taliga o le nuu uma i le tusi o le tulafono.”*

E le taumate le vaivai o tupulaga i nei ona aso e faitau ma fa'alogologo i le Tusi Paia. O le masani i Aso Sa, a mae'a le sauniga o le taeao ma le tona'i i le aoauli, e o le fanau e fai le faitauga Tusi Paia. Peita'i, toatele aiga ua le o toe faia lea mea. A le fa'asagasaga le fanau i le TV i aoauli o le Aso Sa, ua omiomi le telefoni ma fealua'i solo i luga o le upega tafailagi.

O le mea lea e maofa ai le loto pe a faitau atu i le tusi faitau o lenei aso, ma le taimi na alu ma le fa'alogologo toto'a o tagata, a o faitauina e Esera le tusi tulafono mai le taeao seia oo i le aoauli. Faimai le tala, o tagata uma, e oo lava i fanau, na fa'alogologo i le faitau a Esera. O le fa'alogo o le aiga atoa i upu mai le Afioga a le Atua, o le amataga lea o suiga lelei i totonu o aiga, nuu, ma le Ekalesia. O le feau o lenei aso ina ia tatou fa'alogologo, ma fa'asoa atu le Afioga a le Atua i tagata uma, ae amata i lou aiga ma lou nuu.

Tatalo: Le Alii e, fa'amolemole foa'i mai le alofa tunoa e fa'alogo ai ma talia lau afioga e le aunoo, i le suafa o Iesu. **Amene!**

Aso Gafua – Mati 11: “Taimi o le salamo” (*A time of repentance*)

Tusi Faitau – Neemia 9:1-8, 32-38

Matua – f. 3: *“Ua latou tutū i luga i le mea na latou i ia, ma ua latou faitau i le tusi o le tulafono a le Alii lo latou Atua o le tasi ona vaega e fa o le aso; o le isi ona vaega e fa foi ua latou ta’u atu a latou agasala, ma ifo atu i e Alii lo latou Atua.”*

O le fa’apopotoina o Isaraelu e fa’alogo i le tusi o le tulafono, na fa’aauua pea i totonu o Neemia, ma o lenei fa’apopotoga na taitai atu ai i le salamo o le nuu. O i na sa amata ai ona toe fetuunai o latou ala ma mafaufau i le afioga a le Atua. A o tutu tagata e faitau leotele le afioga a le Atua, na fa’aosofia ai lo latou malamalama i ai, ma o lea na taitai atu ai i le iloaina o lo latou le atoatoa. Lea na iu ai i le tautau atu o a latou agasala. E faigofie lava ona aveesea o tatou mafaufau mai le Alii, ma e iloa foi ua tatou o ese mai ana fuafuaga ma lona finagalo, pe afai e le ogatusa o tatou ala ma le upu. E leai seisi auala e sili atu nai lo le gauai atu i le afioga a le Atua. A maea ona faitauina le upu ona lagona lea o le loto salamo, e pei ona tupu i le nuu o Isaraelu e fa’apena foi ona iai i o tatou olaga i aso nei.

Tatalo: Le Alii e, fa’apupulaina o’u mata i lau afioga ma lo’u loto i lou finagalo, ina ia mafai ona toe fa’aleleia o’u ala. **Amene!**

Aso Lua – Mati 12: “O se maliliega ua ausia” (*An agreement reached*)

Tusi Faitau – Neemia 10:28-39

Matua – f. 38: *“E i ai foi le faitaulaga o le fanauga a Arona i sa Levī, pe a talia e sa Levī o mea e sufulu a’i mea; e aumai foi e sa Levī o mea e sufulu a’i le sefulu o mea i le fale o lo tatou Atua, i potu o le fale oloa.”*

Sa i ai i tagata o le Atua se tali tulaga ese i le tulafono a le Alii. Sa latou malilie e tuuina atu i latou lava i le galuega a le Alii, ma ola ai i o latou olaga i se auala e fa’amuamua ai le Atua, ma lana galuega pe a oo i a latou tupe maua. I le avea ai ma se alii talavou i se lotu papatiso, sa ou malamalama ai i le mataupu fa’avae o le sefuluai o se tulafono. Na ou ioe atoatoa e tuuina atu o la’u sefuluai i le Alii, o se vaega o lo’u tiute tauave fa’akerisiano i le maota o le Atua o loo o’u auai i ai. E le fa’apea ona o se tulafono e tataua ona usitaia. Ae o le matafaioi ma le tali atu i mea ua foaina mai e le Atua mo au i aso uma o lou ola.

Tatalo: Le Alii e, foai mai ia te a’u se loto lelei e tali atu ai i lau afio, ma fa’aaoga lelei la’u foa’i faifaipea i lou fale i le suafa o Iesu. **Amene!**

Aso Lulu – Mati 13: “O tagata na nonofo ai” (*The settlers*)

Tusi Faitau – Neemia 11:1-4, 20-36

Matua – ff. 22-23: *“O le na pule foi i sa Levī i Ierusalemā, o Usi le atalii o Pani, o le atalii ia o Hasapea, o le atalii ia o Matania, o le atalii ia o Mika. O le fanauga a Asafo, o e pepese na pule i latou i le galuega i le fale o le Atua. Auā o le poloaiga a le tupu ia te i latou, ia fai le vaega o mea e a’i a e pepese i lea aso ma lea aso.”*

E finagalo le Atua i le auala e nofoia ai ona tagata i le nuu na ia fuafuaina mo i latou. A o fa’amautu Isaraelu, sa fa’atalitali le ‘au sã Levī e nonofo fa’atasi ma isi ituaiga e fesoasoani ia i latou ma latou tapuaiga. I le faitauga o le asō, o nisi tane na o atu i le aai, ao nisi na fa’amoemoe e nonofo i fafo o le aai. O se tasi o tagata sili ona tauā i le tala sa faitauina o Usi, o se taitai o le au sa Levī i Ierusalemā. Sa tulagaese foi lona tulai mai i le maota o le Alii. E le gata ina ta’ua o ia o se tagata nofoia ae fa’apitoa foi ona o lana auunaga sa faia totonu o le nuu.

Tatalo: Le Alii e, ia fa'apupulaina o'u mata e vaai atu i le nuu e te finagalo oute nofo ai fa'apea foi male galuega ua e tuuina mai ia te au e fai. **Amene!**

Aso Tofi – Mati 14: “Sauniga o le tuuina atu” *(A service of dedication)*

Tusi Faitau – Neemia 12:27-47

Matua – f.43: *“Ua latou osia foi i lea aso o taulaga e tele, ma ua latou fiafia; auā ua fa'afiafia le Atua ia te i latou i le fiafia tele; o fafine foi ma tama na latou fiafia, ua lagona foi le fiafia o Ierusalema i mea e mamao atu.”*

Na ta'ita'i e Neemia le nuu o le Atua i le galuega o le fausiaina o le pā, ona fa'aiu ai lea i le lolafolaina o le upu ma le tapuaiga. O le sauniga o le agaga fa'afetai ma olioli, sa fa'alogoaina le alaga o le fiafia ma le olioli mai se mea mamao.

O lenei mea na fa'amanatu mai ai ia te au le taimi ao ou tuputupu ae, e masani ona alu matou talaiga i isi nuu tuaoi mo ni nai masina. I nai tausaga na sosoo ai sa fausia ai loa ma fa'atu ai le matou Ekalesia i lea nofoaga mo tagata lautele. Sa fa'apaiaina le fale ma auai uma ai tagata o le nuu, ua pepese ma olioli foi tagata sa matamata ai. A tatou faitaulaga ma olioli i le Alii, o le a avea i tatou ma auala e tosinā mai ai nisi ia keriso ma avatu ai le viiga uma i le Atua.

Tatalo: Le Alii e fesoasoani mai ia te au ina ia gauai atu i tapuaiga. **Amene!**

Aso Faraile – Mati 15: “Toefuataiina e Neemia” *(Nehemiah's reforms)*

Tusi Faitau – Neemia 13:1-14

Matua – f.11: *“Ona ou finau atu lea i le au faipule, ma fai atu, Se a ea le mea ua tuulafoaina ai le fale o le Atua? Na ou fa'apotopoto foi ia te i latou, ma tofia i latou i latou tofiga.”*

E ui lava ile fiafia o tagata e uiga i le fausiaina o le pā, ae sa latou le amanaia le auaunaga a le Alii i lo latou avanoa muamua, ona ua leai so latou taitai. O lenei faiga fa'anoanoa na atagia ai loto o tagata ona e mananao e fai se taitai na te aumaia le toe fa'aleleia ma le suiga i le nuu. Na fa'ateia Neemia ona o tagata o le nuu, e aofia ai ma sa Levī, na tuua o latou tiute ina ua leai se taitai e tausia i latou.

O loo aumai e le tala le fa'avai ai o tagata ina ua leai ni taitai malolosi e taitaia le nuu ao feagai ai ma tofiga ile malumalu o le Atua, sa iai ni manaoga mai taitai e tutulai ma fa'aali atu i tagata le mafuaga e le tatau ai ona tuulafoai le malumalu o le Atua. Lea na aumai ai e Neemia se toefuataiga, ma fausia ai se fausaga fou e fesoasoani ai i tagata e toe foi atu i le galuega a le Alii.

Tatalo: Le Alii e, fesoasoani mai ia te a'u ia tumau la'u auaunaga ia te oe ma le fa'amanoni ma fai a'u ma ou sui ile galuega. **Amene!**

Aso Toona'i – Mati 16: “I aso ua mavae” *(In those days)*

Tusi Faitau – Neemia 13:15-30

Matua – f. 21: *“Ona ou aoi atu lea ia te i latou, ma ou fai atu ia te i latou, Se a ea le mea tou te momoe ai e latalata ane i le pa? a toe fa'apea ona faia e outou, ou te pupue ia te outou. Talu lea aso ua latou le omai i le sapati.”*

I le toe foi mai o Neemia, na ia iloa ai le telē o le paū maulalo na aafia ai le aganuu a tagata Isaraelu a o iai o ia. Ua galo i tagata, o le Atua na fesoasoani ia i latou e ola e tusa ma poloaiga male finagalo o le Atua. Ua amata ona latou leiloa le sapati ma fa'aipoipo atu i tagata o isi nuu. O ni amioga ua vavaeese mai i faufuaga ma poloaiga a le Atua. O le manatu o Solomona e le afaina le fa'aipoipo

atu i nuuese, ae ua avea ma mea ua fa'aleagaina ai le la mafutagata ma le Atua. E le finagalo le Atua tatou te o ese ma ia, e manao le Atua ia avea tatou ma fa'aa'oa'oga e fafia i ai, ma iloa ai e le lalolagi mea e mafai e le Atua ona fai i lona mataisau. E ui ina faigata ae na toe aumai lava e Neemia tagata i le mafutaga ma le Alii ma toe fuataiina ai.

Tatalo: Le Alii e, fesoasoani mai ina ia ou taulai atu i lau Afio. Talosia aua nei taitaiseseina au i le faia o filifiliga sese. **Amene!**

EVAGELIA A MAREKO (2)

1. Pule i le leaga (*Authority over evil*)

Aso Sā – Mati 17: “I taimi o tauiviga, e valaauiina i tatou e Iesu i o tatou igoa”

Tusi Faitau – Mareko 5:1-20 (*Jesus calls us by name in times of struggle*)

Matua – f.9: “*Ua fesili atu foi o ia ia te ia, Po o ai lou igoa? Ona tali mai lea o ia, ua fa’apea mai, O Lekeono lo’u igoa, auā e toatele i matou.*”

O tuugamau, o agaga leaga, ma lafu puaa; o se ata mata’utia e sili ona le manaia. Ae pei ona faaali mai e Elia, e le o taimi uma e maua ai le Atua i totonu o mea mata’utia o le olaga. O nisi taimi, e maua le Atua i totonu o tulaga filemu o le olaga. Na fesili Iesu mo le igoa o le tagata lea sa ulutinoina i temoni. O le taumafaiga lea a Iesu e fesootai ma lenei tagata i se fesootaiga e sili ona loloto ma agamalu. E le gata ua sau ai fafo le agaga leaga ma ulutino i le lafu puaa, ae faimai le tala, ina ua mae’a le malologa, ua alu lenei tagata ma tala’i atu mea tetele na faia e Iesu mo ia. Faimai ua ofo ai tagata uma. Ua valaauiina o tagata igoa e Iesu. O le ata lea o le Atua e saili mai i le tagata. O le Atua mua’i alofa, ua na talia i tatou i le tulaga o loo tatou i ai, ma na talitonuina i tatou mo lana galuega tala’i, e ui ua le talitonu i tatou ia tatou lava i le tele o taimi.

Tatalo: Le Atua o le ola, fa’afetai i lou talitonu ma lou valaauiina o i matou i o matou igoa, e oo lava i taimi faigata o lo matou ola. **Amene!**

Aso Gafua – Mati 18: “Pe a tatou lagona e pei tatou ua le amanaiaina”

Tusi Faitau – Mareko 5:21-43 (*When we feel like we don’t belong*)

Matua – ff. 25-26: “*O le tasi fafine foi, ua ia te ia le puna toto i tausaga e sefulu lua, e tele foi mea na ia tiga ai i fomai e toatele, ua uma atu ai foi ana oloa, a e lei aoga lava ia te ia, a e peitai ua atili ai lona ma’i.*”

O lenei tala o le fafine sa onosa’ia le ma’i puna toto ma le sefulu lua tausaga. A vaai fa’alemafaufau i le fa’anoanoa ma le fa’asea na ia lagonaina, o le sailia o se fesoasoani mai le tele o foma’i, ae lei malolo ai o ia. Peitai, na fa’alogo ai o ia ia Iesu ma iloa ai lona fa’atasi mai e fa’amaloloina o ia. O lenei tala tatou te maua ai se tala loloto o le fa’atuatua, fa’amalologa, ma le mana togiola o Iesu. E pei lava ona taitai atu le fa’atuatua o le fafine i lona fa’amalologa ma lona liua. E mafai foi e lo tatou fa’atuatua ona taitai atu ai i tatou ia iloa le fa’afouina ma le toe fuataiga ua ofoina mai e keriso. Tau ina ia tatou pei o ia, ona fa’alogo atu i upu a Iesu i o tatou loto, O lou fa’atuatua ua malolo ai oe.

Tatalo: Le Atua o le ola, fa’afetai i lou alofa, e ta’u mai ai ia i matou i aso uma lo matou o fa’atasi ma oe, tusa lava pe na o se pa’i itiiti. **Amene!**

Aso Lua – Mati 19: “Suiga: o taimi e faigata, ae manaomia ona fai”

Tusi Faitau – Mareko 6:1-6 (*Changes: sometimes difficult, yet needed*)

Matua – ff.3-4: *“E le o le tufuga ea lenei, le tama a Maria, o lona uso foi o Iakopo, ma Iose, ma Iuta, ma Simona? E le o iinei foi ea ia te i tatou ona tuafāfine? Ona latou tausuai ai lea ia te ia, A ua fetalai atu Iesu ia te i latou, E leai se perofeta e le mamalu, ua na o lona lava nuu, ma lona aiga, ma lona fale e le mamalu ai”*

E le mafai ona avea oe ma perofeta i lou lava nuu, o se fa’aupuga e fa’aaoga pe afai ete le fa’alogo pe ete le talitonu foi i e lata ane, aemaise se mea fou ete fia fa’asoa atu. Ou te manatu o le toatele o tatou e mana’omia se manava fou i lea taimi ma lea taimi, pe afai tatou te nonofo i le nuu e tasi i o tatou olaga atoa. O suiga o tatou vaaiga ma lagona atonu e fa’afuasei ona tupu i totonu ia i tatou. Peitai, pei o Iesu atonu o loo vaai pea tagata i le tagata lava lea e tasi, e oo lava ia i latou e sili ona tatou alolofa ai, e manaomia se taimi e malamalama ai e iai le mea fou. O tagata o lona nuu sa vaaia o Iesu lava lea mai lona tamaititi ma tuputupu a’e i tafatafa o ona uso ma tuafafine. A tuu fa’alemafaufau i le fa’anoanoa o Iesu, ona o le le fa’alogo ma manatu mamafa iai e pei foi o tatou.

O le a le mea ua ta’u mai e lenei tala ia i tatou? Atonu e ta’u mai ai se mea e uiga i suiga, e manaomia ina ia tatou fa’amaoni ai. O lona suiga e le faigofie i taimi uma, ma e le o taimi uma e malamalama ai, ae o loo manaomia pea. E le mafai ona avea oe ma perofeta i lou nuu, Atonu o le tulaga lenā.

Tatalo: Le Atua o le ola, ia e latalata mai ia i matou i taimi o suiga. Fesoasoani i a matou filifiliga pe a oo mai taimi leaga. **Amene!**

Aso Lulu – Mati 20: “Na ia auina latou ta’i to’alua” (*He sent them two by two*)

Tusi Faitau – Mareko 6:7-13

Matua – f. 7: *“Ua valaau atu o ia i le toatinoagafulu ma le toalua, ona aau atu lea ia te i latou e taitoalua, ua ia tuu atu foi ia te i latou le pule i agaga leaga.”*

I le tala lea a Mareko tatou te molimauina ai le gaoiga o loo fa’amamafa ai le taua o le tali atu i le valaau a le Atua, ma sauni e laa i luma pe a oo ina valaauina i tatou. Ua auina atu ta’i to’alua e Iesu ona soo, o le ata o le galulue fa’atasi i le faiga o le galuega, a o se fa’amalosiau ia faimalaga fa’atasi ma uso talitonu a o tatou agai atu i le galuega talai. Sa ia tuuina le pule i ona soo, o le fa’atusa o le mana pe a o fa’atasi ma le misiona a Keriso.

O se fa’amanatu e fa’apea, o le avea ai ma tagata Kerisiano ua fa’amalosia ai i tatou i lona fa’atasi mai e fa’afetaia ai malosiaga o le pogisa i lo tatou lalolagi. A o tatou manatunatu i lenei faitau, ia tatou gauai atu i le valaau e fa’atino ma opogi le mana e fa’aaoga ai lo tatou pule ma fa’asoa atu le feau ina ia liua ai le lalolagi. E pei ona auina atu le toasefululua, o le fa’amoemoe ia maua ni agaga mo le Malo.

Tatalo: Le Atua o le ola, ia e latalata mai i taimi o puapuaga. **Amene!**

Aso Tofi – Mati 21: “O le maliu fasia o Ioane le Papatiso”

Tusi Faitau – Mareko 6:14-29 (*The brutal death of John the Baptist*)

Matua – ff. 25-28a: *“Ona ulufale loa lea o ia i le tupu, ua tele lise, ua fai atu ia te ia, Ou te manao ina ia e au mai nei lava le ulu o Ioane, le papatiso i se tanoa.”*

O Ioane le Papatiso o loo iai lona fa’atagata i fafo o lo matou falesa, ma o loo iai ni rosa mumu i autafa. O loo tu malosi ma tusi lona lima i luma e fa’asino i le Ekalesia. A e vaai totoa iai, e te iloa atu ni lagomeli i luga o fa’amau moligao siliva, e fa’amanatu mai ai ia i matou le meli vao (*wild honey*) na ia aia. E seāseā tatou

talanoa e uiga i lona maliu. Tatou te le iloa poo a manatu ma lagona sa ia Ioane le papatiso i le fa'aiuga o lona soifuaga. Na ia tuuina atu lona ola e saunia ai le ala mo keriso, ae o lona maliu o loo tautala i le leaga male matautia o faiga sauā tatou te fetai ai i lenei lalolagi. Sa iai i autafa o lona fa'atagata ni rosa mumu, o rosa mumu e fa'amanatu mai ai ia i tatou o laau tuitui ma le toto na fa'amaligiina i luga o le satauro. O se folafolaga le leoa mai le Atua na te le tuua lava tatou.

Tatalo: 'Aua nei mou le fa'atuatua ma le malosi o le alofa. **Amene!**

Aso Faraile – Mati 22: “Manaomia e le lalolagi ni gaoioiga laiti, ma le alofa”

Tusi Faitau – Mareko 6:30-44 (*Our world needs small, loving action*)

Matua – ff.40-42: *“Ona taoto ai lea o i latou i vasega, e ta'ito'aselau, ma ta'ito'alimagafulu. Ua tago o ia i areto e lima ma i'a e lua lau, ona tofitofi lea i areto, ma avatu i ona soo, latou te laulau atu ai ia te i latou, ma i'a foi e lua lau ua na tufatufa atu ai ia te i latou uma. Ona aai uma lea o i latou, ua maoona.”*

Sa tusia e se tasi tusitala se pese o Lina Sandell (*Swedish hymn*) e fa'apea “Fai le mea itiiti e te mafaia, ma aua lava nei e vaai iai ma le manatu e laititi tele pe lē taua. Auā e fa'apefea ona e savali ma le olioli i le mea na auina atu ai oe e lo outou Alii? O nei upu e masani ona oo mai lou mafaufau, pe a ou mafaufau i se vaega itiiti o falaoa ma i'a e fafagaina ai le afe ma afe o tagata. O le malosi o le mana na fa'atino ai se meaalofo itiiti, e le tatau lava ona manatu fa'atauvaā iai.

Atonu o le taimi lena e manaomia ai ona tatou fa'alogo i lenei vavega, e uiga i lenei gaoioiga itiiti na fafagaina ai le toatele. E tatau ona tatou faia le mea itiiti ete mafaia mo lo tatou lalolagi ma lona lumanai. Na tusia e Lina Sandell ile pese lava lea e tasi, Fai mea itiiti e te mafaia male loto malie ma le fiafia. E lē toe umi ae mou atu avanoa taua, o le fafagaina o le 5,000 atonu e foliga e lē talafeagai, ma e fa'apena foi le talalelei mo lo tatou lalolagi i le lumanai. Ae o se fasi i'a ma falaoa o loo i ai se fa'amoemoe ola, ma e fa'apena foi lo tatou lalolagi.

Tatalo: Le Atua o le ola, foi mai le mafaufau ma le lototele e galulue ai mo se lumanai manuia, ia matou iloa mea itiiti ina ia aua nei matou fiu. **Amene!**

Aso Toona'i – Mati 23: “Ia lototele; e i ai le Atua iina”

Tusi Faitau – Mareko 6:45-56 (*Take heart; God is there*)

Matua – f.50: *“Aua ua iloa o ia e i latou uma, ua atuatuvaale ai; ona fetalai atu loa lea o ia ia te i latou, Ia outou loto tetele, o a'u lenei, aua tou te matatau.”*

E tele faalagana ua maua i le tatou savaliga ma Mareko i lenei vaiaso. Ua fa'amanatu mai ia i tatou taimi o tauiviga ma lagona o le lē fia auai, ua fa'ailoa mai e Mareko ia i tatou le sauā leaga o le lalolagi o loo tatou nonofo ai. Ua tatou vaavaai i o tatou olaga ma gaoioiga e fa'atatau ile lumanai o le lalolagi.

Tatou fa'aiu lenei vaiaso ia Iesu o loo savali luga ole vai, o le vai e atagia mai ai mea uma o loo siomia ai tatou. O le loloto male tau fa'afefe ole vai e fa'ailoa ai se vaega ole sauāina o loo tatou lalolagi. Ua fa'alogoina le fa'alavelave ole fafine, ma lona iloa ole a toe pa'i atu ile pito o lona ofu. O mea uma e foliga mai o loo fa'aalia i luga ole fogaeleele ao ia savali luga ole vai. Molimau le tusitala o Hans Christian Anderson e fa'apea “O le olaga ole tagata o loo iai se filo e le vaaia, o loo fa'a'alia ai le auala tatou te foliga ai male Atua. A tonu o le mea lea na savali ai Iesu i luga ole vai, poo a lava mea tatou te feagai, ia lototele o loo iai le Atua.

Tatalo: E pei ona e savali i luga o le vai, latalata mai ia te i matou. **Amene!**

EVAGELIA A MAREKO (2)

2. Vaiaso Paia ma Mareko (*Holy Week with Mark*)

Aso Sa Laupama

Aso Sā – Mati 24: “Tetee Iesu i faamoemoega a tagata lautele”

Tusi Faitau – Mareko 11:1-11 (*Jesus defies public expectations*)

Matua – f.11: “*Ua oo Iesu i Ierusalem, ona maliu ane lea i le malumalu; ua na silasila solo i mea uma; ua oo i le afiafi, ona maliu ane lea o ia i Petania, fa’atasi ma le toatinoagafulu ma le toalua.*”

O se taimi faigata lenei ua oo i ai le tala. Sa mafuta faatasi Iesu ma ona soo ma isi sa mulimuli ia te ia. Ua faaali ai foi e Iesu ona faamoemoega ia te i latou, e ui i lo latou le malamalama. A o le motu o tagata ma le lautele, na a’oa’o ai Iesu i fa’ataoto. O lona uiga, e le o mautinoa le lautele poo a faamoemoega a le Alii ina ua oo mai i Ierusalem. O Ierusalem foi i le taimi lea, ua pei o se pomu ua toe a pa. Ua leva ona faamoemoe le motu o tagata i se Mesia e si’i-taua mai ia Roma, e auala mai ai lo latou sa’olotoga. Sa latou manatu, e le o Iesu ea le Mesia lea?

A o sauni lana malaga i Ierusalem, sa taumafai Iesu e tetee i faamoemoega ia a tagata lautele i se auala filemu. O le ala lea na aami ai le asini. E le o se Mesia e ti’eti’e mai i se solofanua tau, ae ti’eti’e mai i le asini. Peita’i, ua atili ai ona maualuga le faamoemoega a tagata ia Iesu ina ua latou alalaga, “Ia manuia le malo ua oo mai o le tatou tama o Tavita; Osana i mea e aupito i luga.” O le a se tali a Iesu i lea mea? O le aso na sosoo ai, na faaali manino loa e Iesu lona faamoemoega, ina ua fuli i lalo laulau ma faamama le malumalu i tagata faatau atu ma fesuia’i tupe. E iai taimi e tatau ai ona tatou galulue filemu e aunoa ma le mafaufau fua i faamoemoega a isi. A o isi taimi, e tatau ai ona faaali manino o tatou faamoemoega, e ‘aua ne’i masalo se isi. Ia tatou pei o Iesu: ia filifili le taimi e tatau ona filemu ai, ma le taimi e gaoioi ai, ma sauni e talia ni aafiaga e oo mai.

Tatalo: Le Alii toetu, fa’amolemole foa’i mai le lototele ma le fa’amaoni e fa’alaua’itele ai lou finagalo, tusa lava poo le a le tau. **Amene!**

Aso Gafua – Mati 25: “Soloia e Iesu pa pupuni i le malumalu”

Tusi Faitau – Mareko 11:15-25 (*Jesus clears barriers to the temple*)

Matua – f. 15: “*Ua latou oo i Ierusalem, ua ulufale Iesu i le malumalu, ona tulia lea e ia i fafo o e na fefa’atau ai i le malumalu, ma fuli i lalo laulau o e na sui tupe, ma nofoa o e na fa’atau lupe.*”

E pei ona aumaia e le tusi faitau o ananafi, na fuafua lelei e Iesu gaoioiga uma o loo molimau mai ai le tusi faitau o lenei aso. E le o se gaoioiga na faafuase’i ona fai. Ae na alu Iesu ma le loto i le itu o le malumalu e i ai le ‘Lotoa o Nuuese,’ ma fuli i luga laulau faatau ma faatafuna le nofoaga e i ai tagata fesuia’i tupe ma tagata faatau lupe. I le manatu o le lautele, e le o se amio lea o se Mesia e ta’ita’i, poo se atalii o le Atua. Aisea ua ogaoga ai faapea le amio o Iesu?

Ua faailoa mai e Iesu, o lenei gaoioiga o le faatinoga faaperofeta e faatautu i le ‘faitaulia’ ma ‘aia tatau’ o tagata uma. Sa’oloto le ‘au ositaulaga ma le ‘au Iutaia e faaoga lo latou pito o le malumalu mo tapuaiga, aua e leai ni tagata faatau o i ai. A o le pito o le malumalu e iai le lotoa o nuuese, ua le mafai se tapuaiga, ona ua tumu i tagata faatau ma tagata fesuia’i tupe ua saili ai porofiti. O le faitaulia o tagata uma i tapuaiga i le malumalu, e soloia ai i lalo pa pupuni o ituaiga, o vasega,

o itupa, ma e o iai manaoga faapitoa. Peita'i, ua ati e ta'ita'i o le lotu Iutaia ni pa pupuni, a o pa pupuni e sili ona matuia aua ua saili ai lo latou porofiti. E matua'i le sa'o lenei mea i le mafaufau o Iesu. O le fuli o laulau ma le tutuli o tagata faatau atu, ua taia ai e Iesu le mea e sili ona tiga ai – ua le toe maua se porofiti.

Tatalo: Ia matou maua le lototele e fai ai le amiotonu. **Amene.**

Aso Lua – Mati 26: “Fa’auuina Iesu i Petania” (*Jesus anointed at Bethany*)

Tusi Faitau – Mareko 14:1-9

Matua – ff. 4e-5: *“Pe se a le mea ua māumau ai fa’apea le uu manogi? Auā ana fa’atauina lena mea, po ua maua ai tenari e tolu selau ma ona tupu, e foaiina atu ai i e matitiva. Ona latou muimui lea i le fafine.”*

Ua tuumuli Iesu i Petania i le fale o Simona le lepela. O Petania o se nofoaga sa fai ma toomaga a Iesu, e maua ai lona fesoasoani ma lona fa’afouina. Na fa’aaoga e se tasi fafine se u’u manogi e fa’auuina ai Iesu ina ua iloa le mea o le a tupu. Pogisa le ausoo i le taua o le mea sa faia e le fafine. Ua latou faitio ma faapea atu, sa sili ona faatau atu le uu manogi e maua ai tupe e foai ma e matitiva.

Masalo e tutusa le vaaiga a le ausoo ma le to’atele o tatou i nei ona aso: “E leai se mea e mafai ona tatou faia i le mativa, tau lava o le tapua’i fiafia ia Iesu!” A leai ua tatou faapea, e lei fetalai Iesu... “E ia te outou pea tagata matitiva?” Peita’i, o le nofoaga o loo tupu ai le gaoioga (fale o Simona le lepela), o le gaoioga sa faia e le fafine (faauuina Iesu i ala fa’a-ositaulaga), ma le tali atu o Iesu i le f.7 [*o aso uma foi tou te loto i ai ua outou mafaia ona agalelei atu (i e matitiva)*]; o mea ia e iloa ai le finagalo o le Alii mo i tatou – ia tutu faatasi ma e matitiva.

E mafo le loto i le agalelei, le malamalama, ma faatinoga fatufatua’i e faia e tagata o loo saisaitia e le soifuaga. O le ola sa’oloto ma le agalelei atu, e mafai ona tatalaina ai lagona ua leva ona taotaomia i le loto. O i latou ua tosina i le pule, latou te misi mea o loo faia e le Atua ma lona finagalo mo nofoaga eseese.

Tatalo: Le Alii e, ia e fa’apupulaina o matou mata i mea o loo e faia, fesoasoani ia i matou ina ia matou loto foai e pei o Maria i Petania. **Amene.**

Aso Lulu – Mati 27: “Talisuaga mulimuli ma ana folafolaga”

Tusi Faitau – Mareko 14:10-26 (*The last Supper and its promises*)

Matua – ff. 22-24: *“O loo aai i latou, a e tago Iesu i le areto, ua fa’afetai, ona tofitofi lea, ma avatu ai ia te i latou, ua fa’apea atu, Ina tago ia, o lo’u tino lenei. Ua tago foi o ia i le ipu, ua fa’afetai, ma avatu ai ia te i latou, O lo’u toto lenei, o le toto o le feagaiga, ua fa’amaligiina mo tagata e toatele.”*

Ua fa’atasi Iesu ma lona ‘ausoo i se nofoaga faalilolilo aua lo latou talisuaga i le afiafi. Ae lilo i manatu, o lo latou talisuaga mulimuli foi lea. Silafia e Iesu ua lata mai le fa’alataina o ia. E manaomia ona sauniuni le ausoo mo mea o le a tutupu. E tele itu e mafai ona vaaia ai lenei talisuaga. O le talalelei lava lea i le malo o le Atua ua leva ona talaiina ma a’oa’o e Iesu. E tasi le areto sa fa’apaiaina, ma tofitofi, ma tufaina atu e faaso. O Iesu le areto lea e tasi; o lona tino ua vaevaeina. O lo latou taliaina o le areto, o le talia lava lea e le ‘ausoo o le fa’a-auuina o le galuega a Iesu: e avea ai i latou ma ona lima, o ona vae, o lona fatu, ma lona leo i le lalolagi. O le ipu sa ofoina atu ma le fa’afetai; o e uma sa feinu ai ua faailoa atu lo latou tasi ma le Alii. O se taimi o le a tafe ifo ai lona toto pe a sauaina ma fasiotia, ma o nai tausaga i luma atu, o nisi o le ‘ausoo o le a maluu

fa'amaturo. Peita'i, e iai le ola e maua i lona toto – o le ola i le toetu. O e ua avea ma soo moni o Keriso, e agavaa i le ola fou lea.

Tatalo: Le Alii e, ia matou auai ma lau afio i le fa'atoilaloina o le oti. **Amene!**

Aso Tofi – Mati 28: “Mafatia Iesu i Ketesemane”

Tusi Faitau – Mareko 14:32-52 (*Jesus distressed in Gethsemane*)

Matua – ff. 32-34: *“Ua latou oo atu i le fanua, o Ketesemane lona igoa, ona fetalai atu lea o ia i ona soo, Ina nonofo ia outou iinei, se'i ou tatalo. Ua o'ane foi o ia ma Peteru, ma Iakopo, ma Ioane, ona matautuia lea o ia, ma atuatuvaile. Ona fetalai atu lea o ia ia te i latou, O loo matua'iga tiga lava lo'u loto e oo i le oti, ina nonofo ia outou iinei ma mataala.”*

O lona itu fa'ale-tagata sa maua ai Iesu i ni vaivaiga tuga, pei o le popole vale, atuatuvaile, o le mafaufau vevesi, ma le le fiafia. Ua tatou masani ma ia lagona. I le tele o taimi, tatou te taumafai e natia. Ae mo Iesu, na tua i le tatalo. Na tuumuli Iesu i Ketesemane e tatalo ai, ae sa faamalosi 'au i ona soo ina ia mataala. E le o le mataala e leoleo ma pupula ai i le po atoa, a o le mataala ia latou iloa atu mea o loo faia e le Atua. O taimi e tatalo ai Iesu, e maua ai lona mafutaga vava lalata ma lona Tamā, “Ava, lou Tamā e, e te mafaia e oe mea uma lava; ia e aveeseina lenei ipu ia te au” (f.36). Silafia e Iesu mea o le a tutupu ma ona mafatiaga o le a oo mai. Pe mafai ea ona aveese lenei ipu? E iai se isi auala?

O le tauiviga ma le Atua e pei ona faia e Iesu i Ketesemane, o le isi lea itu taua o le tatalo. Peita'i, e iai foi le itu o le ifo 'au ma le ofoina atu na faaalua e Iesu, e pei ona atagia i upu faai'u o lana tatalo, “Ae 'aua le faia lo'u loto, a o lou finagalo.” O mea uma ia: o le mataala, o le vavalalata, o le tauivi ma ofoina atu i le Atua – o isi ia a'oa'iga silisili o le ola faaleagaga, na tapenaina ai Iesu mo mea o le a tutupu a. Peita'i, e lei tapena ai le 'ausoo. Sa momoe. E lei maua se mafutaga vavalalata e tauivi ai ma le Atua e tusa ai ma mea o le a tutupu mai. I le i'uga, ua fa'alataina Iesu e Iuta; a o Peteru na sauaina tagata na omai e pu'e ia Iesu.

Tatalo: Le Alii e, ia matou fa'amaoni ma loto atu i lou finagalo. **Amene!**

Aso Faraile Lelei

Aso Faraile – Mati 29: “O le maliu o Iesu” (*The death of Jesus*)

Tusi Faitau – Mareko 15:21-41

Matua – ff. 25-27: *“O le aoauli na latou fa'asatauro ai ia te ia. Ua tusia foi i le tusi le mea ua molia ai o ia, O LE TUPU O TAGATA IUTAIA. Ua latou fa'asatauro foi fa'atasi ma ia tagata fao mea e toalua, o le tasi i lona itu taumatau, ma le tasi i lona itu tauagavale.”*

E le tele se faamatalaga a Mareko i le tuga ma le ogaoga o le auala na tigaina ma faasatauro ai Iesu pei ona tatou matamata ai i ata tifaga i nei ona aso. O le faamamafa lava ia o le 'au faievagelia, o le itu fa'a-mataupu silisili: o ai Iesu, ma le mafuaaga na maliu ai – o Iesu o le Alo o le Atua, na maliu mo le togiolaina o le lalolagi agasala. O le mea lea na faamanino mai lava e Mareko i le amataga o lana tala: “O le amataga o le tala lelei ia Iesu Keriso, o le Alo o le Atua” (1:1). Ae toe faai'u ai foi e Mareko lana tala i le molimau a le ta'ita'i o le to'aselau sa iai i le faasatauroina o Iesu, “E moni, o le Alo o le Atua lenei tagata” (15:39).

O lenei tala ua fai ma tumutumuga o le galuega a Iesu i le lalolagi, le taulaga ua fai ma le loto malie i le satauro, e ofoina atu o ia lava e fa'amagaloina ai agasala

o le lalolagi. O le satauro e taūa i le talitonuga fa’akerisiano, o le fa’atusa lea o le togiola a Iesu mo agasala a tagata, ma saunia ai le ala i le fa’aleleiga ma le Atua.

Tatalo: Lo matou Tama o i le lagi, ia Paia lou suafa. **Amene!**

Aso Toona’i – Mati 30: “Ua tanumia Iesu” (*Jesus is buried*)

Tusi Faitau – Mareko 15:42-47

Matua – ff. 46-47: *“Na taulia foi e ia le ie lino, ua ave ifo foi ia te ia, ona aui lea i le ie lino, ua tuu foi ia te ia i le tuugamau na foa i le papa, ona fuli ane lea o le maa i le gutu o le tuugamau. Ua vaavaai foi Maria le Makatala, ma Maria le tinā o lose i le mea na tuuina ai o ia.”*

O le maliu o Iesu o se mea na fa’ateia ai le ausoo, ma sa lagona ai lo latou fa’anoanoa ina ua toesea. Ou te manatua le taimi ole tau mafanafana sa matou feagai ai ma ni fa’afitauli, ma e fa’amanatu mai pea ia te au. O se ulugalii ma le pepe na afaina ile vevela ole tau ma uma ai lona ola. Atoa ai foi ma se tasi o au o sa oso lona fatu ma uma ai foi lona ola. E le mafai ona tatou puipuia i tatou lava mai mafatiaga po o le oti. O lo tatou taliaina o mea e tutupu ile olaga e mafai ai ona fesoasoani ia i tatou e fa’aoga ai mo isi. Po o a lava tulaga le mautinoa tatou te feagai, e mafai ona tatou mautinoa ile alofa lē mavae ole Atua, o lona alofa o lo tatou taula lea i matagi ma afa. Ia tatou tatalo mo le malosi e feagai ai ma le lē mautonu ma le fa’amoemoe lē maluelue ma fa’atuatua i lo tatou Atua alofa.

Tatalo: O matou lava o tagata agasala ua mafua ai lou maliu. **Amene!**

FA’ALELEIGA (RECONCILIATION)

1. Tala o le Fa’aleleiga (*Stories of Reconciliation*)

Aso Sa Toetu

Aso Sā – Mati 31: “Mai le pogisa” (*Out of the darkness*)

Tusi Faitau – Ioane 20:1-10

Matua – f.6: *“Ona oo atu lea o Simona Peteru, sa mulimuli atu ia te ia, ua ulu atu ia i totonu i le tuugamau, ua vaai atu i ie na tanuma’i ua tuu.”*

A o lei ulufale atu nisi o le ‘ausoo i le tuugamau, na muamua lava ulufale Peteru. Leai, e le o Peteru osovale lea e pei ona tatou iloa i tala i le pu’eina o Iesu ma lona fa’afiti fa’a-tolu o Iesu. A o le Peteru lea ua muamua ulufale i le tuugamau o le Alii, ua na aumaia ai se fa’ata’ita’iga lelei mo i tatou e mafai ona feagai ai ma fa’afitauli e tula’i mai i le olaga – o le fa’asaga sa’o i mea ua tatou fefe ai, ae le o le sola ese! E lei fefe Peteru e ulufale atu i le pogisa o le tuugamau a le Alii. A o le fefe na totogo a’e ai lagona o le fiafia, ina ua iloa atu le ‘ie lino ma le solosolo na tanuma’i ai le tino maliu o Iesu, ua uma ona fatufatu lelei.

O tatou mumusu e fesaga’i ma mea pogisa ma mea ua tatou fefefe ai? E tupu ma malosi lagona o le fefe, pe a tatou mafaufau i mea o le a to’esea ma aveeseina mai ia te i tatou. Ae lilo i manatu, e i ai foi mea lelei e mafai ona tatou maua mai ai. E tele a’oa’oga lelei tatou te maua mai le fefe. Ae le mafai ona tatou maua ia a’oa’oga, pe a tatou palaaai ma sosola i taimi tatou te fefefe ai. Pei o Peteru – na maua le lototele e fesaga’i ai ma lona fefe ona o le pogisa o le tuugamau. O lona tau, o le tala fiafia ua toetu Iesu e pei ona tatou faamanatuina i lenei aso.

Tatalo: Le Alii e, ia pupula mai le malamalama o lou toetu i lo matou ola pogisa, matou te tala’i atu ai lou finagalo i le lalolagi. **Amene!**

Aso Gafua – Aperila 1: “Fa’aleleiga: O le atalii na leiloa ma le Tamā”

Tusi – Luka 15:11-32 (*Reconciliation: the lost son and the Father*)

Matua – f. 30: *“Peitai o lou atalii lena, sa na fa’aumatia au mea fa’atasi ma fafine talitane, ua sau o ia, ona e fasi lea le tamai povi peti māna.”*

O upu ia ua fai ma matua o lenei aso, o upu na tautala ai le atalii matua i lona Tamā. E fai lava si matuia, aemaise lona faapea atu i lona Tamā, “o lou atalii lena.” Ua le ta’ua o lona uso, ae ta’u o le isi atalii a lona Tamā. E logo i tino le tiga o le loto a le atalii matua ona o le tele o tausaga sa faatiga ai le atalii laititi i le aiga. E fesiligia pea nisi o vaega o le tala. E le o ta’ua se tina o le aiga. Masalo o matamata gugu le tina i faaletonu ia o loo tutupu i totonu o le aiga. E le tele foi se faamatalaga i le uso matua, a o ia o loo tautuaina le Tamā ma feagai ma le tausiga o le aiga. Tatou te lagona mafatiaga o le uso matua. E tigaina e tautua, ae selesele e le isi faamanuiaga. E leai se upu o le Tamā na solia, a o lea ua fai le fiafia ma le uso laititi na alu e faamaumau le tamaoaga o le aiga. Faai’u le tala i le faaleleiga a le Tamā ma le uso laititi. A o le uso matua, o loo tauivi pea ma ona lagona tiga. Masalo na lagona e le uso matua le mapusaga ina ua toe foi mai lona uso o ola pea, ae le o suia ai lona ita. E le faigofie le faaleleiga. Ina ia ta’uaogaina, e tatau ona aofia ai i latou uma na manualia i amioga a le tagata na faia le aga leaga.

Tatalo: Le Alii e, fesoasoani mai ia matou faia se fa’aleleiga ma i latou sa matou agaleaga i ai. Fesoasoani ina ia matou taumafai i le lelei. **Amene!**

Aso Lua – Aperila 2: “Fa’aleleiga: Iakopo ma Esau”

Tusi Faitau – Kenese 33:1-17 (*Reconciliation: Jacob and Esau*)

Matua – f. 4: *“Ona momo’e mai lea o Esau e fa’afetaiai mai ia te ia, ua fusi ia te ia, ma punou i lona ua, ma feasogi ma ia; ona la fetagisi ai lea.”*

E ootia le loto i lagona sa faaalua i le va o lenei ‘au uso e pei ona atagia i upu o le matua o lenei aso. E tele ni fesili e tula’i mai i lenei tala, aemaise pe afai e le o silafia le amataga mai o le tala ia Esau ma Iakopo. A o le tulaga o loo manino, o se feiloaga fiafia ma le mafana sa maua ona o le tele o tausaga sa valavala ai. E amata le tala i le Kenese 25. O le tala i le ‘au uso masaga ia Iakopo ma Esau, sa tauivi i le manava o lo la tina i le taimi na fanau mai ai. O lenei tauiviga sa avea ma ata o lo la mafutaga fa’aleuso I le taimi na tuputupu a’e ai. O le tofi o le ulumatua sa tatau ia Esau, ae fao e Iakopo i ala tau fa’asese ma le le faamaoni. Ina ua maua e Esau le tala, na tuliloa ia Iakopo e fasiotia, ae sola ese Iakopo ma le aiga. Taula’i le tala a Kenese i le olaga o Iakopo, sa avea ma faaauauga taua i le faufuaga a le Atua mo ona tagata.

E le o tele se tala a Kenese i le olaga o Esau. E tuufesili ai pea le mafaufau, po o le a le mea na tupu i loto o nei alii pe a sau se taimi e toe feiloai ai. A tuu i le mea sa’o, e iai tagata e faaonono ma to’atama’i ona o ni aafiaga tiga ua leva ona tupu i le tuana’i. E oo mai lava le oti e le uma le ita. A o isi, i le aluga o taimi, e a’oa’oina le mafaufau ma faaititia le ita, e faaititia ai ma le tiga. O le ola, o le taimi ua alu, ma le mafaufau loloto i aafiaga sa aafia ai i le tuana’i; o mea ia e faafailleina ma faamatuaina ai le tagata.

Tatalo: Le Tama e, matou te lagona pea le tiga o le ola. Fa’amalosia o matou loto i le alofa e fa’avavau o lau Afio. **Amene!**

Aso Lulu – Aperila 3: “Fa’aleleiga: Iosefa ma ona uso”

Tusi – Kenese 45:1-15 (*Reconciliation: Joseph and his brothers*)

Matua – ff. 14-15 *“Ona fusi ai lea o ia ia Peniamina lona uso, ma tagi i lona ua; tagi foi Peniamina i lona ua. Ua taufesogi foi ma ona uso uma, ma tagi ia te i latou. Mulimuli ane ona fetautalatalai lea ona uso ma ia.”*

A faitau i le tala, e tuufesili ai le mafaufau po o fea e sau ai le manatu lea e faimai: o alii e le o ni tagata e faaalai ni o latou lagona, ma e le talanoa foi e uiga i ni o latou lagona, aemaise lagona e iloa ai le vaivai. Masalo o se tu faale-aganuu. Peita'i, e pei ona tatou faitau, o le tala lenei i le 'au uso ua tagata matutua, ua faaali o latou lagona vaivai o le isi i le isi.

O Iosefa le autu o le tala. Sa faatauina atu e ona uso e fai ma pologa. Peita'i, e lei tuulafoaiina o ia e le Atua, ma sa faamanuia le Atua ia te ia i mea uma sa feagai ai. I le taimi na toe feiloai ai Iosefa ma ona uso, e le iloa Iosefa e ona uso i le ulua'i feiloaiga. A o le feiloaiga lona lua na faailoa ai Iosefa i ona uso. Na muamua lagona le fefe. Ae sa faamafanafana Iosefa i ona uso. Na folafola ai foi e Iosefa, e leai se mea tiga e oo mai ia te i latou. E ui i mea sa tutupu ia te ia, na vaaia e Iosefa le galue o le Atua i lona soifua, ua toe feiloai ai ma ona uso.

Tatalo: Foa'i mai le loto fou. Ia matou iloa ona alo ese mai le ita. **Amene!**

Aso Tofi – Aperila 4: “Fa'aleleiga: Paulo ma Ioane Mareko”

T. Faitau – Galu 15:36-41; Kol 4:10 (*Reconciliation: Paul and John Mark*)

Matua – Kolose 4:10 *“O loo alofa atu ia te outou o Aritako, o le ua ma fa'atasi ma a'u i le fale puipui, atoa ma Mareko, o le aiga ia o Panapa, (na poloaia outou ia te ia, a alu atu o ia ia te outou, ia outou talia o ia).”*

A o avea a'u ma faifeau, ou te fiafia e vaevae mataupu i ni vaega se lua pe a ou fa'asoa. Fa'ata'ita'iga muamua: O le vevesi o tagata i le faitauga o lenei aso, o Paulo ma Panapa sa masani ona fa'auo. Lua, o faiga uo nei sa tele ai le feeseeseaiga e uiga ia Ioane Mareko. O nei mau ua fai ma tuoai e pupuni ai le vā fesoota'i o le tasi i le isi. Ina ua ou toe faitau i lenei mau, na fa'amanatu mai ai iā te a'u se taimi i le 40 tausaga ua mavae, sa mafai ona maua se mafutaga fiafia o a'u ma o'u uso. Peita'i, i le taimi nei, ua le toe i ai se mafutaga tausua ma talitali ē, ma ua nutimomoia ai lo'u loto. Ona ua ou le toe amio i uiga fa'ale-tausuaga a tagata, a e ua tele lo'u fa'asoa fa'ale agaga. O ai e faia se fa'aleleiga?

Tatalo: Le Atua e, foa'i mai le filemu e talia ai mea e le mafai ona ou suia. Foa'i mai le lototele e fetuuna'i ai lagona eseese. **Amene!**

Aso Faraile – Aperila 5: “Fa'ataitaiga o le fa'aleleiga: Peteru ma Paulo”

T. Faitau – Kalatia 2:11-14; 2 Pet 3:14-18 (*Eg. reconciliation: Peter and Paul*)

Matua – 2 Peteru 3: f.15 *“Ia outou manatu o le onosai o lo tatou Alii o le fa'aolataga lea; fa'apei ona tusi atu ia te outou e Paulo lo tatou uso pele, e tusa ma le poto ua foaiina atu ia te ia.”*

Tatou te feagai ma suiga fou, e pei ona feagai foi Paulo ma Peteru e uiga i lona fa'ailogalanu. O loo manino mai le mau e le'i faia e Paulo se talanoaga patino ma Peteru i lona ofisa. Leai; a o se talanoaga lea na fa'ailoa e Paulo, 'Na ou fai atu iā Peteru i luma o i latou uma.' E le'i tautala Paulo. Sa ia otegia Peteru i luma o ana uo. O le otegia o loo fa'aaauu pea i le tele o sosaiete. E lē gata na amio leaga Peteru, ae o ana gaoioga na aafia ai foi isi tagata Iutaia ma Panapa. E le'i a'oa'i atu Paulo ia Peteru ona o le lotofuatiaifo po o amioga. Leai, sa fa'atatau i le paia

ma le talalelei a Iesu Keriso. I totonu o Peretania, o le sauaina lautele e mafai ona i'u i se fa'amasinoga mo tagata o loo faia lea soli tulafono. Peita'i, ua fa'alumaina Peteru i le lautele, ae e lē o tusia e le tusitala se tali. O le leo o le tusi e lē o ta'u mai ai se tau fa'aleaga iā Paulo. O le mea moni, sa lagolagoina malosi e Peteru le faiva a Paulo, i le fa'aalia o le onosai ma le atamai. Na afua le tusi o Paulo i le 'au Kerisiano, e fa'alaeiau tagata fa'atuatua uma, ia mataala i a'oa'oga taufa'asesē.

Tatalo: Le Alii e, fesoasoani mai ia matou feagai ma faigata, i lou alofa tunoa ma lou agalelei, e toe fuataina mai ai i uiga taufa'asesē. **Amene!**

Aso Toona'i – Aperila 6: “Fa’aleleiga: Filemu ma o tatou Tuaoi”

Tusi Faitau – Eperu 12:14-17 (*Reconciliation: Peace with our Neighbours*)

Matua – f. 14a *“Ia outou tausisi i le filemu ma tagata uma lava, i le ma le amio lelei.”*

O le tala i fa'aleleiga, e tele tiga ma faigata. O le vaega aupito sili ona taua mo tagata uma, ia sailia auala e maua ai mafutaga e ala i le fa'amagalo. O le fa'aleleiga e toe fa'atepa ai tatou i tua i le fuaitauga muamua o le vaiaso, ina ua alu atu Peteru i le tuugamau pogisa. E fa'apefea ona tatou taulimaina le fefe, ma vaavaai i ai? O fa'afitauli e i ai i soo se taimi, ma aso o le olaga. A o le ata manino sa fa'atasi le Atua ma Peteru ina ua ulu atu Ia i le tuugamau. O lona alofa taumuliumli, e aoa manogi ai le 'au fa'atuatua uma, i auala mo se fa'aleleiga. O loo fa'atasi pea le Atua ma i tatou pe a tatou taumafai e aumai le filemu ma le nofo lelei i o tatou olaga, e maua ai se leleiga ma o tatou tuaoi. A o tatou taumafai e fai le fa'amagaloga i se gaioga moni, e faapea le toe fesili, “ E foliga fa'apefea le lumanai?”

Tatalo: Le Atua o le filemu, matou te ole atu mo lou filemu. O lelei, ma fa'aletonu ia fa'alia mai ai lou amiotonu. **Amene!**

FA'ALELEIGA

2. La'asaga i le Fa'aleleiga (*Steps to Reconciliation*)

Aso Sā – Aperila 7: “Galuega o le Fa’aleleiga” (*A ministry of Reconciliation*)

Tusi Faitau – 2 Korinito 5: 11-21

Matua – f.18 *“O mea uma foi mai le Atua ia, ua uma ona fa'aleleia e ia o i tatou ia te ia e ala ia Iesu Keriso, ua tuuina mai foi ia te i matou le galuega o le leleiga.”*

Aisea tatou te mana'omia ai le galuega o le fa'aleleiga? E iai le manatu, a tutupu ni faapefea ma ni vevesiga i le va o tagata se to'alua, pau le mea e manaomia o le faamagaloga atu o le isi i le isi, ona fo'ia lea o le faafitauli. Peita'i, e le faapea le faigofie o le galuega o le fa'aleleiga.

O le f.21 e amata mai ai lenei galuega – faimai o Iesu, na le iloa e ia se agasala, a ua afio mai i le lalolagi e tumu i le agasala. E faapea foi le molimau a Luka 8, a o aga'i atu Iesu e faamalolo le afafine a Iario, le pule o le sunako. Faimai na faalava ane le fafine e 12 tausaga o maua i le ma'i punatoto, ma pa'i i le ofu o Iesu. Na tu Iesu ma faalogo i le molimau a le fafine. O le ata lea o le faaleleiga ua faia e Iesu, ua lelei ai le fafine ma le ma'i tigaina sa maua ai, ma ua lelei ai ma lona nuu ma tagata o lona nuu; ae sili ai, ua lelei ai ma le Atua. O le fesili: Ua tatou sauni e o ifo i lalo ma tuua o tatou mamalu faaletagata mo le galuega o le faaleleiga? O tatou pei o Iesu, e le faailogalanu, ae talia soo se tagata e saili fesoasoani mai?

Tatalo: Le Alii e, fa'afetai i lou afio mai tatou te nonofo fa'atasi. Ia fa'apupula o matou mata, ma fa'amaulalo o matou tagata e fa'apei o Iesu. **Amene!**

Aso Gafua – Aperila 8: “La’asaga i le Fa’aleleiga: Ta’utino atu”

Tusi Faitau – 1 Ioane 1: 5-10 (*Steps to Reconciliation: Confession*)

Matua – ff. 8-9 “*Ae afai tatou te faaali atu a tatou agasala, e fa’amaoni o ia, ma le amiotonu e fa’amagalo ai a tatou agasala, ma fa’amamā mai ia i tatou i amioletonu uma lava.*”

O le ta’utino atu o tatou sese, o se gasologa e taunuu atu i se maliliega ma le Atua, faatasi ai ma le tagata ua agaleagaina, e uiga i mea ua tatou faia poo mea ua le mafai ona tatou faia. O lea gasologa, e mana’omia ai ona tatou o ifo i lalo; o ifo i le lalolagi o loo soifua ai le tagata lea ua tatou agaleagaina, ma ia tatou vaavaai i lea lalolagi mai le vaaiga o lea tagata. E le faigofie. A o le faamoemoe o le ta’utino atu o lou sese, ia atagia ai ua e ana le mea sese na faia. E naunau lava le tagata e tausi lona sa’o. Peita’i, ina ia maua le fa’aleleiga fa’a-Iesu, ia ta’utino atu o oe e sese. E le o se mea leaga le ta’utino atu; o le gasologa masani lea o le olaga. Aua e leai se isi e sa’o pea i taimi uma. O le ta’utino atu o mea sese ua tatou faia, o le faailoga lea o le tagata ua matua le mafaufau. E faasino mai e le Agaga Paia mea uma ua tatou sese ai. E faasino mai foi e le Agaga le auala sa’o tatou te uia.

Tatalo: Fesoasoani ia matou fa’amaoni e ta’uta’u atu lou alofa. **Amene!**

Aso Lua – Aperila 9: “La’asaga i le Fa’aleleiga: Salamō”

Tusi Faitau – Ieremia 34: 8-16 (*Steps to reconciliation: Repentance*)

Matua – ff.15-16 “*O outou foi, na outou liliu mai i ona po nei, ma outou faia le mea tonu i o’u luma, i lo outou tala’i atu le saolotoga o le tasi i le tasi; na outou osia foi le feagaiga i o’u luma i le fale ua ta’ua ai lo’u igoa. A ua outou liliu ese*”

O le ta’utino atu o lou sese e tupu ai le gasologa e mafai ona vaaia ai mea e tutupu i le soifuaga mai se isi vaaiga fou. O le uiga o le salamo, o le suia lea o lou mafaufau, faatasi ai ma lau amio, ona o lea vaaiga fou. A le i’u le ta’uta’u atu i le salamo, e le moni lea. A le suia le amio, e le moni foi le salamo. O le ata lea o loo aumai e le tusi faitau. E masani tagata i le Feagaiga Tuai ona faatau atu i latou lava e fai ma pologa pe afai ua matitiva. Faimai le tulafono a Isaraelu, e tatau ona faasaolotoina pologa uma pe a atoa le fitu tausaga. Peita’i, o le tuuina atu o le sa’olotoga i le tagata pologa e aunoa ma se auala e mafai ona ola tuto’atasi ai, e le o se sa’olotoga moni lea.

Fai mai le tala, na ta’uta’u ma ta’utino nisi ua latou taofia tagata pologa e sili atu ma le fitu tausaga, ona latou salamo ai lea, ma toe tuu atu i latou e sa’oloto. Peita’i, latou te lei faia ni auala e mafai ai e tagata pologa ona tuto’atasi ma sa’oloto moni. Ua na o na faatino i upu ma tala mo le faamalieina o le tulafono, ae leai se loto o i ai. Sa tatau ia i latou ona o ifo i lalo, o ifo i le lalolagi sa ola ma soifua ai tagata pologa, savavali i o latou tulaga vae, lagona o latou tiga ma tauiviga, ma faalogo i le tagi a le Atua e alofa ma faaolaina tagata uma. O le salamo moni lea – e o faatasi ma faatinoga e iloa ai ua suia le olaga o le tagata.

Tatalo: Le Alii e, aumaia le saogalemu i aso uma o lo matou ola. **Amene!**

Aso Lulu – Aperila 10: “La’asaga i le Fa’aleleiga: Toe Totogiina atu”

Tusi Faitau – Luka 19: 1-10 (*Steps to reconciliation: restitution*)

Matua – f.8 “*A ua tu mai Sakaio, ua fa’apea mai i le Alii, “Fa’auta, le Alii e, o le a ou vaeluaina atu a’u mea i e matitiva; afai foi ua ou ave mea a se tasi i se ala pepelo, ou te tau i atu ai e ta’i fā.*”

E le o se mataupu e talanoaina soo, ae iai le manatu, o le faamagalalo, o lona uiga ua leai se mea e toe totogiina atu. A o le tala ia Sakaio, e ese foi. O le faamagalalo e faatatau i mea ua le mafai ona totogiina atu, a o le folafolaga a Sakaio i le tala, na te mafaia, ma ua sauni e toe totogiina atu mea uma, e tusa lava poo le a lona tau. O le ata lea o le tagata ua alu ifo i lalo mai lona lalolagi sa ola ai ina ua ta'utino lona sese sa fai, ma ua suia lana amio i le lima mafola (salamo), nai loo le uu mau. O le ta'utino atu, o le faailo lea o le sese na fai. Na te faamatalaina le mea o loo nofo aitalafu ai le tagata ona o lona sese sa fai. E le o se faiga fa'atausi-tusi fa'ale-tulafono, e tusitusia ma faamau i lalo le sese o le tagata sa fai, ma le tau talafeagai e tatau ona toe totogiina atu, e leai. A o le gaoioiga o le toe totogiina atu, e tatau ona totogo mai i le loto ua tumu i le alofa, e atagia ai le alofa o le Atua.

Na silafia e Sakaio, o lona faavaleaina o tagata, e sili atu ona aafiaga nai lo mea tau tupe. Masalo o nisi ua latou nofo aitalafu i isi tagata. O isi ua misi ai le avanoa mo nisi faamanuiaga, talu ai Sakaio. O le isi gasologa o le ta'utinoga o lou sese, o le malilie faatasi ma le ua agaleagaina i le tau e toe totogiina atu. O le toe totogiina atu e tatau ona aofia ai le mea atoa, ae le na o sina vaega.

Tatalo: Faailoa mai mea e toe fa'aleleia ma toe totogi atu. **Amene!**

Aso Tofi – Aperila 11: “La’asaga i le Fa’aleleiga: Fa’amagalalo”

Tusi Faitau – Mataio 18: 23-35 (*Steps to reconciliation: forgiveness*)

Matua – ff. 24-25 *“Ua amata e ia ona fa’amasino, ona au mai ai lea ia te ia o le tasi ua i ai ana taleni e sefuluafu. Ua le maua e ia ni mea e tau ai, ona fai atu lea o lona alii ia fa’atauina o ia, ma lana avā, ma ana fanau, atoa ma ana mea uma, ina ia tau ai mai.”*

E lei faafiti le auuana i le tau o le aitalafu na faatonu e le tupu e toe totogiina mai. Ua malie le auuana i le tau, o lona uiga, ua mae’a le laasaga o le ta’utino atu. Peita’i, e leai se suiga o le mafaufau ma le amio a le auuana; o lona uiga, e leai se salamo. Sa manatu le auuana na te mafaia ona toe totogiina mai le aitalafu pe a lava se taimi e tuuina mai. Peita’i, e le o se totogiina atu ua faia ma le loto malie, a o le tulaga lea e atagia i le auuana, o lona tetee i le mafuaaga o le aitalafu, ma lona le naunau e suia lana amio.

Sa i le tupu le ‘aia tatau e faamallosia ai le toe totogiina mai o le aitalafu, e ala lea i le faatauina atu o mea uma a le auuana, e aofia ai ma lona to’alua ma lana fanau, e faatau atu e fai ma pologa. Peita’i, ina ua tootuli ma faapa’u le auuana, na mutimutivale ai le alofa o le tupu ma faamagalalo ia te ia ma lana aitalafu. Ae faimai le tala, e ui i le agalelei o le tupu, ae lei suia ai le amio o le auuana. O se tasi o uso a auana sa iai lana aitalafu itiiti i le auuana lea, ua lafo i le falepuipui ma faatonu e le auuana e totogi mai lana aitalafu. Ina ua faalogo le tupu i lenei mea leaga, ona toe faamallosia lea o lona ‘aia tatau e toe totogi mai ai e le auuana lana aitalafu. Ioe, e iai pea le aitalafu, e le aveesea. Pau le mea na faamagalalo e le tupu, o le “manaomia” e toe totogi mai ai le aitalafu.

E pei ona tatou vaaia i le tala, o le faamagaloga e faatatau i mea ua le mafai ona toe totogiina atu. A o mea e mafai ona toe totogiina atu, e tatau lava ona totogi. E le gata e ta’uleleia ma toe mamalu ai le tagata solitulafono, ae na te aumaia foi le faamalologa ma le toefuataiina i le tagata ua aafia. O mea e le mafai ai ona toe totogiina atu, o le faamagaloga ua tatou maua mai le Atua, ua lava ma toote lea e maua ai lo tatou malosi ma le lototele e faamagalalo atu ai.

Tatalo: Le Tama e, ia e fa'amagalalo mai ia te i matou e pei ona matou fa'amagalalo atu i e ua agaleaga mai ia te i matou. **Amene!**

Aso Faraile – Aperila 12: “Toe fausia: Saogalemu” (*Rebuilding: Safety*)

Tusi Faitau – Teuteronome 19: 7-14

Matua – ff.11-12 *“A e afai e ita se tagata i lē la te tuaoi, ma lamalama ia te ia, ma tulai atu, ma fasi ia te ia ia oti, ona sola lea o ia i se tasi o ia aai; ona aauina atu lea nisi e toeaina o lona aai e aamiina atu ai o ia, ma tuuina atu o ia i le pule a le na te tauia ma sui le toto, ia oti ai o ia.”*

O aai o sulufaiga, e mafai ona sulufa'i ai le tagata ua tuua'ia i le fasiotiaina o le isi tagata e aunoa ma se faamoemoega se'ia mae'a su'esu'ega ona fai. E le o ni nofoaga e sosola ai ma sao mai ai a latou amioleaga. A o aai o sulufaiga e puipuia ai le ua tuua'ia mai le tau ma sui, ae na te le taofia le faamasinoga tonu. Fa'amata ua tatou fatuina ni aai pepelo o sulufaiga e galulue e tetee atu i le fa'aleleiga moni? O nisi ia o fa'ataitaiga o taimi ua tatou puipuia ai le ua amioleaga mai le lagonaina o le mamafatu o le avega ua latou faia.

Muamua, o le faamagalalo e mai le tusi paia. Peita'i, a aunoa ma le ta'utino atu o le mea sese na fai, e puipuia ai faaletatau le tagata sese mai le taunuuga o lana amioleaga, ma atili ai ona mafatia le tagata ua agaleagaina. Lua, a tatou agaleaga atu ma faapea atu, “Fa'amalulu atu, e le o se mea na fuafuaina,” ona tatou manatu lea ua ta'uamiotonuina i tatou mai taunuuga o le mea sa tatou faia. Peita'i, e ui o se leaga e lei fuafuaina, e le faaitiitia le tiga mo le tagata sa agaleaga. Masalo o le le fuafuaina o le leaga sa fai, e atili ai ona lagona lona tiga. Pe sa fuafuaina pe leai, e tatau lava ona ta'utino le mea leaga sa fai, ma tali atu e tusa ai.

Tatalo: Le Alii e, fesoasoani mai ia ou avega ma nofoaga o le saogalemu mo i latou e manaomia le puipuiga. **Amene!**

Aso Toona'i – Aperila 13 “Toe fausia: Mafutaga”

Tusi Faitau – Ioane 21: 15-19 (*Rebuilding: relationship*)

Matua – f. 17: *“Ua fetalai fa'atolu atu o ia ia te ia, “Simona e, le atalii o Ioane, pe e te alofa mai ia te au? Ua tiga Peteru, auā ua ia fetalai fa'atolu ia te ia, “Pe e te alofa mai ia te au? Ua fai mai ia te ia, “Le Alii e, ua e silafia mea uma lava, ua e silafia, ua ou alofa lava ia te oe.” Ona fetalai atu lea o Iesu ia te ia, “Ia e fafaga i a'u mamoe.”*

Pe a sesē lo tatou manatu po o ai le Atua ma lē ta'u sa'o po o ai i tatou, e i'u lava ina tatou vaavaai le tasi i le isi. Pe a tatou iloa le mea moni, e tatou te lagona ai le fa'anoanoa pe fa'avaivai. Sa iai se vaaiga lē sa'o a Peteru e uiga iā te ia lava ma se vaaiga sesē i le Atua, lea na ta'ita'ia ai o ia e fa'apea mai, “E lē mafai ona oti le Mesia, ou te lē fa'atagaina lenā mea e tupu. Ua tatou vaai i le auala e fesoasoani ai le ta'uta'u atu e maua ai se vaaiga moni pe o ai i tatou ma le ala o le salamo o le fa'agasologa o le suia o o tatou manatu e uiga ia i tatou lava ma le Atua.

Ua fesili atu Iesu ia Peteru pe na te alofa tele ia te ia e pei ona ia fai atu ai. Fai mai Peteru, pau lava le mea e mafai ona ia ofoina atu o le fa'auo. Na i'u ina fesili atu Iesu ia Peteru pe o ia o sana uo, ma e tatau ona mafaufau pea Peteru a o le'i tali atu ioe. O se fa'asologa o ta'uta'u, ma o se fa'asologa o le toe fausia o le fa'atuatuaaina a o faia fa'amatalaga taitasi. O lea la ua moni le faigauo, e mafai ona tupu a'e i le mea na masani ona fai mai ai Peteru.

Tatalo: Le Alii e, fa'aogaina a'u mo au feau ma lau galuega. **Amene!**

ATISI I LE TUSI PAIA (1) (ARTS IN THE BIBLE)

1. O le mana o pese (*The power of song*)

Aso Sā – Aperila 14: “Manumalo ma fa’afetai” (*Triumphant and thankful*)

Tusi Faitau – Esoto 15: 1-18

Matua – f. 2 “O le ALII, o lo’u malosi ia, ma la’u pese, ua fai foi o ia mo’u olataga; o lo’u Atua lenei, ou te fa’aneenee i ai; o le Atua o lo’u tamā, ou te vivii lava ia te ia.”

O le pese i le Alii o le autu masani i le Tusi Paia, ma o se autu o loo avea pea ma elemene tāua o la tatou tapua’iga i nei ona aso. I le lua vaiaso a lumana’i nei, o a tatou faitauga o le a taula’i i pese o loo faamaumau i totonu o le Tusi Paia, amata mai ia Mose e oo atu i le tusi o Fa’aaliga. O le tele o pese o loo ta’ua ai le agalelei ma le alofa o le Atua i tagata, ma ana faamanuiaga mo i latou.

O le faitauga o lenei aso, o le pese i le vaitaimi o le Esoto, i le sosola ese ai o le fanauga a Isaraelu mai le ‘au tau a Farao ina ua vaeluaina le Sami Ulaula. O le pese o le viiga sa vivii ai Isaraelu i le Atua na ta’ita’iina i latou i le saogalemu. O le taimi e toe tepa ai Isaraelu i le aao o le Atua sa ta’ita’iina i latou – ua faafoi ai i le Atua le faafetai ona o le laveaiina o latou. O le faamanatu mo i tatou: ia toe faafoi le faafetai i le Atua pe a tatou maua ni faamanuiaga mai ia te ia. E le mata’utia pei o le vaeluaina o le Sami Ulaula, a o mea mamasagia e pei o le oso a’e o le La i le taeao, o mea ia e ao pea ona tatou faafetai ai i le Atua.

Tatalo: Faafetai le Atua mo pese ma viiga i lau Afio. **Amene!**

Aso Gafua – Aperila 15: “Pese o lapataiga” (*Song of warning*)

Tusi Faitau – Teuteronome 31: 19-22

Matua – f. 21a “A oo foi ia te i latou o mea leaga e tele, ma mea e tiga ai, ona fai lea o lenei pese ma molimau ia te i latou; auā e le galo ai i gutu o a latou fanau.”

O le pese lenei a Mose na vivii ai i le Atua, ae na lapata’i ai foi ma Isaraelu i taunuuga e oo mai pe a galo ia i latou folafolaga a le Atua ua faataunuaina mo i latou. E sosoo le pese ma le faatonuga mo Isaraelu ina ia tausia pea le tulafono i totonu o le atolaau o le Alii e puipuia ai. Sa i ai le faamoemoe ia a’oa’oina Isaraelu i fatuga ma faaupuga o le pese, ina ia teufatu i o latou loto ma mafaufau.

Ua faaalua i su’esu’ega i nei ona aso le umi o le taimi e manatua ai e le mafaufau fatuga ma upu o se pese. O le lagi faapese o ana toe upu ia Isaraelu, na mautinoa ai e Mose e manatua ai pea e Isaraelu, e le gata i tupulaga o lona vaitaimi, ae faapea tupulaga i le lumanai. A tusitusia ma faamauina le pese, e gata lava ia i latou o e e mafai ona faitau. Ae a usu ma lagi faapese, e mafai ona tuufaasolo i soo se tupulaga latou te tamauina le pese e fai ma o latou talatuu.

O le mataupu 32 o le tusi e i ai le pese atoa, ua fa’amauina i fuaiupu ta’itasi e 43. O loo fa’amatala ai le finagalo alofa o le Atua mo Isaraelu ma taimi na liliu ese ai Isaraelu ma le Atua. O loo faamanatuina ai faamanuiaga a le Atua, faatasi ai ma lona toasa. Molimau le Feagaiga Tuai, e lei usita’i Isaraelu i lapataiga a Mose, ma na toe liliu ese mai le Atua. A o le pese a Mose e manatua pea i nei ona aso.

Tatalo: Le Atua e, fa’amalosia lo matou fa’atuatua iā te oe, ma ia matou iloa ona usita’i i lou fingalo. **Amene!**

Aso Lua – Aperila 16: “Pepese i le manumalo o le Atua”

Tusi Faitau – Fa’amasino 5: 1-9 (*Singing God’s victory*)

Matua – f.3: *“Ina fa’afofoga mai ia outou tupu; alii e, ina liliu mai ia o outou fofoga; o a’u, ou te pese lava a’u i le ALII, ou te fai pesega i le ALII le Atua o Isaraelu.”*

O le pese lenei o le manumalo. O loo faamatala ai le manumalo o Isaraelu i lona fa’atoilaloina o sa Kanana; ua muta ai ma le 20 tausaga o sauaina Isaraelu e tagata o Kanana. O le pese o loo fatu fa’a-solo, e le gata o loo faamatalaina ai auala na faatoilaloina ai e Isaraelu ona fili, a o le ata fa’ata’ita’i o le tautala atu i le upumoni ma le mana. Valaau Tepora i tupu ma perenise ina ia fa’alogo mai i upu o lana pese. E tulaga ese le pese a Tepora. Pau lea o le pese o le manumalo i totonu o le Feagaiga Tuai e fa’amanatu ai le manumalo o fafine: Tepora ma le toa o Iaeli. Ua le o toe tau Tepora; ua toe foi i lona olaga masani o le avefa ma perofeta ma fa’amasino. Peita’i, o le pese e usu e Tepora e manatua ai lona faiva i le taua, ae ogatotonu i le viiga o le Atua na maua ai lo latou manumalo.

E tele pese ma viiga i nei ona aso o loo tusia mai i aafiaga sa tutupu i le fatupese i lona mafutaga ma le Atua; o pese o viiga e olioli ai, ma pese o faanoanoaga. Mo i latou o loo usuina ia pese, e maua ai auala latou te fesootai ai ma o latou lava aafiaga i le mulimuli ai ia Keriso. Pe tatou te le manumalo faaletino, e i ai lava le pese e mafai ona tatou usuina e faamatala ai le Atua o loo galue pea i lo tatou ola.

Tatalo: Le Atua e, ia matou iloa lou fa’atasi mai ia i matou. **Amene!**

Aso Lulu – Aperila 17: “Tali atu i pese o lagona”

Tusi Faitau – 1 Samuelu 18: 1-7 *(Responding to songs of emotion)*

Matua – ff.6b-7 *“Ona o atu ai lea o fafine mai aai uma o Isaraelu ua pepese, ma sisiva, e fa’afetaiai i le tupu o Saulo, ma topa, ma le olioli, ma ‘apa tagitagi. Ua lagi fetaliai fafine i a latou siva, ua fai ane, Ua fasia e Saulo ana toaape, a o Tavita e sefulu o afe.”*

O lenei pese manumalo e mulimuli mai i se tasi tala lauiloa i totonu o le Feagaiga Tuai: o le faatoilaloina o Koliata e Tavita. O se manumalo e lei iitea, ae na fai ma tulaga na oo ai Tavita i le nofoalii o Isaraelu. Na auina e Saulo Tavita i le taua, ma na manumalo ai Tavita. O pese sa usuina e fafine e faafetaia’i ai Saulo, e le faatatau i le manumalo a Tavita ia Koliata, ae faatatau i mea e ono mafai ona faia e lenei toa talavou o Tavita. Sa fasiotia e Saulo le to’a afe, ae tusa ai ma le pese, e ono mafai e Tavita ona fasiotia le to’a sefulu afe. E faaperofeta le pese; e pese foi i le manumalo. Na fafaga e le pese lagona le mautonu o Saulo, na mafua ai ona faaali lona ita tele ia Tavita i le mataupu e sosoo ai. E mamana pese; e osofia ai foi lagona. E lagona le pa’i mai o le pese e faaleo ai se faamoemoega poo se faanaunauga. O le mea lea na ala ai ona ta’uta’ua pese ‘aualofa. O pese o loo fa’aalia ai lagona o le alofa e mafai ona tatou fesootai ai pe a tatou ‘auai i le usuina o le pese. Na tosina le to’atele o le nuu e ‘auai i pepesega ma siva sa faia e fafine o le ‘aai. O le mea lea na tiga ai Saulo i upu o le pese, ma atili ai lona ita ia Tavita.

Tatalo: Le Atua o le malosi, fesoasoani mai i o’u fa’alogona e tusa ai ma lou finagalo mo o matou ola. Taofi matou i lou ala. **Amene!**

Aso Tofi – Aperila 18: “Pese o sulufaiga” *(Songs of refuge)*

Tusi Faitau – 2 Samuelu 22: 1-4

Matua – ff.2-3 *“Ua ia fa’apea ane, O le ALII, o lo’u papa lea, ma lo’u ‘olo, ma lo’u fa’aola. O le Atua o lo’u papa, ou te fa’atuatua lava ia te ia; o lo’u talita o ia, ma le*

nifo o lo'u olataga, o lo'u 'olo maualuga, ma lo'u malu, o lo'u fa'aola, e te fa'aola ia te a'u ai le sauaga."

O pese e aumai ai upu e fa'aioa atu ai o tatou lagona loloto. O le pese a Tavita o se fa'amatalaga o le fa'atutua. Na te vivii i le Atua i taimi o tofotofoga, e pei ona laveaiina e le Alii ia Tavita mai lima o ona fili. Na sulufa'i atu Tavita i le Alii ma na puipui ia te ia. O lenei pese o le fa'avae lea o le tele o salamo a Tavita. Salamo 19 o loo i ai le fa'atusa o le Alii o se papa ma se togioala. O loo iai i le Salamo 23 ni ata o le sulufa'i atu i le Alii. O pese a Tavita ua te aumaia ai ia i tatou upu tatou te manaomia. O pese latou valiina le ata o le uiga o le avea ma fanau o le Atua, na tuufa'asolo mai i lea tupulaga ma lea tupulaga o i latou o e saili e vivii atu i le Alii.

Tatalo: Le Atua e, tau ina ia tatou fausia o tatou olaga i luga o lē na te tausia le saogalemu, o lo tatou papa foi lea ma lo tatou togioala. **Amene!**

Aso Faraile – Aperila 19: “O le saolotoga e pese ai” (*The freedom to sing*)

Tusi Faitau – 2 Nofoaiga a Tupu 5:13a

Matua – f.13: *“O e ili pu ma e o pepese ua peiseai o se toatasi, ua tasi le leo i le viiga ma le fa'amanu i le ALII; ua latou pepese fa'atasi ma pu, ma sumepalo, ma laaupese, e vivii atu ai i le ALII, o loo fa'apea atu, Auā e lelei o ia, auā e fa'avavau lava lona alofa.”*

O lenei fuaitau o se fa'amatalaga matagofie o le tapuai i totonu o le malumalu o Solomona. Ina ua pepese ma viiga fa'atasi ma meafaifa'a'aili, o le ao o le afioaga o le Atua o le a afio ifo ma fa'atumulia ai le malumalu i le Alii. Ua vivii atu tagata o le Atua i le Alii i musika i talafa'asolopito, ma e masani ona mafua ai le fa'agaeaina o le Agaga Paia i le loto o ē e sii a'e o latou leo i le Atua. I le taimi o le fa'ama'i Covid-19, o se tasi o tulafono sili ona faigata ona tausia ina ua mafai ona matou toe foi mai e fai sauniga i totonu o fale. Ese lava le lagona e tapuai i le Atua e aunoa o leo i viiga. I Peretania, na fa'atagaina i matou e pepese i fafo i le lotu sauniga mai le Eseta 2021. I lona taeao o le Eseta, sa maligi loimata a o ou pese e le gata i le olioli o le toetu. E lē tatau ona tatou manatu māmā i le malosi o pese i le tapua'iga i le Atua. Tatou te sii a'e o tatou leo aua o loo soifua le Atua lelei ma ona o lona alofa e fa'avavau.

Tatalo: Matou te tapuai pea ia te oe, ma fai pesega i lou mamalu. **Amene!**

Aso Toona'i – Aperila 20: “Sau e pese” (*Coming to sing*)

Tusi Faitau – Salamo 95: 1-7

Matua – ff. 1-2 *“O mai ia, ia tatou alalaga fialia i le ALII; ia tatou alalaga i le papa o lo tatou olataga. Ia tatou o atu i ona luma ma le viiga; ia tatou alalaga ia te ia i pese.”*

Ina ua oo mai le Tusi Tatalo (BCP) i le 1662, o le pese muamua o le pese 95, lea sa ta'ua o le *venite*, o le Latina mo le “sau.” E feiloa'i Kerisiano i le lā i aso uma i upu mai le salamo, e fai atu le tasi i le isi ina ia faia se leo fialia i le Atua. O lenei pese o se valaau e fai se mea. O le mea moni, e lua valaaulia i le tasi! O nai fuaiupu muamua o le salamo e fai atu ai i soo se tasi e faitau i ai ina ia aufa'atasi ma tagata na tusia e vivii atu ia Alii e ala i pesega. Ae o se valaau foi i le tele o tagata. Pe a tatou pepese i viiga i le Alii, o loo tatou talosaga atu foi ia i latou o siomiaina i tatou o e atonu e lei iloa le Alii e fa'alogologo i la tatou pepese fa'atasi ma i tatou.

O le vaega o totoe o le pese e talanoa e uiga i le Atua. Fai mai o ia o se tupu sili o ia na faia le lalolagi. O loo aumaia ai se aotelega puupuu o le mea na manatu

tagata Isaraelu e iai le Atua. Mafaufau i viiga ma pese e sili ona e fiafia i ai. O le ā la latou tala e uiga i le Tala Lelei a le Tusi Paia? Pe e te mafaufau i ni pese e lē gata e vivii atu ai i le Atua, ae e fai atu foi i tagata ina ia talia Iesu e fai ma o latou Fa'aola? Po o tatou pepese ea i se nofoaga e lē mafai e se isi ona fa'alogo mai, pe fa'alogo mai foi tagata i fafo o le lotu?

Tatalo: Le Atua Fofoa, fesoasoani mai ia matou fa'asoa atu lou viiga ia te oe ina ia sili atu e mafai ona e iloa lou malosi ma maua ai lou fa'aolataga. **Amene!**

ATISI I LE TUSI PAIA (2)

2. O le mana o pese

Aso Sā – Aperila 21: “O pese o le filemu” (*The songs of silence*)

Tusi Faitau – Salamo 98: 1-9

Matua – f.4: *“Ia alalaga i le ALII le lalolagi uma; ia leo tele lava, ma ia alalaga fiafia, ma ia fai pesega.”*

O loo tatou ola i se lalolagi fesuisuia'i ma pisapisao, e faigata ai ona maua se to'a ma se filemu loloto. A tatou mafaufau i lenei vaiaso i “pese,” o loo aumaia ai se aualea tatou te maua ai le to'a ma le filemu i le totonugalemu o lenei lalolagi fesuisuia'i ma le pisapisao o loo tatou ola ai. E maua lea e ala i le foafoaga, e pei ona pese ai le faisalamo i le tusi faitau o lenei aso. E ese foi le filemu o le pese e lagi e le foafoaga: i le tausagi o manu o le vaveao, o leo o manu ma meaola o le vao, o i'a o le sami, o manu felelei, ma isi meaola o le foafoaga. E a le lalolagi fesuisuia'i ma pisapisao, ae filemu le pese e lagi e le foafoaga i aso uma. Faamata e mafai ona faapoopo ni o tatou pese, i pese o loo lagi e le foafoaga? Poo ni pese fiafia, o auega, o viiga, o le tuufesili? Faamata e maua se avanoa tatou te faalogo ai i pese o le Agaga, i lona taitaiga ma lona faatonutonu folau?

Tatalo: Le Tama e, o oe o la'u pese, o lo'u malosi, o lo'u fa'aolataga. Auamaia le alofa tunoa ou te fa'alogo ai ia te oe ma le lototele e fai ai lou finagalo. **Amene!**

Aso Gafua – Aperila 22: “Ta'u atu, lo'u agaga” (*Tell out, my soul*)

Tusi Faitau – Isaia 12: 1-6

Matua – ff. 3-4a *“Tou te utu vai ma le olioli i vaipuna o le fa'aolataga. O lea aso foi tou te fa'apea atu ai, Ia outou vivii atu i le ALII, ina valaau atu ia i lona suafa; ia outou fa'ailoa atu i nuu o ana galuega.”*

O aso anamua sa faaaogaina ai pese e faamatala ai talatuu ma talafaasolopito a tagata, o aiga, nuu ma atunuu, ae faapea ma faigamalo. O mea sa tutupu, o mafutaga ma isi, ma lagona natia o le loto – e faamatala i totonu o upu ma fatuga o pese. O pese e mafai ona ta'u mai ia i tatou mea uma e uiga i o tatou tiga, lo tatou olioli ma o tatou faanaunauga. E mafai foi ona latou faaleoina lo tatou ita, o le le mautonu ma le maasiasi. E mafai foi e pese faailoa le Atua ma ana galuega.

Ua faamatala mai e le 'au perofeta ma le 'au faisalamo le talafaasolopito o le faaolataga ma le faamaoni o lo latou tali atu i galuega a le Atua. E leai se mea e le oo iai le pese. O le mea lea, ua ia i tatou le faatagaga e usu ai soo se pese o i totonu o o tatou loto i le Atua; po o se pese o le tiga, ita, alofa, po o le olioli. E le afaina le faailoa atu o o tatou agaga i luma o le Alii, ia faamaoni ia te ia e uiga i le tulaga o o tatou olaga, ia faailoa atu a tatou galuega ia te ia, ina ia mafai ona tatou folafola atu ana galuega i lo tatou lalolagi le tagolima.

Tatalo: Tama e, fesoasoani mai ia ou fa'amaoni ia te oe. Ia ou iloa alofa, ma e mafai ona ou mautinoa i lou alofa tunoa fea lava ou te i ai. **Amene!**

Aso Lua – Aperila 23: “Pese fa’anoanoa” (*Singing the blues*)

Tusi Faitau – Auega 1: 1-16

Matua – f.4: *“Ua fa’anoanoa ala o Siona ina ua leai ni e o mai i le tausamiga; ua taaligoligoa ona faitotoa uma; ua mapuitiga ona faitaulaga, ua tiga ona toupou, ua ogotia foi o iai”*

O le tusitala o le tusi o Auega, o le tagata ua masani i pese faanoanoa. Ua tagiaue i le faatafunaga o Ierusalem; o le puapuaga o ona tagatanuu; ma le foliga mai e leai se Atua. O lana pese o le pese faanoanoa, o le pese le mautonu, ma ua leai se faamoemoe. E tusa ai ma tala tatou te maua mai i le televise ma alaleo faasalalau, e faapea foi o tatou lagona e pei o le tusitala o Auega. O tala i fetaua'iga ma le sailiga o le pule ma le malosi, o puapuaga ma tiga; o mea lava ia mai anamua e lei suia. Leitioa a tatou le mautonu ma fesili ane, “O fea ea le Atua?”

O taimi ia e manaomia ai ona faaleo o tatou faanoanoaga. E manaomia on ausu o tatou pese faanoanoa, i soo se ala e talafeagai ma i tatou. E manaomia ona faailo mea leaga, faatasi ai ma mea lelei, ina ia tatou maua ai le faatuatua e iloa atu ai le Atua na te le tuulafoaiina i tatou. E manaomia ona tatou iloa atu le Atua i aso uma - i totonu o le faatafunaga, faatasi ma e loto nutimomoia, ma e matitiva.

Tatalo: Fesoasoani mai le Atua i le tele o mafatiaga o lenei soifuaga. Ia matou manino i lou alofa i totonu o faanoanoaga o lenei soifuaga. **Amene!**

Aso Lulu – Aperila 24: “I le loto ma le agaga fuatiaifo saoloto”

Tusi Faitau – Galuega 16: 16-30 (*In heart and conscience free*)

Matua – ff. 24-25 *“Ua oo lea poloaiga, ona tuu atu lea o ia ia te i laua i le potu tuloto, ma fa’amaui i o la vae i laau. O le tulua o po ma ao, ua tatalo ai ma pepese o Paulo ma Sila i le Atua; ua fa’alogo foi ia te i laua e ua noanoatia.”*

O pese sa avea ma auala e tetee atu ai i mea leaga, a o le fusi e fusia faatasi ai tagata ua sauaina i le faamoemoe e tasi ma le lagona e tasi. E pei o Sila ma Paulo i le falepuipui, na maua lo la faamafanafanaga e ala i pese ma le vivii atu i salamo, e faaleo atu ai lo la faatuatua mo lo la talitonu i le Atua na te tuulafoaiina i la’ua.

E le mafai e le pese ona aumaia le saolotoga faaletino mo i tatou, aemaise mo nai o tatou uso ma tuafafine/tuagane ua taotaomia ma saisaitia. Ae mafai e le pese ona faamautu le saolotoga faaleagaga ma le faamoemoe e manaomia e o tatou agaga. O le faamoemoe lea o le a i ai se aso tatou te manumalo ai.

Tatalo: Le Atua e, aumai ia te au le malosi ma le lototele. **Amene!**

Aso Tofi – Aperila 25: “Tuu ese ma tuu atu i le Atua” (*Let go and let God*)

Tusi Faitau – Efeso 5:15-20

Matua – ff.18-19 *“Aua foi ne’i onā outou i le uaina, o le mea e ulavale ai; a ia fa’atumuina outou i le Agaga. Ia outou fetautalatalai i salāmo, ma pese, ma siva fa’aleagaga, ia fa’aneene atu ma pepese atu i le Allii i o outou loto.”*

A oo i le taimi e faatino ai se faamoemoe taua, e iai tagata latou te manaomia se malosiaga mai fafo atu e faatoilaloina ai o latou lagona fefefe ma le le mautonu. E faapea foi lo tatou ola faaleagaga, e iai lava mea o loo taofiofia i tatou mai lona faatinoga. O se tu ea poo se aganuu? Pe pau lava o le mea ua oo i le soifuaga?

O le ola naunauta'i o se mea lelei, ae mafai ona ave sese e nisi. Pei o le manatu o le matua i lenei aso, ia naunauta'i i mea lelei, ae le o le inuga uaina. E lelei foi le faautauta, ae le o le faautauta e nofoa'i ai. Mo le tagata Kerisiano, e le tatau ona i ai se faautauta i lo tatou alolofa atu – mo le Atua, mo i tatou lava, po o tatou uso a tuaoi. E le faatua'oaia le talaiina o le talalelei poo le ta'usalaina o amioletonu. E leai se alofaga mo le musu e tuu ese ma tuu atu i le Agaga e galue e ala mai ia i tatou, i totonu ia i tatou pe faatasi ma i tatou, po o le a lava le auala tatou te filifili e faailoa atu ai i tatou lava.

Tatalo: Ia ou alofa ma talia isi e pei ona e alofa ma talia a'u. **Amene!**

Aso Faraile – Aperila 26: “O pese o o’u loimata” (*The tracks of my tears*)

Tusi Faitau – Iakopo 5: 13-15

Matua – f. 13 *“Ua tigaina ea so outou? Ina tatalo ia. Ua fiafia ea se tasi? Ina pese ia.”*

O lo tatou ola e pei o le pese e mafai ona tatou faalogologo i ai. E iai taimi tatou te to manatu ai i mea sa tutupu i le tuana'i; e toe iloilo o tatou tala, ma faalogologo i tausaga ua mavae. O le a i ai pese o le faanoanoa ma pese o le olioli. O le a i ai le faanoanoa ona o nisi taimi ua fai o tatou loto, ae le o le finagalo o le Atua. E i ai pese o le a faamanatu mai ai taimi o maasiasiga e manaomia ona toe faasaga i ai ma faamagalalo. O pese foi e toe laga mai ai lagona tiga ona o se mea na tupu ma se e latalata ia te oe, e manaomia ona faia ai le faaleleiga.

A o tatou to manatu ma faalogologo i pese o le tuana'i, e i ai foi le isi pese e o faatasi – o le pese o le Agaga Paia, e tauto'aluaina o tatou tala ma manatunatuga o le tuana'i. O pese o le Agaga Paia, o pese o le alofa, o le pese o le olioli ma le ola faamagalalo, e i ai taimi tatou te faataligatuli i ai. Faamata e le o le taimi ea lenei e tatau ai ona tataou faalogo i pese o le Agaga Paia?

Tatalo: Tama e, o le tele o taimi ou te le'i fa'alogo ai i lau valaau. Ia naunau lo'u loto e mulimuli ia te oe. **Amene!**

Aso Toona'i – Aperila 27: “Usu le pese fou” (*Singing a new song*)

Tusi Faitau – Fa'aaliga 14: 1-3

Matua – ff. 2-3a *“Ua ou fa'alogo foi i le leo mai le lagi e pei o le taalili o vai e tele, e pei o le taalili foi o le faititili tetele; ua ou fa'alogo foi i le leo o e ta kitara o loo ta i a latou kitara. Ua latou pepese foi e peiseai o se pese fou i luma o le nofoālii.”*

O la'u aoga muamua na aoaoina au i le tele o mea e uiga i musika. Sa vaaia e le tuafafine lotu le tuufa'atasia o se aufaipese, se kalapu musika ma se aufaipese. Na manuia le aufaipese ina ua uma ona aveese e Sister leo na aveesea ai le “leo fiafia.” Na latou auai i le tele o pesepesega i le aoga, ae o le ta'ua o “tagata e le o ni pepese” e tiga ai ma fa'aauau pea. O le tele o tagata i Peretania ua fiafia nei i musika pese, o se mea lelei. O le numera o aufaipese pitonuu e fa'afeiloa'i tagata uma. E leai se leo e sese pe le mafai ona aoaoina, latou te fesoasoani uma. E toatele tagata ua auai i aufaipese a le lotoifale ina ua uma ona matamata i ata TV e fa'aalia ai le auala e maua ai e le au musika. O polokalame nei e fa'amamafaina ai le olioli ma le mafuta fa'atasi o le pepese fa'atasi, lea e fesoasoani ai i tagata i vaega eseese e lagona ai e pei oi latou. O aufaipese e fa'ailoa mai ai se ituaiga o fealofani fou e pei o le “leo o vai e tele.” Ua mafaufau le tusitala o le Fa'aaliga po o le a le tulaga o le a iai le lalolagi i le lumana'i, ae pe mafai ea e Kerisiano ona galulue nei mo le filemu ma le malamalama i a latou lotu ma lautelega?

Tatalo: Le Tama e, fa'amagalalo mai a'u i taimi ou te fa'alavelave ai i le nofo lelei o lo'u aiga. Fesoasoani mai ina ia ou savali i ala o le filemu. **Amene!**

TUSI IA TIMOTEO (1) *LETTERS TO TIMOTHY*

Aso Sā – Aperila 28: “Efeso” (*Ephesus*)

Tusi Faitau – 1 Timoteo 1:1-17

Matua – f. 12: *“Ou te fa’afetai atu foi ia Keriso Iesu lo tatou Alii, o le na fa’amalosia a’u, na ia manatu ua fa’amaoni a’u, i lona tofia o a’u i lana galuega.”*

E fa’apei le nuu o Efeso? I le vaitau na tusia ai le tusi a Paulo, o Efeso sa avea ma se tasi o aai taualoa ma le tuputupu a’e o le tamaoiga i Sasa’e Tutotonu. I lalo o le puleaga a Roma, sa avea ai Efeso ma laumua o le itumalo o Roma i Asia. O le aai sa fai ma ogatotonu o fefa’ataua’iga, o a’oa’oga fa’aleaganuu, faapea tapua’iga eseese fa’apaupau sa i ai i na ona po. O Efeso o se nofoaga autū lea mo Paulo i le talaiina ma le faasalalauina o le fa’a-Kerisiano. Peita’i, sa le malamalama ma nunumi tagata ona o le tele o a’oa’oga sesē sa ulufale mai i le Ulua’i Ekalesia. E mafua lea ona o le tele o isi tapuaiga ma talaiga faapaupau sa maua i totonu o Efeso.

A tatou faitau ma mafaufau i le uluai tusi a Paulo ia Timoteo i lenei vaiaso, atonu e i ai ni vaega o le tusi tatou te tau atu ai e le talafeagai ma nei ona aso, ma gagana ma mafaufuaga ua le toe aoga. Ia avea lo tatou a’oa’o atili ia Efeso ma tofotofoga sa feagai ma le ekalesia Kerisiano i lea vaitau, tatou te malamalama ai i tua’elele o le tusi ma vaavaai i ai mai se isi vaaiga fou.

Tatalo: Le Atua o le malamalama, matou te tatalo mo ni manatu fou a o amataina lenei suesuega o le ulua’i tusi a Paulo ia Timoteo. **Amene!**

Aso Gafua – Aperila 29: “Faigata fa’alotoifale” (*A local difficulty*)

Tusi Faitau – 1 Timoteo 1:18 – 2: 15

Matua – 2:1-2 *“O lenei, e muamua i mea uma ou te apoapoi atu ia faia olega, ma tatalo, ma fa’atoga, ma fa’afetai mo tagata uma lava; mo tupu ma i latou uma ua i ai le pule, ina ia tatou nonofo ma le le atuatuvaale ma le filemu, i le amio Atua uma lava ma le amio matagofie.”*

E taua le faailoa o le tiga ma le mafatiaga sa lagona e le Ekalesia i tausaga ua mavae i le fa’aaogaina sese o le 1 Timoteo 2:11-15. O ni fuaiupu faigata, ma o se fa’ata’ita’iga lelei lea e faamalosi ai le manatu, e manaomia ona tatou malamalama i tua’elele o le tusi na tusi ai upu ia. O se tasi o mafuaaga autu na tusi atu ai Paulo ia Timoteo, ina ia fa’afetaia’i le galuega a faiaoga taufaasese o loo faia i totonu o le Ekalesia i Efeso. Sa popole tele Paulo i lea mea, ma ua naunau ina ia taofia. I le mataupu e 2, ua faatonu e Paulo le ekalesia atoa ina ia toe foi mai i le tatalo. O se mataupu e taua tele ia Paulo ina ua faailoa mai ituaiga tatalo eseese e mana’o e faia e le ekalesia. O tane ma mafine uma i le Ekalesia i Efeso, ua valaauina e toe foi mai i le tatalo, a o le avanoa e faaofiofi mai ai ma lu’itau i le amio e tatau faaalii. Mo tane, ia faaitiitia le ita ma le finauvale. Mo mafine, o le naunau i mea matalasi ma le vaai i le itu i fafo, ae le o le tatalo ma le amio lelei.

Tatalo: Le Atua e, faamalosi mai i lau Ekalesia ma lona misiona, e ui i le tele o fita ma faigata i le lalolagi i nei ona aso, **Amene!**

Aso Lua – Aperila 30: “O le Valaau maualuga” *(A high calling)*

Tusi Faitau – 1 Timoteo 3:1-16

Matua – f. 15: *“A e afai ou te tuai atu, ia e iloa ai lau amio e tataui i le fale o le Atua, o le ekalesia lea a le Atua soifua, o le pou tuu foi lea ma le lagolago o le upu moni.”*

O loo fa’amanino mai e Paulo i lenei vaega o lana tusi ia Timoteo, o le tofia e fai ma ta’ita’i o le ekalesia, o le valaau maualuga a le Atua i lana galuega, ma ia ‘aua foi ne’i iai se fa’aletonu e tasi e fa’aleaogāina ai lona galuega e le nofa a tiakono ma le mamalu o le ekalesia. O loo taumafai malosi Paulo e ta’u atu i le ekalesia e tataui ona sili atu ona lelei ma ia mautinoa o loo vaaia ona ta’ita’i o ni fa’ata’ita’iga lelei i se lalolagi o loo i ai le tele o a’oa’oga sese. Ua ia manatu o le ta’ita’iga lelei o se fa’ailoga lea i le nuu ma le lalolagi atoa.

Fai mai Paulo o Timoteo o se ta’ita’i fa’amaoni, ma na ia ta’u atu ia te ia e galulue ma isi Kerisiano fa’amaoni. O Keriso o le totonugalemu o mea uma, ma o ia o le puna o mea lelei uma. Atonu e maualuga tele le fa’amoemoe o Paulo mo i tatou. Ae masalo o le moni o le ki lea o le toe foi. E tataui ona maualuga lo tatou sini, ae tataui foi ona tatou naunau e sui. E tataui ona tatou tauaveina le tiutetauave ma ia nofouta i a tatou mea sese.

Tatalo: Le Atua e, fesoasoani mai ia matou tuu oe i le ogatotonu o matou olaga ma ia galulue malosi ia avea ma tulaga sili ona lelei mo i tatou lava. **Amene!**

Aso Lulu – Me 1: “A’oa’oina oe i le amio atua” *(Train yourself to be godly)*

Tusi Faitau – 1 Timoteo 4:1-16

Matua – f. 7: *“A o tala leaga o le vavau a fafine valevalematusa, ia e ‘alo ese ai; a ia e fa’amasani i le amio Atua.”*

I le vaega lea o le tusi a le Aposetolo, ua toe tusi fa’amanatu Paulo ia Timoteo i Efeso, ona o le fa’afitauli o loo feagai ma le Ekalesia i Efeso. I le tele o talaiga sesē ua fa’asesēina ai le ola fa’atuatua o le au Kerisiano i Efeso. Ua avea ma ala o le a ō ese ai tagata Kerisiano mai a’oa’oga fa’ale Atua. O fiafiaga o le ola e tōsina ai le manao o le tagata, o nisi ia o mea e tāua i le tagata soifua. A o upu fa’amanatu a Paulo ia Timoteo, i le tāua o le fa’amasani i le amio Atua.

O le soifuaga o loo tatou ola ai, e tele ni luitau ma fa’afitauli e feagai pea ma i tatou. O luitau ma fa’afitauli e mafai ai ona fa’amalosia pea o tatou tagata, i aso lē faigofie o le ola. A o nisi fa’afitauli ma luitau, e mafai ai foi ona aafia ai le ola taumafai o le tagata. Ona fai lea ma ala e solomuli gōfie ai le ola taumafai o le tagata. O upu a Paulo ia Timoteo ma lana fa’amalosi mo le Ekalesia i Efeso, ia mau pea le toovae ma ia fa’amasani pea i le amio Atua. Mafuta pea i le Atua i le tatalo.

Tatalo: Le Atua e, ia agalelei mai lau afio i o matou tagata, ina ia o matou iloa ona ola i lau afio ma faia pea lou finagalo. **Amene!**

Aso Tofi – Me 2: “Fa’apopotoga fetausia’i” *(A community of care)*

Tusi Faitau – 1 Timoteo 5:1-16

Matua – ff. 1e-2: *“ō taulele’a foi, peisea’i o uso; o loomatutua, peisea’i o tinā; o fafine muli foi, peisea’i o tuafafine ia, ma le amio mama lava.”*

I le vaega lea o le tusi, o loo atagia mai ai le vā fetausia’i i totonu o le Ekalesia. O loo tā’ua i le vaega lea o le tusi le tāua o mafutaga a le ‘au Kerisiano. E ui i le tele o fa’afitauli o loo feagai ma le au Kerisiano, e le’i avea lea ma ala e tuua ai le toe fa’amanatu a Paulo iā Timoteo. Ia faia pea lona tiute ma lona valaauina mo le

'au Kerisiano i Efeso. Ua fa'amanatu e Paulo iā Timoteo ia silasila i le Ekalesia e pei o se aiga, ma ia maua pea le ola fetausia'i pe a manaomia le fesoasoani.

O upu fa'amanatu a Paulo iā Timoteo e fa'atupu manatu i lo tatou foi vaitau ma fa'afitauli o loo tutupu i soo se mafutaga. O ai e ave iai le fa'amuumua i totonu o se mafutaga? O le vā fetausia'i ma le fa'aaloalo o aga ia e tāua i le tagata soifua. Ina ia maua ai pea le vā fetausia'i lelei o le isi tagata i le isi. 'Aua lava ne'i manatu fa'apito poo ai e pa'ū iai le fa'amuumua o le vā nonofo ai ma fetausia'i. O le ala lea o le toe tusi fa'amanatu a Paulo iā Timoteo mo le Ekalesia i Efeso, i le tāua o le fetausia'i i totonu o mafutaga.

Tatalo: Le Atua alofa e, ia fa'atasi pea lau afio ma i latou o maua i fa'anoanoaga ma le loto fa'avauvau i lenei vaitau. **Amene!**

Aso Faraile – Me 3: “O le lu'itau o le ta'ita'iga” (*The challenge of leadership*)

Tusi Faitau – 1 Timoteo 5:17-25

Matua – f. 21: *“Ou te matuā fai atu lava iā te oe i luma o le Atua, ma Keriso Iesu, ma le 'au agelu na filifilia, ina ia e tausi i na mea e aunoa ma le alofa fa'apito ma le fa'ailogaina o se tasi.”*

O Timoteo ma lona tulaga a o iai i le Ekalesia i Efeso, na fai o ia ma ta'ita'i. O le manatau maualuga o Paulo ia galulue fa'atasi ma toeaiina o le Ekalesia. O le ave o Timoteo e fai ma ta'ita'i, e mafai ona maua ai le avanoa e faitauina ai ma ta'uvaleaina ai lona soifua galue. A o lu'itau e tofotofo ai Timoteo i le ave ai o ia ma ta'ita'i. Na toe polili ai Paulo Timoteo ina ia tautuana, le faia o lana galuega e aunoa ma le alofa fa'apito ma le fa'ailogaga tagata.

O le tulaga fa'a-ta'ita'i, e tele ni lu'itau e afua mai ai. O fa'afitauli e tutupu mai ona o le tofi ma fa'afitauli e pogai mai i le si'osi'omaga. I lenei vaitau ua tatou iai, e aga eseese lava le tagata ia ma lana ta'ita'iga. O ta'ita'iga ua fai ma le loto alofa, a o nisi foi o ta'ita'iga ua fa'aalia ai le malosi o le tagata. A o le fa'amanatu a Paulo mo Timoteo na iloa ai le ituaiga ta'ita'i e iai Paulo. Le ta'ita'i e fa'alagolago i le Atua i taimi e feagai ai ma lu'itau o le galuega. Le alofa naunau o Paulo iā Timoteo ina ia fa'alagolago pea i le Atua ma tausi i a'oa'oga na ia maua.

Tatalo: Le Atua mamana e, agalelei lau afio i lo matou ola ofoina mo oe, ina ia 'aua ne'i fa'apito lo matou ola galulue. **Amene!**

Aso Toona'i – Me 4: “Lu'itau ma le fa'amalieina”

Tusi Faitau – 1 Timoteo 6:1-10 (*Challenge and contentment*)

Matua – ff. 6-7: *“A o le amio Atua ma le loto malie, o le oloa tele lava lea. Auā tatou te le'i 'aumai lava se mea e tasi i le lalolagi, ua mautinoa foi tatou te lē mafai ona ave 'ese ai o se mea.”*

Ua tatou taunuu mai i le si'ui o lenei vaiaso a o tatou mafaufau i upu fa'amalosi 'au a Paulo iā Timoteo. Ua tatou molimauina le tele o fa'afitauli o loo feagai ma le Ekalesia i Efeso. O le faitauga o lenei aso, o nisi o upu tima'i a Paulo iā Timoteo mo le Ekalesia i Efeso. I le vaitau o Paulo ma Timoteo, o le vaitau o le fa'apologaina e matai o latou auauna. O le matai lava ma lana auauna o loo la mafuta, ma faia pea tiute fa'a-matai, fa'apea foi tiute fa'a-auauna. O le tele o tala'iga sesē, ua fai lea ma fa'alavelave i le galuega a Timoteo. O le naunauta'iga a Paulo ma ana upu fa'amalosi mo Timoteo, ia tausisi pea i a'oa'oga na ia fautuaina ai mo lana galuega i Efeso.

E le’o atugalu Paulo ona o le faiga fa’apologa e matai o latou auauna, ‘ae o loo fa’amalosi’au Paulo ma ia taumafai e lalaga le sootaga i le vā o le matai ma le auauna, e ala i le fealofani. I lo tatou vaitau o loo tatou ola ai, tatou te le’o pologa ona o le pule a nisi. O lo tatou pologa e atagia ina ua leai se nonofo lelei ma se fealofani i totonu o mafutaga. Ua fa’amalieina le manao i tamaoaiga ua maua, ‘ae ua galo ai le ola fetausia’i i le vā fesoota’i. O le fa’amanatu a Paulo, o le ola e taula’i i le Atua e mautinoa le filemu. O iina tatou te maua ai le loto ua fa’amalieina.

Tatalo: A’oa’o mai lau afio iā i matou ma ia foa’i mai le loto mamā, e fa’atino ai ma le loto malie la matou auaunaga i lau afio. **Amene!**

TUSI IA TIMOTEO (2)

Aso Sā – Me 5: “Avea ma soo” (Discipleship)

Tusi Faitau – 1 Timoteo 6:11-21

Matua – f. 20: *“Timoteo e, ia e tausi i le mea na tuuina atu iā te oe. Ia ‘alo’alo ‘ese i upu leaga ma le lē aogā, ma finauga i mea ua igoa pepelo ai o le iloa.”*

Pe a sauni fanau e tuua le mafutaga ma matua mo sailiga manuia, o taimi ia e toe polili ai e matua fanau i fautuaga ma tima’iga ina ia tapena ai le ola o fanau. Le matua e nau alofa ma e auau i le ola faia’e o fanau. Le naunau alofa lea o Paulo iā Timoteo, ina ia aua ne’i galo iā Timoteo le avea ai o ia e fai ma ta’ita’i i le Ekalesia i Efeso. O upu tima’i a le Aposetolo ina ia mausalī ai pea le fa’atuatua o Timoteo i le faia o lana galuega. Le galuega a Timoteo o loo atagia mai ai lona soifua fa’a-soo.

I le vaitau lenei ua tatou iai, tele ni lu’itau ma fa’afitauli e feagai pea ma le tagata i lenei soifuaga. O le tele foi o fanau ua tuua aiga ma matua, ‘ae ua sa’ili o latou lumana’i i atunuu mamao. O le matua nau alofa, e lē mapu le faufautua ma le fa’amanatu pea i fanau le mafuaaga ua tuua ai le latou mafutaga, ae malaga i atunuu mamao. Pei foi o upu fa’amanatu a Paulo iā Timoteo, ia ‘alo’alo’ese i upu leaga ma mea e lē aogā. O le fa’amanatu a le Aposetolo na iloga a lona aofa naunau iā Timoteo, e lē gata iā Timoteo, a o lona alofa i le galuega a le Atua.

Tatalo: Le Alii e le Atua, a’oa’o mai ina ia o matou iloa lou finagalo i lo matou ola, ma ia fo’ai mai le lototele matou te faia ai lou finagalo. **Amene!**

Aso Gafua – Me 6: “Fa’atuatua e fa’afaiilele” (Faith nurturers)

Tusi Faitau – 2 Timoteo 1:1-14

Matua – f. 14: *“O le mea lelei ua tuuina atu iā te oe, ia e tausia i le fesoasoani o le Agaga Paia o loo nofo i totonu iā i tatou.”*

O faiva o le tinā i totonu o tatou aiga, o latou faiva alofilima o le fa’afaiileleina lea o le ola. E lē gata i le tausia o le ola i le tino, ‘ae o le fafagaina o le mafaufau i upu ma tala, ina ia tupu ma ola le mafaufau o le tagata. I le tusi faitau o lenei aso, o iai nisi ia o upu fa’amalosi a Paulo mo Timoteo, ina ia manatua pea a’oa’oga a ona tinā. O ona tinā na o laua fa’afaiilele ma fafaga i lona ola i la le Agaga. Timoteo ma lona feagai ai ma le galuega i Efeso e le’i faia na’o ia. A o le galuega alofa a Paulo i lona fesoasoani pea ma lona fesoota’i pea iā Timoteo, i le tele o ana upu fa’amalosi, ina ia tapui ai pea le soifua galue o Timoteo mo lona valaauina.

E tūa le fa’afaiileleina o le fa’atuatua. O se tasi lea o mea e tūa i le ola o le tagata soifua. A lelei ona fa’afaiilele le ola fa’atuatua, ona faigofie lea ona fesaga’i

ma faigata. E tatau ile tagata ona taofi mau a'oa'oga o le fa'atuatua na a'oa'oina ai i tatou. O le fa'atuatua ua mausalī lona fa'avae, e lē fesiligia lona taunuuga.

Tatalo: Le Atua mamana e, fa'amatala loto mai e lau afio ia i matou lou finagalo, ina ia matou iloa ona avea ai ma soo i lau galuega. **Amene!**

Aso Lua – Me 7: “Aiga o le fa'atuatua” (Families of faith)

Tusi Faitau – 2 Timoteo 1:15—2:13

Matua – 2 Timoteo 2:2 *“O mea foi na e fao'alogo mai ai iā te a'u i luma o molimau e to'atele, ia e tuuina atu ai i tagata fa'amaoni, o e ua mafai ona a'oa'oina atu i nisi.”*

I le vaega lea o le tusi a Timoteo, o loo atagia ai le gagana o mafutaga i totonu o 'āiga. O nisi o upu apoapoa'i a Paulo ina ia tumau pea lona fiafia i le galuega a le Alii. O le fa'asoa a le Aposetolo ua matua lona iloa i le galuega. O le fa'asoa fa'ale-'āiga fa'atuatua, ina ia tāofi mau pea i a'oa'oga faavae. Le ata o le 'āiga o loo aumaia i le vaega lea o le tatou tusi faitau ina ia manino pea Timoteo i lona valaauina, ma tumau pea lona fai 'āiga lelei i Efeso.

O le tagata ma lona tupu'aga, o le tagata foi ma lona fa'asinomaga. O le soifua fa'atuatua o le tagata, e amata mai i totonu o le li'o o le 'āiga. O le 'āiga, o le fa'atusa o mafutaga maopoopo. E iai foi taimi e feagai ai le aiga, ma fa'afitauli o le soifuaga. A o fa'afitauli e tofotofa ai le ola fetausia'i, ma le felagolagoma'i. O ā lava fa'afitauli o le ola e fetaia'i ma le tagata, ia 'aue ne'i fai ma ala e galo ai le fa'asinomaga, o le 'āiga. Taofi mau pea le i'umaea o le fa'atuatua i le Atua.

Tatalo: Le Alii e le Atua, ia iai lou alofa ma lou agalelei i nai o matou 'āiga, o nuu, ma Ekalesia. **Amene!**

Aso Lulu – Me 8: “Valaau e auauna i le Atua” (Calling to serve God)

Tusi Faitau – 2 Timoteo 2:14-26

Matua – f. 15: *“Ia e taumafai e avea oe ma lē ua fiafia mai i ai le Atua, o le faigaluega e leai se mea e mā ai, na te tala'itonuina le upu moni.”*

O le tagata e ta'imua mo mea lelei, o se tasi lea o matāfaioi tāua. E ui i lona tāua, 'ae le'o se matāfaioi e faigofie foi. O upu fa'amalosi'au a Paulo iā Timoteo, ina ia auauna ma le agaalofa, lototele ma le onosa'i. O ta'iala tāua ia na fautuaina ai e Paulo ia Timoteo mo lana auaunaga. O le lapata'iga a Paulo mo Timoteo, ia vaavaai toto'a iā te ia ma lona valaauina, o ia o le auauna a le Atua. O mau tau'ave a Samoa, “Fa'avae i le Atua Samoa.” O upu na fausia mai i le fa'avae ua mautū ma mausalī. O tōfiga ua o tatou maua, e le'o ni tōfiga e su'e ai ni o tatou viiga, pe lagilagi ai foi ni o tatou mamalu. O le valaauina o Timoteo ma lona soifua 'au'auna i le Atua, e fa'apeanā foi lo tatou valaauina. O le fa'amanatu a le Aposetolo, ia fai ma le fa'autauta le soifua auauna o le tagata i tōfiga ua tatou maua.

Tatalo: Tauto'alua lo matou ola auauna i lau afio i soo se ala. **Amene!**

Aso o le Afio a'e

Aso Tofi – Me 9: “Fa'apotopotoga o le 'au fa'atuatua”

Tusi Faitau – 2 Timoteo 3:1-17 (Community of all believers)

Matua – f. 17: *“Ina ia atoatoa ona lelei ai o le tagata o le Atua, ia saunia lava ia i galuega lelei uma lava.”*

O le fa'atuatua, e amata mai i totonu o 'āiga. E fa'afaileleina e ala i galuega a matua ma le 'āiga. I le vaega lea o le tusi a Timoteo, o le fa'amatalaina lea o nisi o

mea o le ā tutupu. O Paulo, ua loa lona soifua tautua ma ua lava foi lona tomai i le galuega a le Atua. A o ana upu apoapoa'i mo Timoteo, e fa'amanatu ai pea le t̄aua o le galuega a le Atua. Le t̄ofā fa'ale-Atua ma le uta e fetala'i o loo i le Aposetolo, i lona taumafai pea e apoapoa'i iā Timoteo, ina ia fa'amalosia lona soifua mo le Atua. O le fa'atuatua o le tagata Samoa, e amata mai i totonu o 'āiga, ā'oga Aso Sā ma le autalavou. O le t̄ō'ala fanau lea o le soifua fa'atuatua o le tagata Samoa. Le fa'at̄ofāla'iga a le Atua ma lona finagalo tatala, i auala eseese ina ia mafuta ai lana fanau Kerisiano e pei ona tatou fa'aaogāina pea i lenei vaitau. O le fa'amanatu a le Aposetolo, e t̄aua le ola fesoota'i ma le Atua i taimi uma.

Tatalo: Le Atua Paia e, foai mai le loto fou, ina ia mafai ai ona matou feagai ma faigata o lenei soifuaga, ina ia mausalī pea lo matou fa'atuatua. **Amene!**

Aso Faraile – Me 10: “Tuufa’asolo le ofu talaloa” (*Passing the mantle*)

Tusi Faitau – 2 Timoteo 4:1-8

Matua – f. 2: *“Ia e tala'i atu le upu, ia e fa'amalosi i ona aso e taugalemu ai, ma aso e lē taugalemu ai, ia e fa'atonu atu, ia e aoa'i atu, ia e apoapoi atu ma le onosai uma atoa ma le a'oa'o atu.”*

O taleni ma agavaa eseese ua tatou maua, o t̄ofiga na valaauiina ai i tatou e le Atua. I le fa'ai'uga o le tusi a Timoteo, o loo taoto ai lagona tausī galuega lelei a Paulo. O le ālafua ua fa'ataoto e le Aposetolo mo Timoteo: o le avea ma auaina e tautua i le Atua, o le galuega lea e tuufa'asolo i augātupulaga o le lumana'i. O alofa'aga molipō ia a Paulo, e lē gata mo Timoteo, a o le 'au fa'atuatua i le Atua e tapena ai le āga atu i le lumana'i.

O le Atua e ana t̄ofiga ma e pule aoao i lana foafoaga. I nei aso, ua tele t̄ofiga maualuluga i totonu o galuega ua tatou maua, ae fa'apea totonu o aiga, nuu ma Ekalesia. Ua avea t̄ofiga maualuluga ua tatou maua, ua tatou manatu ai ua tatou maua le pule, ona sesē ai lea o le fa'amamafa. Ua fua le galue a le tagata i le togoti e maua. O ā lava t̄ofiga eseese ua tatou galulue ai, ia faia ma le onosa'i. Poo ā lava fa'afatiātama'i o le ola e tutupu fa'afuase'i, ia manatua e tuāoi afā ma maninoa.

Tatalo: Le Atua e, matou tatalo mo au fa'amanuiaga ma lau taitaiga i tupulaga talavou mo le lumana'i; ina ia fai ma au meafaigaluega t̄aua. **Amene!**

Aso Toona'i – Me 11: “Māvaega o le fa'amanuia” (*Farewell blessings*)

Tusi Faitau – 2 timoteo 4:9-22

Matua – f. 22: *“Ia i ai i lou agaga le Alii. Ia iā te outou le alofa tunoa.”*

Ua mae'a le vaiaso i feau ma faiva, i le fetaaloloa'i o le atunuu i tiute eseese. A o toe upu a Paulo ia Timoteo, ua toe fa'atepa ai Timoteo i le amata mai o lana galuega. E lē gata i lena, ua fa'ailoa mai ai ma i latou uma sa lagolago iā Timoteo ma lona valaauiina. O le Atua lava ia e tautoaluaia i tatou. Ia manatua pea le Atua i le fa'atinoina o ou faiva fa'asoo. O le gasologa masani o le ola, e iai māvaega a tua'ā e mavae ai i fanau. O māvaega ina ia tausī ma mulumulitai iai, ina ia maua le manuia. O le māvaega a Paulo iā Timoteo, o le māvaega e fa'avae i le Atua, ina ia lalaga ai le sootaga o le ola galue o le tagata ma le Atua. O le māvaega sili lea ona t̄aua i le ola fa'aKerisiano. O a ni māvaega o loo tatou taumafai iai mo se taunuuga, aua ne'i galo le sootaga ma le Atua. Ia avea o tatou tagata, e tuumāvaega iai le Atua. Fa'alagolago i le Atua ma le loto atoa, ona ia aumaia lea o le fa'amoemoe ola ma le mautinoa i o tatou loto.

Tatalo: Lo matou tamā e o i le lagi, ua matou tatalo mo nai o matou ‘āiga o matou valavala pea, ona o sailiga manuia i soo se tafa o lenei lalolagi. **Amene!**

“E Aoga le Kamela ...” (*Camels are Useful for ...*)

Aso Sā o Tinā

Aso Sā – Me 12: “... e manumālō ai i se faletua”

Tusi Faitau – Kenese 24:15-27 (*... winning a bride*)

Matua – ff.19-20: *“Ua uma ona avatu iā te ia e inu ona fa’apea atu lea o ia, ou te utufia foi ma au kamela, seia latou feinu ai ia malilie. Ona fa’ataalise lea o ia ma sasaa lana kate i le umete, ona toe momo’e ifo lea o ia i le vai e utu a’e, i le ua utu a’e e ia o ana kamela.”*

O loo fa’amatala e le matua o lenei aso le galuega alofa a Repeka na faia mo kamela. O le manu e telē sona aogā e malaga ai i totonu o le toafa. E lē gata i le aogā o kamela o loo aumaia i upu o le tatou matua, a o le sailia ai foi e Aperaamo o se toalua mo lona atalii o Isaako. O le auala ma le gaioga na fa’atinoina e Repeka, ma o le amataga foi lea o le laua mafutaga ma Isaako. O le Atua e galueaina fa’amoemoega uma o le tagata i auala eseese. I lenei foi vaiaso fou ua o tatou savalia, ia fai le Atua ma auala e toe sosoo ai ni mafutaga ua feeseesea’i ona o fa’afitauli e tutupu i lo tatou ola. O lenei soifuaga ua tatou iai, e iai lava le fili i mafutaga ua lelei ona tatou faia. O le manu o le kamela e tele lona āoga i totonu o le toafa ona o le nofoaga e vevela. E fa’apea foi i le vā feagai o le tagata ma le Atua. I taimi e lutia ai le ola o le tagata i le vevela o faigata o le soifuaga, o le Atua e faimalaga fa’atasi ma le tagata. E to’a i le Atua faigata uma o le ola.

Tatalo: Lo matou Tamā e o i le lagi, ia o matou iloa oe i taimi lelei o le ola, fa’apea foi taimi e feagai ai i matou ma fa’afitauli e tutupu mai. **Amene!**

Aso Gafua – Me 13: “... e manumālō ai i se uso”

Tusi Faitau – Kenese 32:9-21 (*... winning a brother*)

Matua – f.20e: *“Auā na fa’apea a ia, ou te fa’alaualelei iā te ia i le mea alofa o loo o muamua atu iā te a’u, mulimuli ane foi ou te iloa atu i ona fofoga; atonu e tali lelei mai o ia iā te a’u.”*

O lagona na oo iā Iakopo, ina ua sauni ai e alu se’i asi lona uso o Esau; lona uso na ia agaleagaina ma ia fāoa ai manuia o le ulumatua. E ui lava i le agaleagaina e Iakopo o Esau, ae na maua lava e Esau le loto fa’amagalalo mo lona uso. Ua lē manatu lava Esau i le agaleagaina e lona uso i le tele o tausaga ua mavae, ae na ia talia ma le agaga alofa lona uso i lona toe foi mai.

I nei aso ma ona suiga o le olaga, ua faigata ona toe maua ni tagata fa’apea. O le tau i le leaga i le lelei. O aso nei ua lē maua se loto fa’amagalalo i le va o le isi tagata ma le isi tagata. Ua avea lea ma ala ua punitia ai le va fealofa’i i totonu o mafutaga. Ua faigata ona maua le loto fa’amagalalo ona o lagona ma manatu o le tagata ua fa’asausili. Ona mafua ai lea ona tutupu misa ma lē maua ai se nonofo lelei. Ia manatua pea le tāua o le vā fetausia’i ina ia maua ai pea le nonofo lelei.

Tatalo: Le Atua e, ua e silafia o matou loto alolofa i lau afio. Fesoasoani mai ina ia mafai ona matou alolofa i isi, e pei ona matou alolofa i lau afio. **Amene!**

Aso Lua – Me 14: “... e manumālō ai i se taua” (*... winning a war*)

Tusi Faitau – Fa’amasino 7:9-14

Matua – f.14: *“Ona tali mai lea o le tasi, e leai se isi mea lenei, ua na’o le pelu a Kitiona le atalii o Ioasa, o le tagata o Isarael lea; ua tuuina atu e le Atua i lona lima o Mitiana ma le itu taua uma.”*

I le feagai ai o Kitiona ma se au tau ua lē ma faitaulia, na mafai ai ona oo lagona popole i lana ‘au tau, ona ua toatele le numera o le isi vaega, ae ua lē fa’apeaina i latou. Aepeita’i, e le’o so latou malosi, a o le i’uga o le taua na mafai ona latou iloa e ala i le miti. E le’o se atamai la poo se malosi o le vaega au a Kitiona ua o latou maua, a o le finagalo fa’aali o le Atua mo i latou e ala i le miti.

Ioe, o le fausiaina o se mālō, e lē manaomia ai ni tagata e manatu faualuga. O le finagalo o le Atua, ma le ola fa’alagolago o le tagata i le Atua, o aupega sili lea e fia silasila iai le Atua. E lē mafai ona tatou o i le Atua ma o tatou manatu ua tatou maua le malosi ma le tomai. Ia tatou manatua pea lo tatou fa’atauvaavaa ma lo tatou gaogao, o iina e fa’aali mai ai le Atua i le tagata.

Tatalo: Le Atua agalelei e, o lou finagalo lava ia matou faia. Foa’i le malosi ina ia o matou manumalo ai i taua eseese o lenei soifuaga. **Amene!**

Aso Lulu – Me 15: “... e fa’aoloina ai” (... making money)

Tusi Faitau – Isaia 60:1-6

Matua – ff. 5-6: *“Ona e vaai ai lea, ma e olioli; e polepole oe ma fiafia tele lou loto; auā e līua mai iā te oe le oa o le sami; e oo mai iā te oe le oloa o nuu ‘ese. E ufitia oe i le vao kamela e tele, o kamela taanoa o Mitiana ma Efa; o i latou uma mai Seepa e o mai; latou te aumaia auro ma pulu lipano, latou te tala fiafia i viia o le Alii.”*

O le tamaoaiga, o vaega tāua ia o le soifuaaga o le tagata. O upu a le perofeta o Isaia o loo momoli mai ai le finagalo alofa o le Atua ma manuia e maua e ona tagata. E tele tamaoaiga o le Atua ua tatou maua i auala eseese. O mea anagata e pei ona aumaia i le tatou matua, o manuia ia e afua mai i le Atua. O loo aumaia ai foi le ata, o le fa’asoa a’i o tamaoaiga o le Atua ua tatou maua.

I lenei vaitau ma le tele ai o fa’alavelave i totonu o ‘āiga, nuu ma Ekalesia, o tupe lava e manaomia. O tamaoaiga ia o loo iai foi le vaega tāua o loo fa’atinoina i lo tatou ola. Ae peitai, ua aveva lava le tele o tamaoaiga ua maua, ma ala ua sesē ai ma le fa’amuamua a le tagata i lona va feagai ai ma le isi tagata. Ua tauau ina fa’asili tupe ma mea ua maua, nai lo aiga ma totonu o mafutaga. Ua fai lava tupe ma fa’afitauli i lenei soifuaga o loo tatou iai nei. E le’o le tele o tupe ma mea ua maua, a o le ola fa’asoa ma le ola fetufa’a’i, o lona tāua lea.

Tatalo: Le Atua o manuia, ia matou iloa le tāua o le ola fa’asoa. **Amene!**

Aso Tofi – Me 16: “... e fai ai se ofu” (... making a coat)

Tusi Faitau – Mataio 3:1-10

Matua – f.4: *“A o Ioane ia, sa ofu i le fulufulu kamela, ma le fusipa’u i lona sulugātiti; a o ana mea e ‘ai, o sē akerise ma le meli vao ia.”*

E aoga ofu e puipui malu ai le tino mai le vevela o le la, fa’apea le malulu o le po. Ua tā’ua i le tatou matua le fulufulu kamela na ofu e Ioane i le taimi na amata ai lana galuega. O le fulufulu kamela na mafai ona puipuia ai lona tino. A o le tāua o le ufi malu mo le tino mai le aafia ai i ni mea e ono lavea ai. O le fulufulu kamela o loo tā’ua i le tatou matua, o mea ia na fa’aaogaina i le vaitau o Ioane e fai ai ofu na o latou fa’aaogaina. Le tāua o manu ma lo latou fesoota’iga i le tagata. O upu a

Mataio ua fai ma matua, ua aumai ai le tãua o ofu mo le ola o le tagata soifua. I lo tatou foi atunuu ma auala na o tatou fa'aaogaina e gaosi ai tatou ofu, e ese foi. Na o tatou fa'aaogaina lau o laau i tausaga e tele ua mavae, ina ia ufi malu ai o tatou tino. O le tomai na maua e tua'ã ina ia gaosi ai ofu ina ia tatou fa'aaogaina. O nisi nei o tamaoai na fa'amanuia ai i tatou e le Atua. O le tomai ma le mafauau tatala na tuuina e le Atua i le tagata, e ala i le fa'aaogaina o le natura o le foafoaga a le Atua. Na fa'apea foi i le vaitau o Ioane. Le fulufulu o le kamela na fai ma ona laei a o faia lana galuega o le papatisoina o tagata. Ia o tatou manino i le tatou va fesooteai ma le foafoaga a le Atua ma lona fa'aaogaina.

Tatalo: E le o ofu, a ia matou iloa le va fesooteai ma lau foafoaga. **Amene!**

Aso Faraile – Me 17: “... e fa'amautū ai se manatu” [1] (... making a point)

Tusi Faitau – Mataio 19:16-26

Matua – ff.23-24: *“Ona fetalai atu ai lea o Iesu i ona soo, E moni, ou te faiatu iā te outou, e faigata ona sao atu o le mau'oa i le mālō o le lagi. Ou te faiatu foi iā te outou, e faigofie ona ui atu o se kamela i le pū o le au, 'ae faigata ona sao o le mau'oa i le mālō o le Atua.”*

O upu tuu sa'o a Iesu na pa'ū mai ona fofoga, ina ia fa'amalamalama ai le ola e tataua ona faia e le tagata ina ia lelei ai ma atoatoa. Silafia e le Alii o Iesu le tagata ua ia maua mea e tele. Le ata fa'atusa na tau fai ofo ai ona soo, ina ua tali e Iesu le fesili e le tagata i lona fia maua o le ola e fa'avavau. Le tagata ua lē manatu ina ia manuia nisi, ae ua na'o ia lava. Le saunoaga manino lea a le Alii o Iesu na iloga ai lona tulaga Atua i le va ma le tagata.

O le a se mea lelei ou te fai, ina ia oi ou maua ai le ola e fa'avavau? O le fesili a le tagata ua tofotofo ia Iesu. O le soifuaga lenei o loo tatou ola fa'atasi ma fa'afitauli. Tatou te taumafai pea mo so tatou lelei, ma ia o tatou fesoasoani mo nisi o loo mana'omia le fesoasoani. Poo le a lava la lo tatou taumafai mo ni mea lelei, e iai lava le taimi o le fili e lepetia ai mea lelei ua tatou taumafai ai. O le ola e fa'avavau, e mo tagata uma. E lē fa'apito mo i latou ua iai ni tofi maualuluga ma ni tagata e mau'oa. O lo tatou ola pea ma sa'ili i le Atua mo lona finagalo, ona tatou maua lea o le ola e fa'avavau.

Tatalo: Fesoasoani mai ina a tonu a matou fa'ai'uga fai. **Amene!**

Aso Toona'i – Me 18: “... e fa'amautū ai se manatu” [2] (... making a point)

Tusi Faitau – Mataio 23:13-24

Matua – f.24: *“O outou ta'ita'i tauaso, ua outou fa'apilia le namu, a ua outou folo atoa le kamela.”*

O upu a Iesu ona o le amio leaga a le au tusiupu ma le au faresaio, e pei ona iai le tusi faitau o lenei aso. O le au tusiupu ma le au faresaio lea o loo tulituliloa. O tagata nei na fai ma fa'alavelave i le vaitaimi o le galuega a le Alii o Iesu Keriso. O mea ua latou faia ua leai se alofa i le va feagai ma isi o tagata. Aepeitai, ua fetalai manino mai Iesu ina ia iloa ai e tagata, e leo sa'o le latou galuega o loo faia. Ua fai le galuega ma le fa'amoemoe mo so latou lava manuia. O i latou tonu lava ia o le fa'afitauli o lana galuega. Ua na'o na ta'ua o le au tusi upu ma le au faresaio, ae ua fai i latou ma tā'iga leaga mo nisi.

E le taumate foi, e toatele lava le 'au tusi upu ma le 'au faresaio o loo tatou mafuta pea i lo tatou vaitau. O le tuu a lalo a le talalelei mo i tatou ma le tatou

faigamalaga, silasila ma le toto'a i tagata fa'apea o loo tatou mafuta. E foliga mai lava o loo lelei pea mafutaga, ae o tagata lava ia e fai ma fa'alavelave i lo tatou ola taumafai. Faia fa'aiuga sa'o, ina ia manuia ai nisi o fia maua le fesoasoani. E le'o le mafana o le mafutaga ma le au tusi upu ma le au faresaio, ona fa'aitu'au ai lea o fa'aiuga fai. Maua le agaga alofa ma fa'amamāavega mo i latou o mafatia.

Tatalo: Ia matou iloa ona faasoa atu lou alofa i isi. **Amene!**

AUMAIA LE TALALELEI MA FAUSIAINA LE EKALLESIA (1)

BRINGING GOOD NEWS AND BUILDING THE CHURCH

Aso Sā Penetekoso

Aso Sā – Me 19: “Sa fa’ataasi uma” (*All were together*)

Tusi Faitau – Galuega 1:12-26

Matua – ff. 24-25: *“Ua tatalo foi i latou, ua fa’apea atu, “Le Alii e, o oe o lē silafia loto o tagata uma lava, ia e fa’ailoa mai poo ai so laua nei ua e filifilia, na te maua le tofi o lenei faiva o le Aposetolo, na lafoa’iina e luta ina ia alu o ia i lana lava mea e nofo ai.”*

Soo se fa’amoemoe lava e tapena, e tatau lava ona iai se fuafuaga ina ia fai ma ta’iala mo le fa’amoemoe o tapena. O le fuafuaga na fa’ataoto e Iesu mo ona soo, i le filifilia ai o nisi e fai ma Aposetolo. Le Atua e na te fuafua lelei mea sili mo le ola o le tagata. E tatou te mana’omia pea le Atua e fai ma fa’avae o a tatou galuega ua tōfia ai i tatou e galulue ai. Le ala lea na o latou sa’ili ai pea i le Atua e ala i le tatalo, ona ua latou fia maua se tali mo i latou. Fuafuaga a le Atua mo le ola o le tagata, na ia fa’aali manino ai i lana tali atu e ala i le tatalo. O a latou tatalo na tōfia ai Matatia ina ia fai ma sui e avea ma Aposetolo o le galuega a le Alii.

O le agaga o le Atua e mafutaina le tagata, o ana meaalofa ia ua ia foa’i fua ina mai. A o le tagata ma lona va e fesoota’i pea ma le Atua e ala i le tatalo. O le fa’avae mautu lea o le ola o le tagata ma le Atua. O nei aso ua lē faigofie ona o fesuia’iga e tutupu pea. Tatou te mana’omia pea le Atua ma lona mafuta mai i o tatou tagata. Tatou te le tatalo ona tatou nofonono lea e fa’atali mo se tali. Ia o tatou tatalo ma o tataou galulue pea ina ia mautinoa le fesoo ta’i mai pea o le Atua i lo tatou ola taumafai. Faia pea o tatou tōfiga e pei ona tōfia ai i tatou. ia avea i tatou ma ni Aposetolo e fa’amoemoeina e le Atua ma lona finagalo.

Tatalo: Le Atua e, ia avea a’u ma ave feau mo lau galuega. **Amene!**

Aso Gafua – Me 20: “Iloa Iesu” (*Knowing Jesus*)

Tusi Faitau – Mataio 16:13-20

Matua – f. 18: *“Ou te fai atu nei a’u iā te oe, O Peteru oe, ou te ati a’e foi la’u ekalesia i luga o lenei papa, e lē mafaia foi e faitotoa o seoli ona manumalo i ai.”*

Tatou te iloa Iesu ma ona tala, e amata mai i totonu o tatou aiga, Aoga Aso Sa, ma le ola su’esu’e i le Tusi Paia. O le tali a Peteru i le fesili a Iesu, na manino ai le malamalama o Peteru iā Iesu. Le agaga o le Atua na iai ma Peteru ina ia fesiligia e Iesu. Le tagata ua malamalama i lo la vā fesoota’i ma le Atua. Le tali a Iesu na iloga ai lona tulaga Atua. Peteru ma lona iloa o Iesu e le’i ta’uina e se isi, a o le Atua lava. E ui lava foi o Peteru ua ta’ua o le soo osovale, aepeitai e iai lava le fa’amoemoe o le Atua mo soo se tagata.

O iai ea ni Peteru o loo totoe i o tatou vaitau? Pe ua tatou iloa lelei ea Iesu ma le mafuaaga o lona iai i le lalolagi ma ona tagata? Ioe, o le afio mai o Iesu i le

lalolagi ma fa'atino lana galuega, o le fa'amoemoe lena o le Atua mo ona tagata puapuagatia. O le a ea se tatou tali atu, pe a fesiligia e Iesu tatou? Ua uma ona aoaoina i tatou ma ua tatou malamalama foi i tala e uiga ia Iesu. Ua tatou iloa foi la ona tali le fesili a Iesu e pei o le tali a Peteru. O Iesu, o ia lava o le alo o le Atua.

Tatalo: A'oa'o mai lou finagalo mo i matou le Alii e. Ia fesoasoani mai lau afio ina ia o matou ola i lou finagalo mo i matou. **Amene!**

Aso Lua – Me 21: “Setefano” (Stephen)

Tusi Faitau – Galuega 6:1-8

Matua – f.8: *“A o Setefano, ua tumu o ia i le alofa tunoa ma le mana, ua na faia vavega ma fa'ailoga tetele i luma o le nuu.”*

O Setefano, o se tasi lea o auauna ua fa'amaoni lona fa'atuatua i le Atua, ma tōfia ai o ia fa'atasi i ti'ākono e to'afitu. O le tōfia ai o Setefano ma i latou e toaono mo le galuega a le Atua, o le tōfiga na fai lava i le finagalo o le Alii. Setefano ma lona valaauina o loo tā'ua mai e le tatou tusi faitau, na iai fa'atumuina e le Atua i lona mana ma le alofa tunoa. E lē gata foi i lea, a o vavega na ia faia na māofa ai le nuu. E ui i le potu na tuuina e le Atua iā te ia, ae na iai lava auala a le fili na mafai ai ona fa'ato'ilaloina le tagata, ma ana fa'aiuga fai. O le tōfia ai o Setefano ina ia fai ma ti'ākono ia e toafitu, e fa'apena foi le tōfia o i tatou i lo tatou taliaina o le talalelei iā Iesu Keriso. O le ofoina o le soifua o le tagata e tautua ma auauna ai i le Atua, o le tagata ua tuu atoa lona soifua i le Atua mo lona finagalo ma lana galuega. E ui i faigata o le galuega na feagai ma Setefano, ae na ia fa'amoemoe pea i le Atua e faigofie ai lana galuega.

Tatalo: Le Atua o le mata'isau, ia avea i matou ma soo o lau afio. **Amene!**

Aso Lulu – Me 22: “Papatisoga i le ala” (Baptism on the move)

Tusi Faitau – Galuega 8:26-40

Matua – f. 38: *“Ona ia faiatu lea ia taofi le taavale; ona o ifo lea o i laua uma i le vai, o Filipino ma le eunuka; ua na papatiso foi iā te ia.”*

O le papatisoina o le tagata, o le ata manino lea ua taliaina lea tagata i le li'o o le aiga o Keriso. O le alafua ua fa'ataoto mai ina ia fa'amaufa'ailoga ai le tagata ua taliaina le Atua i le agaga fa'atuatua. O le papatisoina o Filipino ma le eunuka, e ese mai i le galuega papatiso a Ioane i le vai o Ioritana. O le galuega e foliga mai e mafai lava ona fa'atinoina i soo se nofoaga o iai se vai. E ui i le tuufesili o le eunuka ina ua na iloa le vai, a o Filipino ua ia mautinoa le uiga moni ma le mafuaaga e papatiso ai le tagata. O le papatisoina o i laua i le ala, na fai ma molimau o le toe suia ai o le 'auga o lona fa'amoemoe.

O le papatisoga, na fa'avaeina i le amataga o le galuega talai a Iesu Keriso i le lalolagi. O loo fa'aauu mai pea i nei ona po. Ua avea foi le papatisoga, ma se tasi o sakarameta poo se tasi lea o sauniga tāua a le EFKAS. Lea lava la o loo tatou fa'atinoina pea i ona faiga masani e pei ona amata ma ai i le amataga. Pei foi la ona iai le faitauga o lenei aso, i le toe fa'amanatu mai ai o le tāua o le papatisoga i le soifua Kerisiano o le tagata fa'atuatua. E le'o le ave o le fa'amamafa i tu ma aga o le fa'atinoina o le papatisoga, ae e tatau lava ona tatou tali atu i le ta'ita'iga a le Agaga Paia i lo tatou ola auauna mo le Atua.

Tatalo: Le Atua e, fa'afetai i lou papatisoina o i matou i lou Agaga Paia. Ua avea ai i matou ma tagata fa'atuatua moni i lau afio. **Amene!**

Aso Tofi – Me 23: “Fa’aaogaina o se meafaigaluega a le Atua”

Tusi Faitau – Galuega 9:10-18 (*Used as an instrument of God*)

Matua – f.15: *“A ua fetalai mai le Alii iā te ia, “Inā alu ia; auā o le ipu lava o ia ua filifilia ma’u e momoli lo’u igoa i luma o nuu ese, ma tupu, ma le fanauga a Isaraelu.*

O le tatou tusi faitau lenei, e le’o fa’amamafaina meafaigaluega e fa’aaoga mo le fausiaina o se fale. O meafaigaluega lea o loo talanoaina i le tatou tusi faitau, e fa’asino lea i le tagata. O le avea ai o Saulo e fai ma Aposetolo, o se suiga na faigofie lona fa’atinoga. Aisea? Ua faigofie ona o le Atua lava le pogai. Saulo ma lona avea ai ma Aposetolo na suia ai lava lona igoa iā Paulo.

O meafaigaluega a le Atua, e uiga ese foi lona fa’atinoga. O le galuega a le Atua e fausia mai le loto o le tagata, atoa ma le tomai ua foa’iina e le Atua i le tagata, e na te fa’atino ai lana galuega. Ua avea i tatou ma meafaigaluega aogā mo le Atua ma lona finagalo. Ua fa’aaogaina ai o tatou ola, ina ia tauamitonuina ai i tatou auā le Atua ma lona finagalo fa’aali mai mo i tatou. Ia aogā o tatou aso mo le Atua, a o tatou iai i lenei lalolagi o faigata ma faafitauli.

Tatalo: Le Alii o le ola, ua avea lava Iesu ma fa’ata’imuaga lelei o lo matou ola, lea ua avea ai matou ma au meafaigaluega i lau galuega. **Amene!**

Aso Faraile – Me 24: “Ua foa’i mai e le Atua le ola ma le mānava”

Tusi Faitau – Galuega 17:22-34 (*God gives life and breath*)

Matua – f.25: *“e le o lima o tagata e auauna ai iā te ia, peisea’i ua mativa o ia i se mea e tasi; o loo foa’i mai e ia le ola, ma le mānava, ma mea uma lava i le vao mea atoa;”*

A o fa’agasolo le galuega a Paulo, na iloa ai le tulaga o le soifua tapua’i o tagata. Ua foliga mai, ua tāua i tagata le tapua’i i atua e lē iloa. E pei ua faiāina Paulo ma lana galuega tala’i. A o upu a le Aposetolo o loo atagia ai lona tomai ma lona iloa o le va feagai ai o le tagata ma le Atua, o le tāua o le ola ma le mānava na tuuina mai e le Atua i le lalolagi. O le popolega o Paulo, ne’i māmā i le manatu o le tagata le Atua ma lona alofa i le tagata. I le tele o mea ua ia faia mo le tagata, ae foliga mai ua le’o le fa’amamafa lea a le tagata i le Atua ma lona alofa i le tagata.

Ua a’oa’o mai Paulo, o le Atua o loo soifua pea e fa’avavau. O le Atua e leai sona gataaga. O le Atua na ia mānavaina le mānava ola i le lalolagi mai lava i le amataga. O le Atua na ia faufau mea lelei mo le lalolagi, ina ia tausia e le tagata ma atagia ai lona finagalo alofa. Le mānava ola o le Atua na maua ai le ola sa’oloto o le lalolagi i mea uma ua tumu ai. O le fa’amanatu a le Aposetolo, ia aoā le ola ma le mānava na foa’iina mai e le Atua mo le tagata.

Tatalo: Viia pea lau afio i aso uma o lo matou ola. **Amene!**

Aso Toona’i – Me 25: “Pisila ma Akula” (*Priscilla and Aquila*)

Tusi Faitau – Galuega 18:1-4, 18

Matua – f.18: *“Ua nofo pea Paulo i aso e tele, ona fa’amāvae atu lea o ia i le ‘au uso, ua latou folau atu i Suria, o i latou ma Pisila ma Akula; ua na sele mamā lona lauulu i Kenikerea; auā ua na fai lana tautoga.”*

A oo ina māfana se mafutaga ma tele aso o mafuta, ona faigata lea ona toe tēte’a. O upu o loo aumaia i le tatou tusi faitau i lenei aso, i le fa’ai’u ai foi o lenei vaiaso i galuega ma feau, e foliga mai ua sauni Paulo e faimalaga atu i Suria ina ia fa’aauau lana galuega. Aepeitai, ua faigata ona alu ese ona o le latou mafutaga ua mafana. Le Aposetolo ua iloga lana tautua mo le Atua ma lona finagalo. E ui lava

i fa'afitauli na feagai pea ma ia, ae le'i to'ilalo ai le Aposetolo pe fultua ai foi. O loo tā'ua ai foi le seleina o lona lauulu i le tatou tusi faitau o lenei aso. O le a sona tāua o lenei fa'atinoga i le tatou tusi faitau? O le molimau a le Aposetolo, o le aveeseina lea o mea tuai, ae tapena mo nisi mea fou.

O le mafuta fa'atasi e mafai ona fausia ai se fa'avae mautū ma le soifua galulue o tagata mo le Atua ma lona finagalo. E lē fa'apea foi o le a atoatoa ai pea ni mafutaga ua tatou osia. E iai lava pea fa'afitauli masani e tutupu pea i totonu o tatou mafutaga. O le galuega a le Atua, e omai fa'atasi lava mea lelei ma mea lē lelei. O le aogā lea o fai ma aveese mea tuai o le galuega, ae fotua'i nisi mea fou. Le ala lea na ia sele mamā ese ai lona lauulu, e aveese mea tuai, ae fotua'i nisi mea fou mo lana galuega tala'i i isi ekalesia.

Tatalo: Faafetai i lau fa'aolataga ua fa'afouina ai o matou tagata. **Amene!**

AUMAIA LE TALALELEI MA FAUSIAINA LE EKALLESIA (2)

Aso Sa Tolu-Tasi Paia / Aso Sa Faiga Taulaga

Aso Sā – Me 26: “Tito: O se atalii fa'amaoni i le fa'atuatua”

Tusi Faitau – Tito 1:1-5 (*Titus: A loyal child in the faith*)

Matua – f. 5: “O le mea lenei na ou tuu ai oe i Kereta, ina ia e fa'atonuina mea ua totoe, ma ia e tōfia toeaina i lea aai ma lea aai, fa'apei ona ou faiatu ai iā te oe;”

O Tito, o se tasi lea o atalii na fa'amoemoe iai le Aposetolo o Paulo mo lana galuega. O se tagata ua lava lona fa'amaoni i le fa'atuatua i le Atua ma lana galuega. I le tōfia ai e Paulo e fai ma ona sui e gafa ma le vaavaaiga o le ekalesia i Kereta. O le tōfia ai o se tagata ua fa'atuatuaina e le pule o se galuega e na te vaai se galuega, o le tagata lea ua ave iai le mautinoa o lē pule i le galuega, ua onomea mo ia lenei faiva. O Tito la ma laua va galulue ma Paulo, na mautinoa lava e Paulo ua onomea ona tuu le ekalesia e vaai e Tito. Na ia toe tusi fa'amanatu ai lava iā Tito, ina ia fai pea ma fa'amanatu iā Tito mea e ao ona ia faia mo lana galuega. E lē fa'apea o Paulo ua avea ma pule i le la'ua galuega. O le va fa'aleafulafula, e oloolopito vaa fa'atasi, ina ia manuia ai se fa'amoemoe.

I nei aso, tatou te mana'omia pea le tatou galulue fa'atasi. E manaomia foi e le afafulafula le fesoasoani mai o tagata lautele. O upu a le atunuu, o le tele o lima e māmā ai se avega. O le galuega a le Atua, e mo tagata uma. Ua tatou galulue i galuega eseese ua tōfia ai i tataou. O le finagalo o le Atua, e eseese lona fa'aaogaina o i tatou. E tatau pea i le tagata ona faia ona tiute e pei ona tōfia ai e le Atua i soo se ala. Ia totonugālēmū ai le Atua i a tatou fa'atinoga uma. o le tauluga o nei mea uma o loo tatou faia, ia atagia ai le alofa tunoa o lo tatou Alii. Ia tatou faia pea lona finagalo, 'ae aua o tatou loto ma le fa'atauānuu o le tagata.

Tatalo: Le Atua alofa e, ia matou sa'ili pea i lou finagalo, ina ia fa'atumauiina lau Afio i le totonugālēmū o mea uma matou te faia. **Amene!**

Aso Gafua – Me 27: “Fipe: O se fafine tāua”

Tusi Faitau – Roma 16:1-2 (*Phoebe: A woman of importance*)

Matua – f.1: “Ou te fa'aailoa atu iā te outou lo tatou tuafafine o Fipe, o le ti'ākono lea o le ekalesia o i Kenikerea;”

A o tatou iai i le mataupu mulimuli lea o le tusi a Paulo mo le 'au Kerisiano i Roma, o loo atagia ai o lana tusi o loo momoli ai ona alofa'aga mo i latou i Roma.

Ua tā'ua ai e Paulo le ti'ākono fafine o Fipe. Pe a silasila iai ma le toto'a i le tusi faitau, o loo iai se feteena'iga i tagata ma le ti'ākono fafine lea o Fipe. I se isi itu, e pei e foliga mai o loo fesiligia e tagata le uiga o le upu lea o le ti'ākono. I lona fa'amatalaina, o i latou ia ua fai ma fesoasoani i lē o loo fa'auluulu iai le galuega a le Atua. O Fipe, e na'o le pau lea o le tiakono fafine o loo aumaia i le Tusi Paia. O le aumaia e Paulo o lenei ti'ākono fafine, ona o lona agaga fafafetai ona na ia fesoasoani ma agalelei iā Paulo a o iai i le galuega.

E mafai ona tatou vaaia le ata o se tinā lelei i le tusi faitau o lenei aso. O uiga o Fipe lea ua tatou molimauina i le tusi faitau, o loo āfifi mai ai i tua, o se tinā e fa'amaopopo, fai mea lelei, ma maua le loto fesoasoani mo isi. O le tinā, o le ata fa'atusa o le ola i totonu o 'āiga. Ua avea Fipe ma fa'ata'ita'iga lelei mo le itupa o tinā, o ana galuega lelei na ia fa'atino a o iai Paulo fa'atasi ma ia. Le tinā na ia tautua ma lona mautinoa, e tali le Atua i ana galuega uma.

Tatalo: Le Atua agalelei e, ia matou sālili pea iā te oe e lē aunoa, ona matou maua lea o le mautinoa e fa'atino ai o matou tiute mo lou finagalo. **Amene!**

Aso Lua – Me 28: “O se ekalesia felanulanua’i” *(A diverse church)*

Tusi Faitau – Roma 16:3-15

Matua – ff. 3-4: *“Ua ou alofa atu iā Pisila ma Akula, na la faigaluega fa'atasi ma a'u i le galuega a Keriso Iesu. O i la'ua ia na la tuu atu o la ua e sui a'i a'u, ia a'u ola; e lē na'o a'u e fa'afetai iā te i la'ua, 'ae atoa ma ekalesia uma i nuu 'ese.”*

I le tatou faitauga o lenei aso, o loo fa'amaumau mai ai nisi o tagata o i le Ekalesia i Roma. O loo tele tagata e eseese o latou tupu'aga o loo aumai i le tusi o lenei aso. O loo iai tagata Iutaia ma tagata o nuu ese. O loo fa'amatalaina mai i lenei tala, le galuega a Paulo na ia fealua'i ai ma na fa'apea foi na ia tofia ai nisi o le au Kerisiano e fesoasoani iā te ia ma lana galuega tala'i. O i latou uma la nei ua fa'amaumau o latou igoa i le vaega lea o le tusi a Roma, na iloga foi lo latou sao mo le galuega a le Atua na auina atu e Paulo.

O le soifuaga e lutia pea i faigata. Paulo na avea ma siamupini o le talalelei ona o lona soifua ofoina atu. O lana galuega alofa na mafai ai ona tutū fa'atasi ekalesia ua fevaevae'i ona o tala'iga sesē. A o le Aposetolo e le'i mapu lana taugologolo ma lona fa'amanatu pea i tagata, le tāua o le talalelei a le Atua na ia tala'iina. Tele fa'afitauli o le galuega na fesaga'i ma Paulo, ae na avea ma lu'itau tāua mo Paulo fa'apea tagata Kerisiano. Ua lē masino le tele o tapua'iga eseese ua tatou molimauina i nei aso. A o le mea e sili ona tāua, o le soifua talitonu ma le fa'atuatua o le tagata, ia lafo pea i le Atua le matai o le galuega.

Tatalo: Lo matou tamā o i le lagi, ia avea mea e tutupu i lo matou ola, ina ia o matou iloa ai lou fa'aali mai iā i matou. **Amene!**

Aso Lulu – Me 29: “Fa'afitauli ma misa” *(Trouble and strife)*

Tusi Faitau – 1 Korinito 1:11-17

Matua – f.13: *“Po ua vaevaeina ea Keriso? Pe na fa'asatauroina ea Paulo mo outou? Pe na papatisoina ea outou i le igoa o Paulo?”*

I nisi o faitauga i lenei vaiaso, sa tatou molimauina le agaga fa'afetai ona o galuega lelei a le 'au Kerisiano e fa'amaoni i lo latou fa'atuatua i le tala'iina o le finagalo o le Atua. Peita'i, o le tatou faitauga o lenei aso, o lea tatou vaavaai ai i nisi o feseesea'iga i totonu o nisi o ekalesia. O Korinito, o le ekalesia e le'i leva

ona atia'e, 'ae foliga mai o lea ua aliali mai ai nisi o fa'afitauli ogaoga i totonu o le ekalesia. Ua fesiligia e tagata poo ai a'oa'oga e sili ona tãua ma le moni. Ua toatele nisi ua tã'ua o latou igoa ona o le mfa'afitauli ua alia'i mai i le ekalesia i Korinito.

Na silafia lelei e Paulo mea ua tutupu mai i totonu o le ekalesia i Korinito, 'ae na taula'i pea le vaai a le Aposetolo i le Atua ma lona finagalo ia taunuu i le manuia; aemaise Keriso ma le talalelei. O le avea ai ma Aposetolo e fa'aoo le finagalo o le Atua i le lalolagi, e le'o se faiva e faigofie. O fa'afitauli ia e feagai pea ma le tagata ua fai ma sui o le Atua. E inosia pea i tatou ona o le galuega a le Atua. Le feau o le talalelei e ala ia Iesu, lea o loo tatou taumafai ai pea e fa'alautele lona finagalo. Ia maua pea le lototele e feagai ai ma fa'afitauli o le galuega.

Tatalo: Le Atua alofa e, fesoasoani mai iã i matou, ina ia o matou fa'ailoa le alofa i nisi o matou feeseesea'i. **Amene!**

Aso Tofi – Me 30: “I le manatu e tasi” (*Of one mind*)

Tusi Faitau – Filipi 4:1-3

Matua – f.2: *“Ou te aioi atu iã Evotia, ou te aioi atu foi iã Sunetui, ia tasi lo la manatu i le Alii.”*

E tele tagata o loo ta'ua i le tusi a Paulo ia Filipi. O loo tã'ua ai fafine e to'alua, o Evotia ma Sunetui. O i la'ua nei, o nisi ia o tagata Kerisiano o le ekalesia i Filipi. O le galuega na o latou galulue ai, ma maua ai le fesoasoani telē mo le Aposetolo o Paulo ma lana galuega. E lē taumate foi la, na feagai foi i latou ma le tele o ni feeseeseaiga o le galuega. E fa'apea foi le tatou vaitau. Ua tele le mau tapuaiga eseese, ma ua foliga mai ua fai lea ma ala ua le mau ai se galulue fa'atasi e atia'e le galuega a le Atua. A o tatou iai i lenei soifuaga, o feteena'iga i le ola e lē maalofia. E tutupu pea matagi i liu o vaa. A o le naunauta'iga a Paulo, tusa lava poo a mea e tutupu i lo tatou ola, ia taulai pea le silasila i le Atua ma lona finagalo fa'aali mo le tagata. E ui ina faigata i le tagata ona feagai ma ia, ae o le Atua lava ia, e faigofie ai mea uma ua faigata.

Tatalo: Le Alii e, fa'amagalo i matou ina ua avea feteena'iga o le ola, e fai ma fa'alavelave i lo matou ola taulai i lau afio. **Amene!**

Aso Faraile – Me 31: “Alofa uiga'ese” (*Radical love*)

Tusi Faitau – Filemoni 1:1-7

Matua – f.7: *“Auã lo'u uso e, ua tele lo'u fiafia ma le mafanfana ona o lou alofa, ina ua fa'amafanafanaina le au paia ona o oe.”*

Ua manino i le tusi a Filemoni lana auunaga na fai mo isi. E le o lona tamãoaiga poo sona tulaga ua ia maua; e le'o le tele o ni ona fale poo ni la'ei mananaia ua ia mauaina na mafua ai ona viivii e Paulo. A o lona alofa. O le manatua o se tagata ona o lona alofa fa'aalia mo isi, o se mea lea e fa'anaunau iai e fia faia. O le alofa o Filemoni o loo tã'ua, o se alofa e uiga ese lona fa'atinoina. Ua ia lē vaai mo ia lava, 'ae ua ia naunau ina ia manuia nisi. Pe a fa'amatalaina le uiga o le igoa Filemoni i le gagana Eleni, o le agalelei. Ua o gatusa la le uiga o lona igoa ma ana galuega fa'atino e tusa ai ma lona valaauina.

O le upu alofa i le fa'amatalaina i le vaaiga fa'aSamoa, e fa'atusaina i itu e fa o le fale. E fealoa'i uma ona itu e fã o le fale. O le ata o se aiga e fetausia'i ma fealofani. O le alofa mata'utia o Filemoni na ia lē manatu ai lava mo sona lava lelei, ae ua ia manatu mo isi. E fa'apea foi le soifuaga o loo tatou iai nei. Ia fa'atãua

le ola fetausia'i ma le manatunatu mo manuia mo isi. Ia tupu pea le alofa i totonu o a tatou mafutaga. Ia mafai ona tatou manino i le uiga o le upu alofa e pei o le talitonuga fa'aSamoa.

Tatalo: Le Atua alofa e, ia o matou faia ma le fa'amaoni o matou tiute, e pei ona avea ai i matou ma soo o lau galuega. **Amene!**

Aso Toona'i – Iuni 1: "O le alofa le tali" (Love is the answer)

Tusi Faitau – 2 Ioane 1:1-6

Matua – f.5: *"O lenei, le tama'itai e, ou te aioi atu iā te oe e peisea'i o se poloaiga fou, a o lea lava ua iā te i tatou talu le amataga, ia tatou fealofani."*

O le tausia ma le ola i ni poloaiga na tuumai, o ni taiala e tatau mo le ola o soo se tagata. O taiala e fa'atonutonu ai le ola ua o tatou maua. I le molimau a le Aposetolo o Ioane, o le fa'amanatu a le matua moe po e uiga i le tumau i le fa'atuatua, atoa ai ma poloaiga na afua mai i le amataga. E anoanoai uiga o le alofa ma ona itu'āiga i lona fa'amatalaina. Ua fa'aaogaina e le tusitala le alofa mai le gagana Eleni o le 'agape.' O le alofa e leai sona vā tapuia, e pei ona fa'atinoina e Iesu e ala i le fa'aolataga na ia saunia. O le taiala mo le tagata na foaifuaina mai e le Atua, ina ia tauave e le tagata i aso uma; ia ola ma tausii e le tagata ma le tatau.

O le tagata ma lona tupuaga, o le tagata foi ma lona fa'asinomaga. E tofu lava le tagata ma le taiala na fa'afailaileina ai i totonu o 'āiga. O poloaiga a tua'ā na tuu fa'asolo mai i augātupulaga fou o loo gasolo mai. Aisea lava e tāua ai i le tagata poloaiga? E fai pea ma fa'amanatu ma a'oa'oga lelei, ina ia manatua ai pea le to'ala fanau o taiala o le ola. I nei aso ua tatou iai, ua tele ni taiala eseese ua tatou molimauina. Ua omai fa'atasi taiala lelei ma taiala fa'aletonu. Ua tele nisi ua aafia le soifua, ona ua filifili i taiala o le ola soona fai. Ua liaina i le ala poloaiga na fa'afailaile ai i totonu o 'āiga. O le Atua ma ana poloaiga, o manuia ia o le ola o le tagata e tumau pea, pe a tausii ma tumau pea i le Atua e lē aunoa.

Tatalo: Le Atua e, fa'afetai i lou alofa lē fa'atuāoia mo i matou. Fa'amagalo lau fanau, ina ua matou lē alolofa i nisi e pei o lou finagalo. Amene!

EVAGELIA A MAREKO (3)

1. O ai lenei tagata fai vavega? (Who is this miracle worker?)

Aso Sā – Iuni 2: "Loto mamā" (Inner purity)

Tusi Faitau – Mareko 7:1-23

Matua – f.15: *"E leai se mea o loo i fafo o le tagata e alu ane i totonu iā te ia e mafai ona leaga ai o ia; a o mea e sau mai totonu iā te ia, o mea e leaga ai le tagata."*

O a'oa'oga a Iesu na matalatala ai tulafono na tuuina e le Atua i lona nuu i le amataga. Silafia e Iesu loto o le au faresaio ma le au tusiupu, i le fesiligia ai o Iesu ma lona afio mai. E faitauina le tagata i ona uiga fa'aalia i le vā feagai ai ma isi. O fa'atinoga uma a le tagata, e afua mai i totonu o le loto. Ae talofa i le au faresaio ma le au tusiupu, o tagata fa'afiaamionu na atagia mai ai o latou loto ua leaga ona o uiga ua fa'aalia. O saunoaga tuusa'o a Iesu, ina ia talepe ai le pūmoomoo o le mafaufau o le tagata, i le uiga o poloaiga na o latou tauave mai i le amataga. Ua talatala e le Alii le mafaufau lavelave o loo i le au faresaio ma le au tusiupu. O le tagata e loto mamā, o le fa'ailoga o le tagata e lē fefe e fai le mea sa'o. E lē mafai ona lafi i tua o le mea sesē, ina ia nanā ai le mea sa'o.

Ua tatou molimauiina mea ua tutupu i totonu o soo se mafutaga. O le tusitusilima, fa'asausili, manatu fa'apito, o le ola muimui ma isi. O vaivaiga ia o le tagata e lē mafai ona aveesea. E iloa le tagata e loto mamā ma le tagata e leaga le loto i le soifuaga o loo ola ai. O vaivaiga ia ua faitauina ai i tatou e nisi. E tāua le mamā o le loto e pei ona a'oa'o Iesu. A mamā le loto, e lē fiu gōfie i mea e tutupu i le ola. E ui o le natura o lenei soifuaga, ao le ola taumafai o le tagata ina ia mafai ai ona toilalo i vaivaiga o le ola. E sili le ola tusaafia, nai lo le ola ae inosia.

Tatalo: Le Alii e, fesoasoani mai ia matou maua le filemu ma le mafanafana, fa'atasi ai ma nisi e le o maua le fiafia ona o fa'afitauli o lenei soifuaga. **Amene!**

Aso Gafua – Iuni 3: “O le fa’atuatua o le fafine o nuuese”

Tusi Faitau – Mareko 7:24-30 (*The faith of a gentile woman*)

Matua – f. 28: *“Ona tali mai lea o ia iā te ia, ua fa’apea mai, “Le Alii e, moni a oe; a e ui i lea o uli i lalo o le laoi e aai i latou i momoi mea a tama.”*

E tusa ai ma le faitauga o lenei aso, o le fa'atuatua o le fafine o nuuese na telē ai le avanoa e mafai ai ona fa'amaloloina lana tama teine. O le lolofi atu o tagata ia Iesu, na filogia ai ma le fafine lea. E le'i manatu le fafine o ia o se nuuese. Peita'i, ua naunau lava e saili ia Iesu i se fesoasoani ma lana tama. A tumutumu fa'apea se nofoaga, e popole le tagata fesili ne'i lē tali leleia lona manao. A o le fafine lea, ua lē fa'apea ni ona lagona ona o lona fa'atuatua ia Iesu. E le o le fa'atuatua na o upu, a o le fa'atuatua e o fa'atasi ma gaoioiga e pei ona faia e le fafine.

O le vaivaiga tele lea i nei aso. E i ai taimi e maua ai i tatou i fa'afitauli, ona fa'avaivai lea o le fa'atuatua. Ona tatou manatu lea, ua lē maua se tali e filemu ai lagona lē mautonu. Ua faia'ina le tagata ona o mea e tutupu i le ola. A o le fa'atuatua, o le aupega sili lea mo le tagata i aso uma o le ola. Ua musua'i le tagata e fesili ma saili fesoasoani i le Atua mo se mapusaga. Ua le manatua le Atua i taimi e filemu ai gasologa o le ola. Ae vave ona manatua i taimi o faigata.

Tatalo: Lo matou Tamā o i le lagi, fesoasoani mai lau afio i le tele o matou vaivaiga, ina ia o matou fesootea pea ma lau afio i aso uma e lē aunoa. **Amene!**

Aso Lua – Iuni 4: “O le fa’amaloloina o le tutuli ma le gūgū”

Tusi Faitau – Mareko 7:31-37 (*The healing of the deaf and mute man*)

Matua – ff. 32-34: *“Ona latou au mai lea iā te ia le tagata tutuli, ua leo oolo; ua latou ‘ai’oi foi iā te ia ina ia fa’ae e ia lona aao i luga iā te ia. Ua silasila ae o ia i le lagi, ua oi, ona ia fetalai atu lea iā te ia, “Efata.” O lona uiga, “ia avanoa.”*

O vavega a Iesu e atagia ai lona tulaga Atua i le va feagai ai ma le tagata. I le tusi faitau o lenei aso, o le fa'amaloloina o le tagata tutuli ma le gūgū. O gasegase nei e lua, e faigata lava ona maua se fofō. E faigata ona faalogo le tagata tutuli, a o le gūgū e faigata ona fesootea ma le isi tagata i e mea e manaomia. I le tatou matua, ua aumai ai le tali atu a le tagata ma'i i le Alii, ona ua ia maua le fa'amalologa o lona ma'i. “Efata” o lona uiga ua avanoa. Le mana o le Atua na fesoasoani i le Alii o Iesu ina ia faigofie ai lana galuega fa'aola mo tagata uma.

O le avea ma taulasea Samoa, o se tasi lea o galuega tāua i le olaga o le Samoa. I le tele ai o fa'amai eseese ua aafia ai i tatou i nei aso, e manaomia ni taulasea ma ni fomai e maua ai le to'a o le tagata mafatia. O nisi fomai ma taulasea ua saili le tamaoiga i mea ua latou faia. Ua naunau i mea e tau'i ai lana galuega, ae ua lē fa'amaoni ona fai le galuega alofa mo isi. Ioe, ia avea i tatou ma vaa fa'aola e saili

fōfō mai ai nisi ua mafatia. Fai ma le fa'amaoni la tatou galuega fesoasoani, ona mulimuli mai lea o lo tatou tau.

Tatalo: Ia matou faia galuega alofa mo e ua mafatia i ma'i o le tino. **Amene!**

Aso Lulu – Iuni 5: “O le fafagaina o le 4,000” (*The feeding of the 4,000*)

Tusi Faitau – Mark 8:1-13

Matua – f.12: *“Ona oi lea o ia i lona finagalo, ua fa'apea atu, “Se a le mea ua sa'ili ai lenei tupulaga i le fa'ailoga? E moni ou te faitatu iā te outou, e leai lava se fa'ailoga e avatua i lenei tupulaga.”*

O meaai o se mea e manaomia e tagata i aso uma. O tamaoaiga ia o le Atua o loo maua e le tagata i ala eseese. O le fafagaina e Iesu o tagata e 4000, na tu mati'e ai i le talalelei le matautia o le Atua. Peita'i, ua fesiligia e le au faresaio le Alii ona o le toatele o tagata ua iai. Ua galo i le au faresaio le tele o vavega na faia e Iesu, a o lea lava o loo tofotofu ia te ia. O se tasi lea o vavega na manino ai i le au faresaio ma le motu o tagata, o Iesu o le alo lava lea o le Atua.

E tāua le tausia lelei o le soifua maloloina o le tagata i meaai ua tatou maua. O le fa'amanatu lelei foi lea o le faitauga o lenei aso mo i tataou. Ua tatou iloa le taugata o le tau o le soifuaga i nei aso. Ua avea le taugata o le soifuaga ua tutupu ai fa'afitauli i totonu o soo se mafutaga. Ua tatou maua tupe, ae ua sesē lona fa'aaogaina e nisi. Fa'aaoga ma le tatau manuia o le Atua ua tatou maua. Ua aoa mai le tala o lenei aso, ia tautuana le soifua maloloina ia tausii lelei. Le ala lea na faia ai e Iesu le vavega i lona fafagaina o le motu o tagata e 4000, ina ia fa'afou pea le malosi o le tagata ma ia maua pea le ola fa'afouina.

Tatalo: Le Atua alofa, ia o matou maua le agaga o le fa'afetai i lau afio ona o au fa'amanuiaga ua matou maua, e tausii ai lo matou ola. **Amene!**

Aso Tofi – Iuni 6: “O mea fa'afefete a le au faresaio” (*Yeast of the Pharisees*)

Tusi Faitau – Mareko 8:14-21

Matua – f. 17: *“Ua silafia e Iesu, ona fetalai atu ai lea o ia iā te i latou, “Se a le mea tou te felafolafoa'i ai, ina ua leai ni a outou areto? Tou te le āu iloa ea, tou te le lagona foi? ua maā'a pea ea o outou loto?”*

Fai mai se tasi upu fa'a Samoa, o le lagona mate e tasi e manogi uma ai le suāuu. I le tusi faitau o lenei aso, ua loto maā'a ma lotovale le 'au Faresaia i le galuega a Iesu. Ua silafia e Iesu o latou loto fa'amaualuluga. Le au faresaio na fai ma fa'alavelave i le Alii ma lana galuega talai. E ui lava na o latou taumafai e fa'aleaga Iesu ma lana galuega, aepeitai ua fai i latou ma fa'amalosiau aogā ia Iesu. Nisi ia o fefete a le au faresaio na taumafai lava e mailei ai Iesu ina ia faiāina i lona iai i le lalolagi, ao fa'atino ai le finagalo alofa o lona tamā.

O a ni mea fa'afefete o loo aafia ai lo tatou ola i lo tatou foi vaitau? Ua lē masino le tele o suiga fou ua tatou molimauina i nei aso. O sauaga i totonu o nai o tatou aiga ona o le malosi o fuālaau fa'asāina. Ua fai lea ma matāvai o fa'afitauli i totonu o aiga ma soo se mafutaga lava. Le tupulaga talavou ua pule i le ola ona o faigata o le soifuaga ua aafia ai. O nisi nei o mea fa'afefete o loo tatou vaivai ai. Ua lē maua se loto maualalo e fesoasoani ai i e vaivai. O vaivaiga ia o le tagata, o loo toilalo ai pea lo tatou ola taumafai mo ni mea lelei. O le fa'amanatu tāua a Iesu i le au faresaio, o le fa'amanatu aoga foi lea mo i tatou. Tuu ese mea fa'afefete tuai, ae fai ni mea fou, ona tatou maua lea o suiga lelei mo le lumanai.

Tatalo: Le Atua lo matou tamā, ia manino pea la matou vaai ma le fa’alogo i lou finagalo, ina ia tupu ai le alofa mutimutivale i o matou loto. **Amene!**

Aso Faraile – Iuni 7: “Ua fa’amalolo e Iesu le tagata tauaso”

Tusi Faitau – Mareko 8:22-26 (*Jesus heals the blind man*)

Matua – f. 22: *“Ua oo ia i Petesaita, ona latou aumai lea o le tauaso iā te ia, ma latou aioi iā te ia ina ia pa’i ane iā te ia.”*

O le tagata tauaso lea na feagai ma lona ma’i i le tele o tausaga. Ae ina ua logo tala i vavega matautia na faia e Iesu, na ia naunau ina ia maua sona avanoa e feiloai ai i le Alii. Ua loa tausaga o momoo lenei tauaso ina ia maua se mapusaga i lona ma’i. O le taofiga fa’a-lutaia, o tagata mama’i nei, ua tele a latou agasala. Le vaaigna lea fa’aletagata na tatala e Iesu a o iai i le lalolagi. Silafia lelei e Iesu le tele o tausaga na feagai ai le tauaso ma lenei ma’i. O le fa’atuatua o le tauaso, na ia malolo ai mai lona ma’i.

Pe a maitau i lenei soifuaga o loo tatou iai, tasi lea o vaega o le tino o le tagata ua telē lona aafiaga. Ua tatou vaavaai masei ma taumafai i se auala e fa’aleaga ai le isi tagata. Ua leai se vaavaai i se mea e maua ai le nonofo lelei ma le fealofani, ae ua taumafai lava i le feaina’i ma le misa. Tatou te lē fia taliaina ni o tatou fa’aletonu pe a aafia i tatou i faigata, ae ua o tatou talia na’o mea e ta’ulelei ai i tatou. E lē taumate foi, o loo tupu i totonu o tatou Ekalesia. Ua sili le vaai i ē maualuluga tulaga tofi, ae ua fa’atuana’i i latou e vaivai ma maualalo le tamāoaiga. O tatou vaivaiga ia o loo tatou tauaso ai pea i nei aso. O a lava luitau ma fa’afitauli o le ola e feagai ma i tatou, mau pea le toovae i le Atua. Saili i le Alii mo se tali o tatou fa’afitauli, ona lē fesiligia lea o lona fesoasoani mai.

Tatalo: Iesu Keriso e, fesoasoani mai ia i matou, ina ia o matou iloa le tāua o le ola saili pea i lau afio i taimi faigata o le ola. **Amene!**

Aso Toona’i – Iuni 8: “O le ta’utinoga a Peteru”

Tusi Faitau – Mareko 8:27-30 (*Peter’s declaration*)

Matua – f. 29: *“Ona fetalai atu lea o ia iā te i latou, “Ao outou na, se a la outou upu iā te a’u nei, po o ai?” Ona tali mai lea o Peteru iā te ia, “O oe o le Keriso.”*

O le ta’utinoga a Peteru i le fesili a Iesu, na manino ai lona le malamalama. Silafia lelei e Iesu o le Atua na ia fa’ailoa iā Peteru o ia o le Keriso. O le ta’utino a Peteru, o lona tali atu lea i le fesili a Iesu, se’i vaai poo iloa e lona au soo lona iai i le lalolagi ma lana galuega. O le ta’utinoga, e fa’aalia ai lagona o se tagata ua iloa ma manino i le tali mo se fesili. O se tasi lea o ta’utinoga o loo talanoaina i le Feagaiga Fou, e uiga ese foi lona fa’amatalaina. O le taimi muamua lea na fesiligia ai e Iesu lona au soo, ina ia nofo malamalama le au soo o ia lava o le alo o le Atua.

O le ola ta’utino o le tagata, o le aga e tatau ona atagia ai le fa’amaoni. E tele ituaiga ta’utinoga ua tatou iloa i nei aso. O nisi o ta’utinoga ua na o na fa’aleo i le suamalie o upu, ae ua lē tausi ma mulimulita’i ai. Ua tele ina o tatou amanaia tala e feaveai solo, ona fai lea ma ala ua lē maua ai se nonofo lelei ma le fetausia’i lelei. Ao le ta’utino a Peteru e pei ona aumai e le tatou faitauga o lenei aso, o le ta’utino a le tagata ua manino ma malamalama i le va feagai ai ma le le Alii o Iesu. Ia o tatou malamalama muamua, ao le’i faia a tatou ta’utinoga.

Tatalo: Le Atua alofa, foai ia i matou le loto matala, ina ia o matou manino ai i lou fa’aali mai, ma ia faia ma le fa’amaoni a matou ta’utinoga i ou luma. **Amene!**

EVAGELIA A MAREKO (3)

2. Taulimaina le sāvali (*Getting the message*)

Aso Sā – Iuni 9: “Ala o le Atua, ala o le tagata”

Tusi Faitau – Mareko 8:31-38 (*Ways of God, ways of man*)

Matua – f. 36: “*Auā se a le aogā i le tagata, pe afai na te maua le lalolagi uma, ae māumau lona ola?*”

O le saunoaga manino a le Alii i ona soo ma le motu o tagata, ina ia malamalama i le tāua o le mulimuli ia te ia ma ana aoaoga. Ia manatua lelei e le tagata le tāua o le ola ua tuuina iai e le Atua. Le ola e lē na o fiafiaga o lenei lalolagi, ae ia tū mati’e i le Atua ma ona ala. Silafia e Iesu le saisaitia o lagona o tagata ona ua fa’auiga sese le tulafono sa tuuina e le Atua. O le ala lea o loo taumafai ai Iesu ina ia tatala ma fa’alauaitete tulafono mo le malamalama lautele o tagata. O mea e faia e le tagata, e tatau lava ona atagia ai le finagalo o le Atua. O ala o le tagata, e le’o ala ia o le Atua. Afai o lea, e fa’apefea la ona tatou iloa ua tatou faia ala o le Atua i mea tatou te faia? O ala o le Atua e fa’asino mai i auala eseese. E lē mafai e le tagata ona faitau le Atua ma lona finagalo. Ua na’o le Atua lava e pule aoao i le ola o le tagata ma lenei lalolagi. Ua na’o ia lava e na te faitauina aso o le tagata. O lona Agaga e fesoasoani ia i tatou, ina ia o tatou faia lona finagalo alofa. E atagia foi i galuega alofa tatou te faia ona ala uma.

Tatalo: Le Atua e, fa’atonu mai e lau afio o matou loto, ina ia o matou savavali ai i ou ala ua e finagalo iai. **Amene!**

Aso Gafua – Iuni 10: “Atalii o le Atua, atalii o le tagata”

Tusi Faitau – Mareko 9:1-13 (*Son of God, son of man*)

Matua – f. 5e: “*Se’i matou faia foi ni fale apitaga se tolu; o le tasi mo oe, o le tasi mo Mose, o le tasi mo Elia.*”

O lagona o Peteru i taimi e mafuta ai ma Iesu, lea na ia fa’atu ai le manatu e pei ona iai le tatou matua i lenei foi aso. E atagia mai ai le soo e fia fai mea lelei. O se soo e talimālō lelei. Manaia le manatu o Peteru e fau ni faleapitaga se tolu, ae atagia ai lona le malamalama i lea mea o loo tupu. O le tala i le liua o Iesu, na feiloai ai ma Elia ma Mose i luga o le mauga. O se vaaiga e sili ona mamalu ma paia, e a’oa’oina ai le ausoo i le ta’u ma le tagata moni o Iesu – o ia o le Alo o le Atua. E pei ona lagona le siufofoga mai le lagi i le taimi na papatisoina ai Iesu, o lea foi ua toe lagona ina ua liua Iesu i luga o le mauga – o le faamautinoaina o le ta’u o Iesu, o le Mesia na auina mai e le Atua.

Tatalo: Fa’afetai le Atua i lou fa’aali mai iā i matiou i soo se ala. O au fa’aaliga i ala faigata ma taimi e sololelei ai lo matou ola, e te leo tuulafoai i matou. **Amene!**

Aso Lua – Iuni 11: “Ua tulia e Iesu le temoni”

Tusi Faitau – Mareko 9:14-29 (*Jesus commands a demon*)

Matua – f. 23e: “*E mafaia mea uma lava i lē fa’atuatua.*”

A o fa’agasolo pea le galuega fa’aola a Iesu, sa fa’apea foi na filogia fa’atasi ai ma le au lotovale; ma o latou taumafai lava e fa’aleaga Iesu ma lana galuega alofa mo le lalolagi. O le fa’atuatua, o le talitonu lea i mea e lē vaaia, e pei o le tali o le tusi fesili a le aoga Aso Sā. O nisi nei o fa’afitauli na feagai pea ma Iesu i lana galuega, o le fa’amaloloina lea o tagata ua ulufia e temoni. O le temoni, na fai foi

lea ma fa'alavelave ia Iesu ma lana galuega. Peitai, na fa'amanatu lava e Iesu i tagata, poo lea lava le taumafai o le fili e lepeti le ola fa'atuatua o soo se Kerisiano, ia mausalī pea ma tumau i le Atua soifua.

O nisi ia o vaivaiga fa'aletagata ua solomuli gofie ai le ola fa'atuatua i nei aso. Ua avea le tele o mea e fai i totonu o aulotu ma ala ua fa'avaivai ai le fa'atuatua. Ua tele ina faitio ona ua tele mea fai tupe; ona tuaiina ai lea o le Atua ma lana galuega. Ua avea mea nei ma fa'ailoga o le temoni ua ulufia ai o tatou tagata lotu. Lafo i le Atua lo tatou fa'atuatua, ona tatou maua lea o le fa'amoemoe mausalī e feagai ai ma faigata o le ola pe a oo mai.

Tatalo: Lo matou tamā o i le lagi, fesoasoani mai i lo matou vaivai ma e fa'amalosi mai i lo matou ola lē talitonu i le tele o taimi. **Amene!**

Aso Lulu – Iuni 12: “O lē muamua e tatau ona mulimuli”

Tusi Faitau – Mareko 9:33-37 (*The first must be last*)

Matua – f. 35e: *“Afai e fia muamua se tasi, e avea o ia ma mulimuli i tagata uma, ma auauna a tagata uma.”*

Pe a sailia se pule i totonu o soo se galuega, pe fili foi se au taaalo i ni fāagatama, ona vaaia lea o le finau ma le tinoū o le tagata ia maua lea tulaga mauuluga. O le avea ma muamua, o se tulaga e lē ausia gofie. E manino lava le fetalaiga a Iesu i le tagata e fia avea ma muamua, e tatau ona mulimuli. O le a le uiga o lea mea? E lē fa'apea e avea ma mulimuli tau lava ina mulimuli, ona avea lea ma muamua. O le avea ma muamua, ia tautua ma ia galue ina ia maua le tulaga muamua. E fa'apea foi i le sailiga o se pule mo se galuega poo se au taaalo foi. E tatau lava ona finau ina ia mafai ai ona ausia le tulaga muamua.

O upu a le atunuu, ia fili i le tai sē agavaa. I totonu o aiga ma soo se mafutaga lava, e ia lava tofiga e taumafai tagata ina ia ausia. E lē fa'apea ona ua finau vale pe naunau i ni tofi. O le tatou aga i fanua, ua uma ona tofofi mai i le amataga. O le ala foi i le pule, o le tautua. O le tofi lena tatou te mafai ai ona ausia le tulaga muamua pe a o tatou fa'atino o tatou tiute o le tautua.

Tatalo: Le Atua alofa e, ia e foai ia i matou le loto mauulalo, ina ia o matou saili ai i lou finagalo; ina ia avea ai i matou ma muamua. **Amene!**

Aso Tofi – Iuni 13: “Ia filemu” (*Be at peace*)

Tusi Faitau – Mareko 9:38-51

Matua – f. 40: *“Auā foi o le lē ‘au ese ia te i tatou, e ‘au fa’atasi lea ma i tatou.”*

O le naunau o le tagata ina ia maua pea le filemu, o lagona momoo ia pe a oo i taimi ua āfātia ai le ola i fa'afitauli e tutupu mai. O taimi faigata ia o le ola e tupu ai lagona lē mautonu o le tagata ma popole vale le lotu. Ao le fetalaiga manino a Iesu, i lona taumafai ai e fa'amalamalama i tagata ina ia maua pea le filemu i taimi o fa'afitauli e tutupu mai i le ola. Lea o loo taumafai ai Iesu e momoli i tagata, e mautinoa lava le iai o le Atua ia i tatou i taimi faigata; ma taimi e solo lelei ai le soifuaga. E tutupu pea fa'afitauli i le ola o le tagata, aepeitai o le a'oa'o mai pea o Iesu, ia o tatou maua pea le filemu o le Atua i taimi faigata o le ola.

O upu a le atunuu, e tutupu pea matagi i liu o le vaa. O taimi e fesouaina ai i tatou i peau lagavale o le soifuaga, ona tupu ai lea o le lotu popole ma le lē mautonu. O taimi ia e lē to'afilemu ai lagona o le tagata, ina ua save'u e fa'afitauli le nofo filemu o tatou lagona. O lagona popole ia na oo i le ausoo ina ua āfātia le

latou faigamalaga, a o tōfā Iesu i le taumuli o le vaa. E ui lava i le lē mautonu o lagona, ae na fa'atepa e Iesu ina ua ia fa'atoafilemu peau lagavale o le sami ma le matagi. Ia tatou maua pea le filemu o le Atua i taimi o fa'afitauli e tutupu mai.

Tatalo: Foai mai ia i matou lou filemu, ina ia o matou lagona pea o loo e mafuta mai pea iā i matou, i aso uma o lo matou ola. **Amene!**

Aso Faraile – Iuni 14: “Fa’aipoipoga ma le toe fa’aipoipo”

Tusi Faitau – Mareko 10:1-12 (*Marriage and remarriage*)

Matua – f. 9: *“O lenei, o ē ua fa’atasia e le Atua, aua le fa’ate’aeeseina e le tagata.”*

O le tuu fatasia o le alii ma le tamaitai i le fa'aipoipoga, o le fa'amoemoe lea e ogatotonu i le Atua mo se aiga fou. E tuu fa'atasia ona ua malilie i laua e fa'apaia e ala i le fa'aipoipoga. Pe a maitau i nei aso i mea o loo tutupu pea i totonu o aiga, o sauaga ua leai se toafilemu ma lē utuvā, ua lē atagia ai o se aiga na tuu fa'atasia i luma o le Atua. Ua fa'ataaloga i vai i manatu o nisi le fa'aipoipoga. Ua avea fuālaau fa'asāina ma ala ua tutupu ai fa'afitauli i totonu o aiga. O le fa'aipoipoga e totonugalemu i le Atua, aepeitai ua fa'atauvaai i le vaai o le tagata. Ua pei o se mea na faia e le tagata, ae galo ai le fetalaiga a Iesu, “o ē ua fa'atasia e le Atua, aua le fa'ateaeeseina e se tagata.

Ua telē le suiga o le soifuaga i mea ua tutupu i totonu o mafutaga. O ulugalii ua faigofie ona tetea ona o le tele o fa'afitauli ua tutupu mai. O lagona o le tagata ua lē fa'amalieina. Ua tupu pea le manao lasi o le tagata i le tuinanau o le ola, ona galo ai lea o le fa'avae na fausia ai le aiga i le fa'aipoipoga e fusia e le Atua. O se feau lelei foi lea ina ia fa'amanatu mai pea ia i tatou le tāua o le tuufa'atasia i luma o le Atua. Ia fa'avae i le Atua le fausaga o se aiga fou, ona mausalī lea o le fa'avae. Aua ne'i māmā i manatu o le tagata le ola fa'apaiaina ma le fa'atasia i le fa'aipoipoga i le Atua. O le Atua lava, o le afuaga o mea lelei uma i lo tatou ola.

Tatalo: Le Alii e Iesu, a'oa'o mai ina ia o matou malamalama i lau upu, ina ia fai i matou ma fa'ataitaiga lelei mo nisi. **Amene!**

Aso Toona'i – Iuni 15: “O fanau lāiti uma” (*All the little children*)

Tusi Faitau – Mareko 10:13-16

Matua – f. 14e: *“Inā tuu mai ia o tamaiti e o mai iā te a'u; 'aua le vavao iā te i latou; auā e fa'apei o i latou nei o ē o i le mālō o le Atua.”*

O fanau o le tofi lea mai i le Atua. Ua fa'atusaina i latou e pei o agelu i le mālō o le Atua. O le ata manino o le loto māmā ma le ola fa'apaiaina. O fanau foi, e āuāu iai matua. O le oloa tāua na foaiina e le Atua ina ia tausi ma apepele e le tagata. Ua fa'ateia le motu o tagata ina ua tatala e Iesu le avanoa mo tamaitiiti ina ia o atu ia te ia. Ua manatu le motu o tagata, ina nei fai tamaiti ma fa'alavelave i lana galuega. Peita'i, ua a'oa'o Iesu, e tāua foi tamaiti i le Atua ma lona Malo. E tauave e tamaiti le ata o le faatuatua e finagalo ai Iesu mo i tatou. E le o le faatuatua faa-tamaitiiti, a o le faatuatua e pei ai o le tamaitiiti.

Tatalo: Le Atua alofa e, fa'afetai i lou alofa mai pea ia i matou o lau lava fanau. E ui lava i lo matou agasala pea, ae o loo e mafuta pea ma i matou. **Amene!**

Aso Sa o Tamā (Amerika)

Aso Sā – Iuni 16: “Igoa, igoa, igoa” (Names, names, names)

Tusi Faitau – 1 Nofoaiga Tupu 1:1-27

Matua – ff. 19, 24-27: *“Na fanaua foi e Eperu ona atalii e to’alua; o le igoa o le tasi o Peleko; auā o ona aso ia ua vaevaeina ai le lalolagi; o le igoa foi o lona uso o Ioketana. O Semu, o Afasata, o Selaa, o Aperamo, o Aperaamo lava lea.”*

I le tatou faitauga o lenei aso, o loo aumai ai le tāua o le igoa. O igoa o se fa’ailoga ia iloa ai le isi tagata ma le isi tagata. O ni mea ua fa’amau fa’ailoga ai le tagata, ina ia faigofie ona maua se tagata pe a sailia. O le tatou faitauga o lenei aso, o igoa nei o nisi o i latou o loo i le gafa o Atamu. O igoa e iloa ai le gafa ma le tupuaga. Talitonu e fa’apea foi le tāua o tatou igoa i nei ona aso. O igoa na fa’aigoaina ai i tatou e tua’ā ua afe moe le malaga. E tatau ona o tatou manatua pea le tāua o tatou igoa. Ia o tatou manatua le talafa’asolopito na mafua ai ona maua o tatou igoa. E tele foi isi uiga o le igoa i lona fa’amatalaina i le tatou gagana. O nisi o igoa e iloa ai le va fetausiai i totonu o aiga. Ae fa’amata o loo tatou manatua le amataga ma le mafuaaga o tatou igoa? Ioe, e iai lava mafuaaga eseese na mafua ai ona maua o tatou igoa. O le tele foi o isi igoa, ua naunau lava e saili ai viiga ma le tauleleia. Ua manatu faualuga ai nisi ona o latou igoa ma ni galuega lelei ua latou fa’atino. A o le faitauga o lenei aso, ua ta’u mai ai igoa o i latou ma galuega faigata na o latou taumafai ai mo se manuia o isi tagata i le lumanai.

Tatalo: Faamanuia i Tama uma o Samoa ma le lalolagi atoa. **Amene!**

Aso Gafua – Iuni 17: “E mulimuli ae lē itiiti” (Last but not least)

Tusi Faitau – 1 Nofoaiga Tupu 2:1-17

Matua – ff. 12-15: *“Na fanaua foi e Poasa o Opeta; na fanaua foi e Opeta o Iese; na fanaua foi e Iese lana ulumatua o Eliapo, o Pinatapa o lona toalua lea, o Sama o lona toatolu lea, o Natanielu o lona toafa, o Fatai o lona toalima, o Osema o lona toaono, o Tavita o lona toafitu.”*

O Poasa o se tagatānuu o sa Iutā e ona ni fanua. A o ia foi o se tagata agaalofa na taliaina Naomi ma fa’aipoipo ia Ruta. O Ruta o se tagatānuu o Moapi. E ui o le fafine nuuese, a o ia foi o se tagata e matuā mauualalo lona tulaga. Ae mulimuli ane, na fa’amamaluina e le Atua le fa’atuatua o Ruta ma le agalelei o Poasa. O lea na filifilia ai e le Atua le uii o Tavita (le atalii lona fitu o Iese, le atalii o le atalii o Poasa ma Ruta) e fai ma tupu o Isaraelu. E tele taimi tatou te le mailoa pe fa’apefea ona fa’aaoga e le Atua o tatou tagata. A ia mautinoa, e fa’atāuina e le Atua lo tatou fa’amaoni ma lo tatou fa’atuatua, e tusa lava pe foliga mai e leai se isi o amana’ia i tatou.

Tatalo: Fa’afetai le Atua ua e alofagia i latou o loo tuulafoa’iina e nuu ma tagata. Manatua pea i latou ua le taualoaina. **Amene!**

Aso Lua – Iuni 18: “O se auala sa’o ea lenei e manuia ai?”

Tusi Faitau – 1 Nofoaiga Tupu 4:1-10 (Is this the right way to prosper?)

Matua – ff. 9-10: *“Ua sili le mamalu o Iapesa i ona uso; na fa’aigoa foi lona tinā ia te ia o Iapesa, ua fa’apea, Ua ou fanaua o ia ma le tiga. Ua valaau atu Iapesa i le Atua o Isaraelu, ua fa’apea atu, E, fia manuia a’u ia te oe ma fa’alauteleina lo’u laueleele, ia ia te a’u foi lou aao, ma ia e leoleo mai iā te a’u ai le leaga, ina ne’i tigaina a’u. Na avatu e le Atua ia te ia le mea na ia fa’atoga atu ai.”*

O le tala o lenei aso ua tatou faitau ai ia Iapesa. O ia lea sa fa'amanuiaina e le Atua, e pei ona ia fa'atoga atu ai. O se ata vaaia i se tagata ua taliaina lona tatalo ma lona fa'atoga atu i le Atua mo le manuia. O le fa'atoga a Iapesa o loo ta'ua ai le aao fa'amalumu o le Atua ina ia ia te ia; o lana aao e ta'ita'ia ma puipuia ai, a o le aao foi e fa'asoasoa ma fa'atonutonu.

E iai taimi o le olaga tatou te manatu ma fa'amoemoe ai i auala faigofie e maua ai le manuia. E iai foi taimi ua tatou taunapa ai i auala sesē e maua ai le manuia. Ae peita'i, o le fa'amanatu o lenei aso, e le'o tagata uma o le Tusi Paia na latou mauaina le manuia e fa'apei o Iapesa; e ola sa'oloto e aunoa ma ni tiga. O lo tatou fa'amoemoe mo se ola manuia ia, ia taula'i pea i le Keriso Toetu, auā o iina o loo taoto ai le atoaga o le finagalo manuia o le Atua mo lana fanau fa'atuatua.

Tatalo: Afio mai Agaga Paia, ia matou tumau pea i lou malamalama e ala i le Keriso Toetu. **Amene!**

Aso Lulu – Iuni 19: “Feteena’iga o le fa’amaoni”

Tusi Faitau – 1 Nofoaiga Tupu 10:1-14 (*A crisis of loyalty*)

Matua – f. 4: *“Ona faiatu lea o Saulo i lona soātau, ina ia tō a’e ia lana pelu, ma tutu’i mai iā te a’u, ne’i oo mai na tagata le peritomeina, ma fa’aleaga mai iā te a’u; a ua lē mafai lona soātau, auā ua tele lona fefe; ona tago ai lea o Saulo i le pelu, ma fa’apa’ū i ona luga.”*

O le mataupu o lenei aso e fa'atatau i le fa'afitauli o le fa'amaoni. Fa'apei o le filifiliga sa feagai ma le soātau a Saulo, sa lei mafai e ia ona usita'i i le fa'atonuga a le tupu ina ia fa'aoo le oti ia te ia. Ua le mafai e lenei auauna ona fa'ataunuu ona tiute tauave, o le tautua fa'amaoni i lona tupu; ua le faia lona tiute auā ua feteena'i lona tiute ma lona manatu alofa i le tupu. Atonu o se ata tūgā lea o loo aumaia e le tala ia Saulo ma lona taua mulimuli ma tagata Filisitia. Ae peita'i ane, o filifili faigata fa'apenei e tutupu pea i le ola ma le soifua. E lē maalofia ma e le mafai foi ona tatou teena. O le mea moni, e iai filifiliga fai e leai se tali pe sa'o pe sesē, fa'apei o le tatou tala i lenei aso. Atonu e lelei foi ae tatou mafaufau atili ai i nisi o filifiliga faigata sa feagai ma i tatou. Ia tatou tapena mamao poo le a se tatou tali atu pe a feagai ma ni fa'afitauli e fesiligia ai lo tatou fa'amaoni.

Tatalo: Le Alii e, matou tatalo mo nisi ua feagai ma filifiliga faigata. Fesoasoani maia lou Agaga ina ia ta'ita'iina o matou filifiliga fai. **Amene!**

Aso Tofi – Iuni 20: “E lē fetau ma lē talafeagai?”

Tusi Faitau – 1 Nofoaiga Tupu 13:1-14 (*Unfair and unreasonable?*)

Matua – ff.9-10: *“Ua oo i latou i le mea e soli ai saito a Kitonu, ona tago atu lea o Usa o lona lima e taofi ai i le atolaau, auā ua taupa’ū povi. Ona tupu ai lea o le to’asā o le Alii iā Usa, ona fasia lea o ia, auā ua tago atu lona lima i le atolaau. Ua oti ai o ia i lea mea i luma o le Atua.”*

O le maliu fasia o Usa ona o le tago atu o lona lima i le atolaau o le Atua, o se ata fa'aali mai lea o le lē talafeagai o ni mea ua tutupu. Fa'i o le maliu fasia o Usa, a o se fa'aletonu tele foi ua faia e le tupu o Tavita ma lona manatu fa'atauavaa i le feavea'i ai o le atolaau o le Atua. Ua le usita'i Tavita i tulafono e feavea'i ai le atolaau o le Atua (Esoto 25), a ua fa'ati'eti'e ma feavea'i i luga o tua o povi. O le iai o le Atua i le atolaau, o le fa'aailoga foi lea o lona iai ma le nuu o Isaraelu. E fa'apea foi ma tatou. Na auina mai e Iesu le fa'amautinoa mo i tatou, e ala i le

Agaga Paia. O le fesoasoani sili. O le fa'amaufa'ailoga foi o le 'auai o le Atua ma lana fanau. O le fa'amanatu mo i tatou uma, ia 'aua ne'i tatou manatu fa'atauva i le iai o le Atua ma i tatou.

Tatalo: Ia aua lava ne'i o matou manatu fa'atauva i lau Afio, pe matou te manatu ifo o lau Afio ua na'o se isi vaega o lo matou ola. Leai! **Amene!**

Aso Faraile – Iuni 21: “Taufai amanatu i olaga gaogaosā”

Tusi Faitau – 1 Nofoaiga Tupu 15:11-29 (*The cost of celebrations in messy lives*)

Matua – f. 29: *“Ua oo le atolaau o le feagaiga a le Alii i le aai a Tavita, ona vaai ifo lea o Mekala le afafine o Saulo i le fa'amalama, ua iloa atu le tupu o Tavita o saa ma siva, ona 'ino'ino lea o ia iā te ia i lona loto.”*

O le olaga o Tavita sa le'i faigofie. Sa feagai ma le tele o gaogaosā. I lona va feagai ai ma le tupu o Saulo, na fa'afaigata lava ma e lei faigofie. E oo foi i lona fa'aipoipo atu ia Mekala le afafine o Saulo, na feagai foi Tavita ma lu'itau faigata. E peiseai o Mekala na fa'anonofo ma Tavita ona o faiga-polokiki a Saulo. Ae ina ua agaleaga Saulo ia Tavita, na puipui e Mekala lona to'alua o Tavita. Ina ua tuliloa Tavita, ua foai e Saulo lona afafine o Mekala e faaipoipo ma le isi tamaloa. Ae ina ua tulai mai Tavita e fai ma tupu, ona toe foi mai lea o Mekala e nonofo ma Tavita. Ioe, tele le gaogaosa. O le faitauga o lenei aso, ua faamanatu ma fai le fiafiaga ona o le taunuu mai o le atolaau a le Atua ua leva ona iai i lima o Filisitia. O se fiafiaga e ese foi, aemaise le va fesootai o Tavita ma Mekala. Ua siva ma 'ona Tavita, ua inoino mai ai Mekala. E le faigofie ni mafutaga faapenei. E ui i gaogaosā ma fa'afitāuli e tuliloaina ai i tatou i lenei olaga, a o iina lava na aumaia ai e le Atua le taunuu o lana fa'aleleiga mo le lalolagi, lea taunuu ia Iesu i luga o le satauro.

Tatalo: I totonu o lo matou olaga gaogaosā, le Alii e, aumaia lou fa'amautinoa o loo e galue pea ina ia fa'afiafiaina o matou tagata. **Amene!**

Aso Toona'i – Iuni 22: “Fa'asologa talafeagai” (Proper order)

Tusi Faitau – 1 Nofoaiga Tupu 18:9-17

Matua – ff. 11-14: *“Ua fa'asāina foi e le tupu o Tavita o ia mea i le Alii, atoa ma le ario ma le auro na aumaia e ia mai nuu ese uma nei, o Etoma, ma Moapi, ma le fanauga a Amoni, ma Filisitia, ma Amaleka. Ua faia Tavita ma tupu i Isaraelu uma, ua ia faia foi le fa'amasinoga ma le tonu i lona nuu uma lava.”*

Ua fa'atu e le Atua le malo o Tavita ma ua mapu foi le tupu mai le tele o ana taua; o lea na a'e ai se tofa ma fuafua Tavita e fausia le malumalu o le Atua. E ui i le mana'oga o le tupu, peita'i ua teena e le Atua; ae ona o le Atua o loo i le totonugalemu o le olaga ma le pulega a Tavita, na finagalo ai le Atua e fa'auau pea le nofoaiga o Tavita. Ua saili Tavita e fa'amamalu le Atua ma fa'ailoa lana pule silisili ese i mataupu o le malo, o le ala lea na ia tuuina atu ai o vete ma lafoga na ia maua i le Atua. Ua tofia e Tavita tagata maualuluga ma ta'ita'i e fai pisinisi tāua a le faigamalo, ma si'omia ai o ia i ositaulaga ma pule lelei.

Ua aumaia e le tusitala le manao o Tavita e fa'amamaluina le Atua ma o le fa'avae foi lea o le filemu ma le saogalemu o lana faigamalo. O le nofoaiga a Tavita ua aumaia ai fa'atonuga talafeagai, o le tonu ma le amiotonu foi o se ta'ita'iga o le malo o le Atua. O le tulaga lava lea, ma atonu pe a tatou moomoo mo se filemu, e sili atu ona tatou manaomia le tatalo ina ia avea le Atua ma totonugalemu o a tatou faigamalo, o a tatou tulafono, ma o tatou ta'ita'iga.

Tatalo: Matou tatalo mo i latou ua tauaveina tuluga maualuluga a lo matou faigamalo, ia iai lou mana ma lou ta'ita'iga e faia ai fa'atonuga talafeagai. **Amene!**

VAITAU O SUIGA: 1 NOFOAIGA A TUPU 19-29

Changing Seasons: 1 Chronicles 19-29

Aso Sā – Iuni 23: “Tali atu i le fēitaga’i” (*Responding to hostility*)

Tusi Faitau – 1 Nofoaiga Tupu 19:1-15

Matua – f. 13: *“Ia e fa’amalosi, ma ia fa’amalolosi i tatou ona o lo tatou nuu, ma aai a lo tatou Atua; a ia faia e le Alii le mea e finagalo i ai o ia.”*

O le tusi o Nofoaiga Tupu na tusia lava mo le ‘au Isaraelu ua toe foi mai le tafeaga i Papelonia. Ona o nei taimi faigata ma le lē mautonu, o lenei tusi sa fai ma ta’iala o le nuu ina ia mautinoa ai i le fa’avaeina o lo latou faigamalo ma le fa’amaoni o lo latou Atua. Ua ta’ua e le tusitala i lenei tusi, e ui i le fa’aleaga ma fēitaga’i mai o Amoni ma nisi o nuu tua’oi ia Tavita, a e le’i fa’atelevave se manatu o le tupu ina ia tau se taua ma Anuni le tupu o Amoni. O le mua’i tali atu a Tavita i le fēitaga’i mai ia te ia, ia tausi pea le filemu i le va o malo. Peita’i, o Anuni ua avatu tupe ario e totogi ai tagata Suria ina ia latou tau ma Tavita, o lea na mafua ai le taua o Isaraelu ma Amoni ma Suria uma. A o Ioapo ma lona uso sa fai ma ta’ita’i ‘au a Tavita, ua tuuina atu o la fa’atuatua i le Atua, ma ua la’ua fa’apea ane, “Ia e fa’amalosi, ma ia fa’amalolosi i tatou ona o lo tatou nuu, ma aai a lo tatou Atua; a ia faia e le Alii le mea e finagalo i ai o ia.” O le fa’amasinoga o le mea e patino i le Atua. E tusa lava pe fa’alumaina i tatou e tagata pe latou te fa’aita ma fa’atigā mai, e lelei ona tatou manatua pea le folafolaga, “... e galue le Atua i mea uma lava mo le lelei fa’atasi mai latou o e ua alolofa atu ia te ia” (Roma 8:28).

Tatalo: Le Alii e, e tuuina atu i lau afio o a matou va fetausia’i ina ia nofo ai pea lou filemu. **Amene!**

Iuni24: “Fa’amoemoe i le malosi fa’aletagata: tusigāigoa a Tavita”

Tusi Faitau–1Nofoaiga Tupu 21:1-13 (*Relying on human power:David’s census*)

Matua – f. 8: *“Ona fai atu ai lea o Tavita i le Atua, ua ou agasala tele, ina ua ou faia lenei mea; a o lenei, ou te aioi atu iā te oe, ia fa’amagaloina le agasala a lau auauna, auā ua ou fa’avalea lava.”*

O le tusigāigoa a Tavita na iloa ai lona fa’amaualuga. Ua manatu Tavita, o lona malosi ua mafua ai ona tupu ma olaola le malo, ae galo ai le alofa tunoa o le Atua. Na iloa i isi o le agasala le mea ua faia e Tavita, o lea na fa’asalaina ai e le Atua le nuu ma fa’amanatu ia’i latou le mea o loo taoto iai le pule ma le malosi uma lava. Mulimuli ane, ua toe salamō Tavita e pei ona ta’ua i upu o le matua o lenei aso.

O le tasi nei o fa’afitauli o loo maua ai i tatou uma. A oo na solosolo lelei ma manuia ni fuafuaga ma ni tatou ta’ita’iga, pe tatou te selesele foi manuia o a tatou galuega e tele, ona tatou manatu ai lea i le tatou malosi ae galo ai le alofa tunoa o le Atua. Fetalai Iesu, “Ina tumau ia o outou ia te au, o a’u foi ia te outou. Fa’apei o le la e le mafai ona fua pe a na o ia, pe afai e le mau i le vine; e fa’apea foi outou, pe afai tou te le tumau ia te au” (Ioane 15:4). Ia aua lava ne’i galo le Atua!

Tatalo: Le Alii e, fesoasoani ina ia matou tumau i lau Afio, ma ia tumau foi le fa’aneeneetaga ia te oe ona o mea uma ua matou maua. **Amene!**

Aso Lua – Iuni 25: “Sauniuni e fausia le malumalu”

Tusi Faitau – 1 Nofoaiga Tupu 22:1-10 (*Preparing to build the temple*)

Matua – f. 5: *“Ua fai atu Tavita, O Solomona lo’u atalii o le tama ititi ma le vaivai o ia; o le fale foi e faia mo le Alii e tele, e maualuga, e ta’ua, ma le matagofie i nuu uma; o lea ou te sauniuni ai. Ona sauniuni ai lea e Tavita o mea e tele, a o le’i oti o ia.”*

A o fa’asolo ona tagata matua le tupu o Tavita, sa iai lava se mana’oga o le tupu e na te fausia le malumalu e suia’i ai le fale fetāfa’i e afio ai le Atua. E ui i le mana’oga o Tavita, peita’i ane, e le’i mana’o le Atua e fausia e se tagata-o-taua lona malumalu. Ua mana’o lava le Atua i se fale o le filemu, a o se fale foi e fausiaina e se tagata filemu (‘Solomona’ e sau mai le upu eperu ‘Salome’— ‘Shalom’, lona uiga o le ‘filemu’ poo le ‘atoatoaga’). O le galuega ma ona mamalu ua tuuina atu i le alo o Tavita, a o le sauniuni o mea fausia ai le malumalu na faia lava i le agalelei o Tavita. Ua tatou iai i se vaitaimi ua tele na feteena’i ai ‘augatupulaga eseese. Ua tūua’i e tupulaga o latou tuua ona o a latou fa’aletonu, a o matua foi ua faitio i le lē atoatoa a le fanau. Ae a silasila manino i le tatou tusi faitau, o loo aumaia ai se ata manaia i le galulue fa’atasi o ‘augatupulaga. O se lu’i mo i tatou uma, ia tatou tapena auā le alualu i luma o ‘augatupulaga o le lumana’i. O tatou e lelei ai i latou, o tatou foi e pa’u ai le fa’aletonu i fanau.

Tatalo: Le Alii e, galue mai lou Agaga i o matou ‘augatupulaga o le lumana’i; fesoasoani ina ia matou fa’amalosi’au i latou e tautua lou talalelei. **Amene!**

Aso Lulu – Iuni 26: “Fa’avaeina le tapuaiga” (*Establishing worship*)

Tusi Faitau – 1 Nofoaiga Tupu 25:1-8

Matua – ff. 6-7: *“O i latou uma ia na pule ai lo latou tamā i pesega i le fale o le Alii i sumepalo, ma napeli, ma kitara, mo le galuega i le fale o le Atua, e pei o le poloaiga a le tupu ia Asafo, ma Iutana, ma Hemana. O le faitau aofai o i latou, atoa ma o latou uso o e na a’oa’oina i pesega i le Alii, o i latou uma e na popoto, e lua selau ma le valu o sefulu ma le toavalu.”*

O le tupu o Tavita ua iloa i salamo na ia tusia. I lenei tala, o loo fa’atulaga e Tavita le fa’avae o le tapuaiga auā le malumalu fou o le Atua. O pese ma pesega, o le ogatotonu lea o le olaga tapua’i o le nuu; ma o tagata tofia ia e to’a 288, o i latou nei ua filifilia e fai ma va fesoota’i o tagata ma le Atua, ina fa’alatalata mai ai o le Atua e ala i pesega ma viiga, ma ia aumaia ai le feau o le Atua mo le nuu. Ua toe aumaia e le tusitala o Nofoaiga Tupu lenei tala, ina ia toe fa’aoutsia le tapua’iga a le nuu i le mea na mua’i fa’avaeina ai e Tavita, auā ua fia selau o tausaga o nofo pologa Isaraelu i Papelonia, ma atonu ina ne’i taofia ai le faiga fa’apaupau o tapua’iga a Isaraelu. Fa’apei o le nuu o le tafeaga, e iai taimi e galo ia’i tatou le tāua o pesega ma viiga, e pei ona fa’avae ai e Tavita le tapua’iga a Isaraelu i le malumalu fou. Ia tatou fa’atāua le avea o tatou leo e lagi ai pese ma viiga i le Atua.

Tatalo: Le Alii, fa’atupuina le loto vivii ia i matou e lagi ai ou viiga. **Amene!**

Aso Tofi – Iuni 27: “Filifilia Solomona e fausia”

Tusi Faitau – 1 Nofoaiga Tupu 28:8-20 (*Commissioning Solomon to build*)

Matua – f.10: *“O lenei, ia oe, auā ua filifilia oe e le Alii e te faia le fale e fai ma malumalu; ia fa’amalosi, ma ia e faia.”*

O upu ia a le teaina o Tavita mo lona atalii o Solomona, a o sauni le tupu e tuua le nofoa mo lona atalii. Ua fa’asoa atu le tupu o Tavita i lona atalii, o ia o

filifilia ma tofia e le Atua, fa'apei foi ona tofia ai o ia e le Atua i le amataga. Sa fa'atauagavaa le vaai o tagata ia te ia, i le fa'atusaina o ia ma ona uso, peita'i na filifilia ma tofia lava e le Atua o ia e fai ma tupu. O lenei, ua fa'apupula atu foi e Tavita lona atalii o Solomona i le mea lava lea e tasi. Ia manatua, e le'o ia te ia se agavaa poo ia te ia foi le tofi o le ulumatua, ae ona o le finagalo o le Atua ua ala ai ona filifilia o ia e na te fausia le malumalu. O lenei, ia e fa'amoemoe i le Atua! O se fa'amanatu lelei foi lea mo i tatou uma i lenei aso. Ia tatou ne'i fa'amaualuga i lo tatou malosi ma so tatou iloa, ae galo ai le finagalo o le Atua ua ala ai ona valaauina i tatou. O a tatou tiute tauave uma, ia fa'amoemoe ma fa'alagolago i le Atua. Ia fa'atuatua ma fa'amaoni i galuega uma ua valaauina ma tofia ai i tatou.

Tatalo: Le Alii e, fesoasoani ina ia ou tumau i le fa'amaoni ona o lou finagalo filifilia ua ala ai ona ou manuia. Aumaia lou mana ma lou malosi. **Amene!**

Aso Faraile – Iuni 28: “Taumafaiga fa'alenuu” *(A community effort)*

Tusi Faitau – 1 Nofoaiga Tupu 29:1-9

Matua – f. 6: *“Ona foa'i lea ma le loto o matai sili, ma alii o itu 'āiga o Isaraelu, ma alii o ta'ito'aafe ma ta'ito'aselau, ma e pule i le galuega a le tupu.”*

O le tele o oloa ma mea e fai a'i le malumalu o le Atua, ua uma ona saunia ma tapena e le tupu o Tavita. Sa faia lava o ia ma fa'ata'ita'iga lelei i le tele ai o lona foa'i mai i ana lava mea totino e fai a'i le galuega. O le aofa'i o auro ma ario, aemaise o maa eseese sa mana'omia e fai a'i le galuega, ua lē mafaitaulia (f. 2). O lea na a'e ai le tōfā mamao a le tupu, e mana'omia le fesoasoani malosi mai o le nuu a le Atua, “... auā e le se maota mo tagata, a o le Alii le Atua” (f.1). Ua fa'apea lava ona fesoasoani malosi le nuu i lana taumafaiga fa'alenuu, ma ua latou foai ai ma le lotomaile ma le agalelei. O le upu a le atunuu, o le tele lima e māmā ai se galuega. O se nuu e galulue fa'atasi, o le nuu maopoopo lea. O le auga atoa lea o le apoapoiga a le Alii, ina ia nonofo fealofani ona soo aemaise Kerisiano uma.

Tatalo: Le Alii e, fesoasoani ia ou maua le agaga e foai ai a'u mea lelei uma mo lau galuega, fa'apea foi mo isi ua ole mai i se fesoasoani. **Amene!**

Aso Toona'i – Iuni 29: “Ua fa'auuina Solomona e fai ma tupu”

Tusi Faitau – 1 Nofoaiga Tupu 29:21-25 *(Solomon is anointed king)*

Matua – f.25: *“Ua fa'atuputeleina le mamalu o Solomona e le Alii i luma o Isaraelu uma, ma ua foa'i atu iā te ia le malualii, e le'i fa'apena se tasi tupu i Isaraelu na muamua ia te ia.”*

Ua fa'auuina Solomona e fai ma tupu, ma fa'amamaluina lona nofoaiga i luma o Isaraelu uma. E le o se mea na faia i lona potu poo sona malosi, a o le finagalo faitalia o le Atua. O loo ta'ua e le tusitala le maoa'e o le fa'auuina o Solomona, e lei fa'apea se tasi tupu na muamua ia te ia, ma e lei fa'apea foi i se tasi na mulimuli mai. Fa'i o le fa'auuina o Solomona, fa'i o le nofo fa'atalitali o le nuu e fausia le malumalu fou e Afio ai le Atua o Isaraelu.

O lenei olaga, e tulituli matāgau pea le ufi o sina aemaise o le naunauta'iga ina ia tatou maua fa'amanuiaga e tele mai le Atua, e le gata mo i tatou a o fanau o a tatou fanau. O le fa'amanatu mai o le tusi faitau, ia tatou fa'apei o Solomona, talia ma le agaga fa'afetai mea ua foaiina mai e le Atua mo i tatou. O le uiga moni lea o le alofa tunoa. Ia tatou olioli i mea ua foaiina mai i lenei olaga, auā e iai le mea silisili ua uma ona saunia e le Atua mo e alolofa moni ia te ia (1Kori 2:9).

Tatalo: Le Alii e, fa'atonutonu o matou loto ina ia matou taula'i atu i le fa'aolataga ma le fa'amoemoe pe a matou o atu i lou malo fou oi le lagi. **Amene!**

AIĀ TATAU A TAGATA LAUTELE (CIVIL RIGHTS)

1. Aiā tatau ma tiute tauave (Rights and responsibilities)

Aso Sā – Iuni 30: “O le a le filifiliga e te faia?” (What choice will you make?)

Tusi Faitau – Teuteronome 30:11-20

Matua – ff. 19-20a: *“Ou te valaau i le lagi ma le lalolagi i le aso nei e fai ma molimau iā te outou, ua ou tuuina atu i ou luma o le ola ma le oti, o le manuia ma le malaia, o lenei, ia e filifili i le ola, ina ia ola ai oe atoa ma lau fanau; ina ia e alofa atu i le Alii lou Atua, ma e fa'alogo i lona si'ufofoga, ma ia e pipii atu iā te ia ...”*

O aso uma e feagai ai i tatou ma filifiliga fai. O isi filifiliga – pei o le lae'i e ofu, o mea 'ai e tausami ai – o filifiliga faigofie. A o isi filifiliga – o sou faaipopoga, o le taavale/fale e faatau, o se galuega e faigaluega ai, ma isi – o filifiliga e silisili toto'a iai, ma fai ai su'esu'ega; e tele se taimi e alu ai e mafaufau lelei ai.

O le tusi faitau o lenei aso sa, a o le'i sopoia e Isaraelu o Ioritana ma ulufale i le nuu folafolaina, ua lauga Mose ia Isaraelu ma avatu ai upu o le lapata'iga. E fa sefulu tausaga na fa'asalaina ai e le Atua le nuu o Isaraelu ma feoa'i ai i tua o le vao. E mafua lenei fa'asalaga ona o le sese o le filifiliga na faia e o latou tuua, ua latou tali atu i le fefe ma le muimui nai loo le fa'atuatua i le Atua na fa'asaoina mai ai i latou mai i Aikupito. O lea la, ua toe aumai e le Atua le avanoa e ulufale atu ai Isaraelu i le nuu folafolaina. O le fa'amoemoe, “ia e filifili i le ola, ina ia ola ai oe atoa ma lau fanau; ina ia e alofa atu i le Alii lou Atua, ma e fa'alogo i lona si'ufofoga, ma ia e pipi atu ia te ia.” O le filifiliga e faigofie lava: o se olaga e alofa i le Atua ma usiusitai i le Atua, e maua fa'amanuiaga; e le gata i le taimi nei, ae fa'apea foi ma augatupulaga o le a mulimuli mai. Ae afai e leai, o le oti e tua iai. E fa'apei o le nuu o le Atua, e tatau foi ona tatou faia le filifiliga lava lea e tasi – filifili i le ola! “O le a le filifiliga e te faia?”... o lea, ia e filifili ma le potu.

Tatalo: Le Alofa Tunoa e, foai mai le potu i lenei vaiaso ina ia matou faia ai o filifiliga lelei, ma filifiliga e maua ai le ola. **Amene!**





TAUTUA PRINTING PRESS

1 Kanana Fou St, P.O. Box 1537
Kanana Fou, American Samoa 96799
(684) 699-9810
<https://efkasonline.org>